

Mateo Jesúsnoa Yoikĩ Keneni

*Jesucristo ãfe xinifãfe anefo
(Lc. 3.23-38)*

¹ Ë mato yoinõ a taeyoi ipaonifo Jesucristo ãfe xinifo. Jesucristo ãfe xini David. Nã David ãfe xini Abraham. Nãfo Jesucristo ãfe xinifo taeyoi iyopaonifo.

² Nã Abraham ãfe fake Isaaca ini. Isaaca ãfe fake Jacobo ini. Jacobo fake Judá ini. Æfe extofori ini.

³ Judapa fake Fares fe Zara ini. Æto afa Tamar ini. Fares ãfe fake Esrom ini. Esrom ãfe fake Aram ini.

⁴ Aram ãfe fake Aminadab ini. Aminadab ãfe fake Naasón ini. Naasón ãfe fake Salmón ini. ⁵ Salmón fake Booz ini. Booz ãfe afa Rahab ini. Booz ãfe fake Obed ini. Obed ãfe afa Rut ini. Obed ãfe fake Isaí ini. ⁶ Isaí ãfe fake xanifo David ini. Xanifo David ãfe fake Salomón ini. Salomón ãfe ãfa fene fetsaya iyopaoni, Urías.

⁷ Salomón ãfe fake Roboam ini. Roboam ãfe fake Abías ini. Abías ãfe fake Asa ini. ⁸ Asa ãfe fake Josafat ini. Josafat ãfe fake Joram ini. Joram ãfe fake Ozías ini. ⁹ Ozías ãfe fake Jotam ini. Jotam ãfe fake Acáz ini. Acáz ãfe fake Ezequías ini. ¹⁰ Ezequías ãfe fake Manasés ini. Manasés ãfe fake Amón ini. Amón ãfe fake Josías ini. ¹¹ Josías ãfe fake Jeconías ini; ãfe extofori ini. Mã Jeconías rama xanifo ikaino, Babilonia anoxõ xanifãfe ãfe sorarofo nĩchini israelifo ato ifitanõfo anã ato yonomaxikakĩ. Mã sorarofãfe ato ifitanaifono israelifo Babilonia ano fonifo. Jeconíasri iyonifo. Jeconías ãfe extofori kainifo.

¹² Nāskata Babilonia anoax fake fetsafori kainifo. Jeconías āfe fake Salatiel ini. Salatiel āfe fake Zorobabel ini. ¹³ Zorobabel āfe fake Abiud ini. Abiud āfe fake Eliaquim ini. Eliaquim āfe fake Azor ini. ¹⁴ Azor āfe fake Sadoc ini. Sadoc āfe fake Aquim ini. Aquim āfe fake Eliud ini. ¹⁵ Eliud āfe fake Eleazar ini. Eleazar āfe fake Matán ini. Matán āfe fake Jacobo ini. ¹⁶ Jacobo āfe fake José ini. Nā José āfe āfi ini, María. Nā María fake ini, Jesús. Jesús āfe ane fetsa Cristo ini.

¹⁷ Abraham āfe fenafo ichapa ini, nā David kainitīa catorce inifo Abraham āfe fenafo. Askatari nā David āfe fenafo ichapa ini. Nāskano David āfe kaifo yora fetsafāfe Babilonia ano ato iyonifo ato yonomaxikakī. Babilonia ano ikanax David āfe fenafo catorce inifo. Askatari David āfe fenafo Babilonia anoax anā fenifo āto mai ano. Mā fenixakakī David āfe fena fetsafori kainifo catorce inifo. Askatari Cristo kaini.

María Jesucristo kāini
(Lc. 2.1-7)

¹⁸ Ē mato yoinō ea nikakapo afeskax Jesucristo kāinimakī. José fe María yoināyonifo fianāxikakī. Fianāyofafomano Niospa Yōshi Sharapa María fake nanemani. ¹⁹ José Nios Ifofasharakōiax sharakōi ini. Nāskaxō José María yōapainima yorafāfe ferotaifi. Fomāxopaoni. Nāskaxō tsoa yoixoma José María enepaini. ²⁰ Nāskano José āfe namapa ōini Niospa āfe ājirinī yoiaito. Yoikī iskafani: “José, rateyamafe María fe fianāxiki. Na fake nanea Niospa Yōshi Sharaōxō akaki. ²¹ María fake feronāfake fii kiki. Mī anekī Jesús faxikai. Nāato ato ifipakenakaki. Nāskaxō afe yorafo āto chaka

soaxoxii kiki ato nimapakexakī,” ixō ājirinī José yoini.

²²⁻²³ Chanĩmakōi nāskakōi nā Nios yoimisto yoini keskarakōi. Iskafakī kirika keneyoni Niospa shināmanaino:

Kēro xotofake feronāfake fe imisma fake onixii. Fake feronāfake fixō anekī Emanuel faxii, ixō yoini. (Akka nōko mekapa Emanuel fakī, “Nios nofe ika,” ixō nō yoimis.)

²⁴ Mā ājirinī yoiano José moinākafani. Nā ājirinī yoia keskafakī, José María fini. Mā fixō āfe pexe ano iyonī. ²⁵ Mā afe fīanāx afe chotanānima āfe fake kāiyonō. Mā fake kāiano anekī Jesús fani.

2

Feronāfakefo fishi tāpikōimisfo a xini oaikirinoax mai fetsa anoax Jesús ōipai fenifo

¹ Herodes xanīfo ikano Jesús kāini Belén pexe rasi anoax, Judea mai anoax. Nāskano a xini oaikirinoax mai fetsa anoax feronāfakefo fishi tāpikōimisfo fenifo Jerusalén ano. ² Nokotoshikaxō yōkanifo: “¿Fanīmē a rama kāia judeofāfe āto xanīfo ikai? Mā nō ōia āfe fishi oaīto. Nāskakē nō oa Jerusalén ano xanīfo ōiyoi. Nō akiki inimai nō oa, ‘Mī nōko xanīfokōi,’ ixō yoipaikī,” fanifo.

³ Askafaifono fetsafāfe yoiaito nikakī Herodes shināchakakōini xanīfo iki kiki ixō. Askatari keyokōi Jerusalén anoafāferi shināchakakōinifo. ⁴⁻⁵ Akka Herodes judeo inima. Nāskaxō ato kenamani a ato Nios kīfixomis āfe xanīfofo fenōfo ato yōkaxiki. Askatari a Moisés yoikī kirika kenenī keskara ato tāpimamisfo ato kenamani ato yōkaxiki.

“¿Fanĩax Cristo kãixiimẽ?” ato faito kemanifo iskafakakĩ: “Belén anoax iki, Judea mai anoax,” fanifo. “Niospa meka yoimisto nãnori kirika keneyoni a inõpokoai yoikĩ Niospa shinãmanaino. Iskafakĩ keneni:

⁶ Belén, Judá mai anoax pishtakõi. Akka pexe rasi fetsafo efapakõifo. Askafiax Belén shara-finakõia ixii mãmãi israelifo ãto xanĩfo finakõia kãixiaino Belén anoax. Nãskakẽ ãfe inakõifo israelifo ãto xanĩfokõi ixii, ixõ kirikaki keneni Niospa meka yoimisto Niospa shinãmanaino,” fanifo.

⁷ Nãskakẽ Herodes a fishi tãpimisfo ato yõkani onexõ tsõa nikayamanõ: “¿Afetĩa fishi mã õitamẽ?” ato fani. ⁸ Nãskaxõ ato nĩchini Belén ano. Herodes tãpipaikĩ, “Belén ano fotakãfe a fake tãpixikakĩ. Mã fichixõ ea yoifexikakĩ ãri akiki inimaikanõ,” ato fani ãa ato pãrakĩ.

⁹ Ato askafaino fonifo. Fokakĩ fishi rekẽ kaino chĩfafainifo. Nãskax fishi nẽteni nã fake yome ano. ¹⁰ Nã fishi anã õikanax inimakõinifo. ¹¹ Nãskakanax pexe mẽra ikifaikaxõ fake yome fichinifo afa María yafi. Mã fichikaxõ ratokonõ mai chachipakefõfanifo, a fakeki inimakakĩ. Nãskakaxõ ãto kafo fẽpekaxõ afama mĩshti sharakõifo Jesús inãnifo. Oro minikãta, pirofomãri mininifo a nõ koofatiro pirofomã nakas sharakõi. Askatari pirofomã fetsari ãfe ane mĩra inãnifo. ¹² Nãskakẽ namakẽ Niospa ato yoiano anã Herodes ano fonifoma. Fai fẽtsa fonifo ãto mai ari.

María feta José Jesús ichokinifo Egipto mai ari

¹³ Askata a fishi tãpimisfo mã foaifono, José namakẽ, Niospa ãfe ajirinĩ yoini: “Moinãkafafe. Mĩ ãfi

feta mĩ fake yome ichokitãfe Egipto mai ari. Nãri ikiyoxiki nã ã mato yoiaino mã anã onõ. Herodes na fake yome fenai kiki retepaikĩ,” Niospa ãjirinĩ José fani namakẽ.

¹⁴ Nãskata moinãkafata, nã fakishi fonifo María fe José ãto fake Jesús iyoi fokani Egipto ano. ¹⁵ Egipto ano José fe María ipaonifo mã Herodes naano fexixakakĩ. Nãskakẽ Egipto ano iyopaonifo. Niospa meka yoimisto nãnorikõĩ kirika keneyoni Niospa shinãmanaino iskafakĩ: “Èfe fake ã kena Egipto anoa,” ixõ Niospa meka yoimisto kirika keneni.

Fakefo retenõfo Herodes ato manamani

¹⁶ Fishi tãpimisfo Herodes fomãkani. Fai fẽtsa foafono nikai, Herodes õitifishkikõini. Fishi tãpimisfãfe taeyoi Herodes yoyonifo ato yõkaito iskafakakĩ: “Afetĩama nõ nã fishi õikĩ taefati, mã xini rafe aka,” fanifo. Nãskakẽ Herodes sorarofa ato manamani fake feronãfake xini rafe akafo, yome mĩshtifoya ato retenõfo, Belén anoafõ retekãta, a Belén pasotai ikafori ato retenõfo. ¹⁷⁻¹⁸ Nãskara taeyoi Jeremías Niospa shinãmanaino kirika keneyoni a inõpokoai yoikĩ. Iskafakĩ keneni:

Ramã anoxõ nikanifo fãsikõĩ oiaifono. Raquel oiaito nikanifo ãfe fake manoi, mã ãfe fake nano. Oiyayamafe fafiaifono nishpanima, ixõ Jeremías keneni.

Nã Jeremías yoini keskara mã askakõia.

¹⁹ Mã Herodes naano Niospa ãjirinĩ afianã José yoini namakẽ iskafakĩ: ²⁰ “Moinãkafafe. Mĩ ãfi feta mĩ fake iyotaxiki Israel mai ano. A fake yomefo retepaimisfo mã naafoki,” fani.

21 Nāskafaino moinākafani José. Āfe āfiri mōini āfe fake yafi. Nāskakanax Israel ano anā fonifo. 22 Mā fōkakī nikanifo ato yoiaifono Herodes fake Arquelao mā xanīfokē Judea anoax. Nikai José rateni Judea ano kapai. Nāskaito anā ājirinī José yoini namakē iskafakī: “Galilea mai ano katāfe,” fani. Nāskafaino fonifo Galilea ano āfe āfi fe Jesús iyokani. 23 Nāskax nokonifo Nazarete pe xe rasi ano. Nāno inifo. Nānori taeyoikōi Niospa meka yoimisfāfe yoionifo, “Cristo Nazarete ano imis,” fakakī, a inōpokoai yoikakī. Nāskakōini.

3

Juan Maotista tsōa istomaxō ato yoini (Mr. 1.1-8; Lc. 3.1-9, 15-17; Jn. 1.19-28)

1 Jesús Nazarete ano ikano Juan ato maotisafapani tsōa istoma ixō Judea mai anoxō. Nānoxō Niospa meka ato yoipaoni. 2 Nānoxō ato yoipaoni iskafakī: “Yorafāfe, anā Nios shinākāfe. Māto chaka xatekōikāfe, a mā chakafamis shināmakikāfe. Niospa meka nikakōikāfe. Mā chaima nōko Ifo Nios oi kiki nōko xanīfo finakōia ixii kiki,” ixō Juan ato yoipaoni fāsikōi.

3 Isaiás kirika kenekī yoiyoni a inōpokoai yoikī Niospa shināmanaino. Iskafakī yoini:

Tsōa istoma anoxō yorafo yoixii akiki feaifono. Iskafaki ato yoixii: “Mā nōko Ifo oi kiki. Nāskakē itipinīsharakāfe. Āfe fai sharafaxokāfe. Māto chaka xatekāfe,” ixō ato yoiaito nikaxikani, ixō Isaiás kirika keneyoni Juanoa yoikī.

4 Akka Juan āfe rapati kamīcho fichi kishi faxō safepaoni. Āfe sītorari fichi koiro safepaoni.

Nāskaxō tseo pipaoni, fonari apaoni. ⁵ Nāskano Jerusalén anoafō yafi Judea anoafō fenifo Juan nikai fekani. A faka Jordán chaima ikafori fenifo. ⁶ Mā fēkaxō Juan yoinifo a afara chakafamisfo. Nāskaxō āto chaka xatepaiyaifono Juan ato maotisafapani faka Jordán anoxō.

⁷ Nāskaifono fariseofo xanīfo metsamafo feaifono, saduceofo xanīfo metsamafori fenifo Juan ano. Ichapakōi fenifo, “Nokori Juan nashimanōra,” ikanax. Juan ato ōikī ato iskafani: “¿Afeskai mā ea ano oimē? ¿Ē mato maotisafapanō mā oimē? ¿Tsōa mato yoiamē? Mā shināiraka nō chiifā mēra katirora ixō nāskax mā maotisapaimē, nō chiifā mēra kayamanōra ikax. Maa, mā kai afaa tāpiama, askax mā maotisiroma. Mā Nios Ifofaima. Mā oa shano keskara mātō ōiti chakakōi. Nāskaxō mā Satanás ifofaa. Nāskakē kaxpa ē mato maotisafatiroma māmāi Satanás fisti shināito. Āa fētsa mato pāratiro nō maotisanō nō chiifā mēra kaimakai Nios nikayamafix ixō mato pārano mā chiifā mēra katiro fetsa afaa tāpiamato mato pārano. Askara Niospa mato ifitiroma mā kairoko shināito, ēroko mato maotisafaano. ⁸ Mātō chaka xatekāfe, Nios shinākāfe. Mā Nios shināito ē mato maotisafapakai. ⁹ Ē mato anā yoinō nikakapo. Mā shinātiro: ‘Nā Abraham nōko xini ipaoni, ōiti sharayaxō Nios shināpaoni.’ Akka mā shinākī: ‘Nōmāi Abraham fenaxō nō shara shināi,’ ixō mā shinākī mā shināsharaima. Askara shināyamakāfe. Akka mātō ōitinī mā chaka shināfi mā chanī. Nikasharakōikāfe, ē mato yoinō. Na tokiri Niospa onifaxō nīchikē mā ōitiro Abraham āfe fena inō. Nāskakanax Abraham fakefo itirofo

na tokiri ōikī Nios shinākanax. Akka mā kai anori shināima mā mā chanī: ‘Abraham shināpaoni keskara nō shināira,’ ikax. Askara shināyamafi Satanás fisti ifofafiai. ¹⁰ Akka fana fimiya maito ifāfe reratiro. Āfe tapori tsekaxō koofatiro anā niyamanō. Nāskarifikā mā Nios nikakaspaito a omiskōipakenakafo mēra Niospa mato potaxii mā chaka xateaxma mā isharayamaito. ¹¹ Nāskakē ē mato maotisafai māto chaka mā xatepaiyaito Nios Ifofapaikī. Akka nā ea keskarama mā chaima oi kiki, nā sharafinakōia. Aato afama mīshiti fatiro, ē atiroma keskara. Akka ē afaama. Mā Nios chanīmara faino aato āfe Yōshi Shara mato mēra naneyoi. Akka tsōa Nios chanīmara fayamaito, Niospa mato omiskōimaxii. ¹² Akka yōra āfe tarepa aros fanaxō mā pachiano topitiro. Nāskaxō katotiro a sharafo fixō a chakafo potaxō koofatiro. Nāskarifikā a chipo oaito a chanīmara faafo yafi a nikakaspamisfo ato paxkanāfaiyoi. Nāskaxō a chanīmara faifo a ika ano ato iyoxii afe isharapakexanōfo. Akka nā nikakaspamisfo chiifā mēra ato potano anoax omiskōipakenakafo. Chiifā mēranoax omiskōi xatenakafoma,” ixō Juan ato yoini.

*Juan Jesús maotisafani faka Jordán anoxō
(Mr. 1.9-11; Lc. 3.21-22)*

¹³ Askata Galilea anoax Jesús kani faka Jordán ari Juan maotisafanō. ¹⁴ Akiki nokoaino Juan Jesús iskafani: “Jesús, ¿afeskakī ē mia maotisafatiromē? Akka mīroko ea atironō,” fani.

¹⁵ Askafaino Jesús kemani iskafakī: “Epa Niospa noko yoia keskara keyokōi nō nikakōitiro. Nāskakē ea mīa maotisafatiro,” fani.

Jesús askafaino, Juan Jesús maotisafani. ¹⁶ Nāskata Jesús faka mēranoax fininākfānaino nai fepekemetani. Ariax Niospa Yōshi Shara akiki ftoni, oa rifi keskara Jesús ōiaino. ¹⁷ Askaino nai mēraxō Āpa yoiaito nikani iskafaito: “Mī ěfe Fakekōi ě mia noikōi. Ĕ mikiki inimasharakōi,” ikaito nikanifo.

4

Satanás chakata Jesús afara chakafamapaini (Mr. 1.12-13; Lc. 4.1-13)

¹ Nāskaino Niospa Yōshi Sharapa Jesús iyoni tsōa istoma anoxō Satanás afara chakafamapainō.

² Mā cuarenta nia oxax Jesús fonāikōini afaa pishta piyamax. ³ Nāno Satanás akiki nokoni. Mā akiki nokoxō ifofamapaini. Askatari chakafamapaini. Iskafakī yoini: “Mī Niospa Fakemākī na tokirifo pāa fapo,” fani.

⁴ Askafaito Jesús kemani: “Maa, na mī ea yoiai keskara ě akima. A nō piati fisti nō shināima nipaikī. Akka Epa Niospa āfe meka fisti shara nō shināitiro. Nāskara Niospa meka yoimisto keneni,” Jesús fani.

⁵ Jesús askafaino Satanás iyoni Jerusalén ano a Nios kīfiti pexefā māmākīa. ⁶ Nānoxō yoini iskafakī: “Mī Niospa Fakekōiaxroko mī niriāx ichopakekafanikai. Mī ichopakekafanax mī afeskaimakai. Nā Niospa meka kirikaki keneaki iskai: ‘Niospa āfe ājirifo yoixii mia kexenōfo.’ Askatari kirika keneano iskaki: ‘Mī āto mifiki pakeaito mia achixikani kiki mī tokiriki pakenōma,’ kirika kenea iskaki,” Satanás Jesús fani.

⁷ Askafaito anã Jesús kemani: “Akka na kirika keneano yoinifo iskafakĩ Niospa meka: ‘Nõa nõ meka fetsafaxõ nõ yoitiroma: “Ë afara afeskarafaito, ea Niospa kexei,” ixõ nõ shinãtiroma. Akka, “Niospa ea amapaiyai keskara nã fisti ã atiroki Niospa ea kexenõ,” ixõ shinãkãfe,’ ikaki na kirika keneano,” Jesús fani.

⁸ Askata Satanás Jesús iyoni mãchifã mãnãñẽ. Arixõ õimani nã maifo tii sharafinakõia. ⁹“Õipo. Mĩ ea ratokonõ mai chachixõ, ‘Mĩ ãfe ifoki,’ mĩ ea faito na maitio keyokõi ã mia inãtiro mĩ ãfe ifo inõ,” fani.

¹⁰ Askafaito Jesús kemani: “Satanás. Emakinoax katãfe. Ë mia ifofaimakai. Na kirika kenea ano Niospa meka yoimisto iskafani: ‘Nã nõko Ifo Nios fisti nõ ratokonõ mai chachixõ nõ yoitirokĩ, nã fistimãi nõko Ifokẽ,’” fani.

¹¹ Askafaino Satanás Jesús makinoax kaino Niospa ãfe ãjirifo akiki fotonifo pimaxikakĩ.

Galilea anoxõ Jesús ato yoikĩ taefani
(Mr. 1.14-15; Lc. 4.14-15)

¹² Akka mã Juan sorarofãfe karaxa mẽra iki-mana nikata Jesús Galilea mai ano anã oni.

¹³ Nazarete anoax Capernaúm ano nokoni ano ixiki. Nã Galilea ãa kesemẽ Capernaúm ini. Nãnori yora fetsafori osia ini. Zabulonõfo fe Neftalifo ano ikafo ini. ¹⁴⁻¹⁶ Isaías kirika kenekĩ yoini keskakõi Jesús nãno ipaoni. Isaías kirika kenekĩ iskafani:

Zabulonõfo fe Neftalifo ãto mai ano ikafo ãa Galilea ano. Faka Jordán okiri chai poketa nãno judeofoma fakish mẽra ika keskara, Niospa meka nikakatsaxakakima. Fakish mẽra ika keskara ifiakaxõ, oa koshi penai keskara

õixikani. Fakish mēra ipafikeranaxakakī atoki penarisatani, ixō Isaías a inōpokoai yoikī Jesúsnoa keneni. Nāskarifiiai omiskōipakenakafo mēra ikeranafo. Askafikeranafono atoki Jesús nokoaitīa nā Ifofaafō tii ato nimapakenaka.

¹⁷ Anoxō Jesús ato yoikī taefakī iskafani: “Mā chaima nōko Ifo Nios xanīfo finakōia oi kiki. Nāskakē shināmitsayanā mātō chaka xatekāfe. Afaa chakafatamaroko Niospa meka nikakōikāfe,” ixō Jesús ato yoini.

Jesús cuatro feronāfake kenani tarafanāfānē foe fimisfono āfe inakōi inōfo

(Mr. 1.16-20; Lc. 5.1-11)

¹⁸ Ato yoita Jesús Galilea ĩa kesemē kani. Kakī fichini Simón yafi onefetsa Andrés. Simón āfe ane fetsa Pedro ipaoni. Nā rafeta tarafanāfānē fimisfo inifo, āto tarafanāfā faka naki poteaifāfe. ¹⁹ “Efe fokāfe. Māfi tarafanāfānē fimiskī. Mā foe ichapa rasi tarafanāfānē fiaj keskari fakī iskaratīari mā ekeki yora ichapa efexii ē āto Ifo inō,” ixō Jesús ato yoini. ²⁰ Ato askafaino tarafanāfā fafaikani afe fonifo.

²¹ Askata ori chaimashta kaxō Zebedeo fake raferi fichini, Santiago yafi Juan. Nā rafeta āto apa feta kanōa nakixō tarafanāfā itipinī fanifo, kishi-fakākī. Nā raferi, “Efe fokāfe,” Jesús ato fani. ²² Ato askafaino āto apa kanōa ano nīchifainifo Jesús fe fokakī.

Jesús yora ichapafo tāpimani

(Lc. 6.17-19)

²³ Mā askafaxō afe foafono nā Galilea anoafō kafāsakī Niospa meka ato yoini. Judeofāfe

ichanāti peXe mēraxō Jesús ato Niospa meka shara yoisharakĩ isKafani: “Itipinĩsharakãfe. Nios nonoax mãto xanĩfo ipai kikĩ,” ixō ato yoifofãsafani. Askatari a isinĩ ikaifo fetsa fetsatapafo ato sharafãpani. ²⁴ Askafaano nikakaxō Siria mai anoafō isinĩ ikaifo akiki efenifo ato sharafapanō. Isinĩ ikaifo fetsa fetsatapafo akiki efenifo. A yōshi chaka ãto mēra naneafori ato sharafani. A nĩsoaifori efeta, a finimismafori efeta, a chatofori efenifo. Ato keyokōi sharafapani. ²⁵ Askafaito yorafã rasichi chĩfafainifo. Atiri Galilea anoax fonifo, atiri Decápolis anoax fonifo, atiri Jerusalén anoax fonifo, atiri Judea anoax fonifo, atiri faka Jordán okirinoax fekãta Jesús chĩfafainifo.

5

Machi mǎnǎnēxō Jesús ato yoini

(Lc. 6.20-23)

¹⁻² Yorafã rasi akiki feaifono òi Jesús ato paxafãini kaax, machi pochini tsaoni. Tsaoano ãfe meka tãpipaimisfo akiki fenifo. ãfe meka nikai fekani. Akiki feafono ato yoikĩ isKafani:

³ “Fētsa ãto shinã mēraxō shinãkĩ isKafax: ‘Èakai ã isharaTiroma. È Nios yopakōi,’ ikaito Niospa inimamaxii mǎmãi Nios Ifo sharafaino ãfe fakekōi inō.

⁴ “Fetsa shinãmitsakōifiaino chipo Niospa noikĩ inimamaxii.

⁵ “Fetsa kakapaimisma imisno Niospa inima-masharaxii. ‘Keyokōi maitio atonã ixii,’ ixō Niospa yoiyoni keskara atonãri ixii.

⁶ “Fětsa Niospa meka noikōikī Niospa ato imapaiyai keskara shara ipaikōikani, nã keskarafo Niospa ato inimamaxii.

⁷ “Fětsa fetsafori noikī ato sharafaito Niospa tãpia. Nãskakē ari Niospa noikī axosharapakenaka inimamakī.

⁸ “Fětsa Nios shinãsharakī, ãfe õiti mēra afaa chaka shinātama Nios fisti shinākī chipo Nios õixii. Nãskax inimakōixii.

⁹ “Akka noikaspa faatanãifono fětsafãfe ato raenã faano, nãfo Niospa ato yoikī iskafaxii: ‘Mã ěfe fakefo,’ ixõ ato yoiaino inimakōixikani.

¹⁰ “Fětsa Nios Ifofasharapaiyaino, fetsafãfe ato omiskōimafiaifono, Epa Niospa kexesharakōiano nãskakē inimakōixii.

¹¹⁻¹² “Mã ea Ifofakē fetsafãfe mato ĩchakani, mato omiskōimayanã askatari matoõnoa meka chaka yoikani meka fetsa fetsatapafo. Nã mato chakafaifo keskafakīri mãto xinifãfe nã Niospa meka ato yoixomisfori ato chakafapaonifo. Nãskakē inimasharakãfe eõxõ matori chakafakani kiki. Mã askaito Niospa afara sharafo mato mekexona nai mēranoa mãtonã inõ,” ixõ Jesús afe imisfo ato yoini.

*“Mã tashi keskarata askatari mã pena keskara,”
ixõ a Ifofafo Jesús ato yoini*

(Mr. 9.50; Lc. 14.34-35)

¹³ Anã Jesús ato yoini iskafakī: “Mãfi nono mai anoax tashi keskaraki. Nãskakē shinãkãfe. Tashi sharakē nõ meetiro. Akka tashi sharayamakekai nõ shara meetiroma. Nãskarakai toa pishta fichipaima. Mã paispakē anã nõ pitiroma. Nãskakē nõ potatiro. Nãskarifiyai mã tashi keskara.

Mã nono mai ano isharaino yorafãfe mato òikani inimatirofo. Askafixõ mã Nios anã Ifofasharaya-maito matoõxõ tsõakai tãpitirofoma Niospa meka shara. Mã tashi paispa keskarakẽ mato potatirofo. Iskafakĩ yoitirofo: ‘Mã chakafoki nonoax fotakãfe. Mãkai afaama,’ ixõ yoitirofo.

¹⁴ “Nãskatari mã oa luz peeikai keskarakĩ. Akka pexe rasi mãchi keya mãnãnẽnoax onetiroma. Chai ixõ penakõi nõ õitiro. Nãskarifiai matoõxõ yorafãfe xafakĩa eõnoa nikatirofo. ¹⁵ Nãskafakĩri tsõakai fakishaino õipaifikĩ luz fepotiroma. Tapo kamaki luz õtaxõ kẽsho fepotiroma. Askatamaroko tapo kamaki fomãkĩa nõ õtaxõ tsãotiro a pexe mẽra ikafãfe õisharanõfo. ¹⁶ Nãskarifiai isharakãfe. Mã askaito mato òikakĩ tãpitirofo mã eõnoax xafakĩa isharakẽ. Askata mãto Epa Nios nai mẽra ikano aõnoa yoikĩ iskafaxikani: ‘¡Aicho! Na yorafo Niosnoax isharakõimisfo. Æto Nios sharakõi,’ ixõ yoixikani,” Jesús ato fani yoikĩ.

Jesús ato yoini a Niospa shinãmanaino Moisés keneniõnoa nikasharakõinõfo

¹⁷ Anã Jesús ato yoini: “Mã shinãiraka iskafakĩ: ‘A Moisés Niospa shinãmanaino keneni, askatari a Niospa meka yoimis fetsafãferi kirika kenenifo afo Jesús noko nikamakaspai,’ ixõ mã shinãiraka. Anori shinãyamakãfe. Ækai Moisés feta a Niospa meka yoimis fetsafãfe kenenifo keskara ã potayoi onima. Askatamaroko nã kenenifo keskara ã ato tãpimaxii ã ftoni nai mẽranoax. ¹⁸ Akka ã mato xafakĩa yoi. Ea nikasharakãfe. Nai fe mai keyoyoamano a Moisés yoini keskara tsõa fetsafatiroma. Askatari afaa nõ potatiroma.

Akka mǎ keyokōi mitokomeano, mai fe nai keyoxii. Mǎ afama mīshtifo keyoano nō anǎ Moisés mekari nō yopaxima. ¹⁹ Akka fētsa Moisés meka nikasharayamaxō fetsafori ato meka chaka tāpimanaino nikakaspamisfo a Moisés keneni keskara. Nǎ feronāfake Epa Nios ika ariax anǎ afaa itiroma. Nǎskafekē fētsa Niospa meka nikasharataifakī fetsafori Niospa meka xafakīa yoiāx Epa Nios ika anoax afe xanīfo itiroki. ²⁰ Askano nǎ fariseofo fe a Moisés yoikī kirika keneni keskara ato tāpimamisfo, ‘Nōfi sharakōi,’ ifiamisxakakī Niospa yoini keskara keyokōi nikafoma. Akka a Moisés yoikī keneni keskara nikakōikanaxma tsoa Epa Nios ika ari nokotirofoma,” ixō Jesús ato yoini.

*“Ōitifishkiyamakāfe,” ixō Jesús ato yoini
(Lc. 12.57-59)*

²¹ Anǎ Jesús ato yoini iskafakī: “Mǎ mǎ nikamiskī a Moisés nōko xinifo ato yoipaoni keskara. Iskafakī ato yoini: ‘Tsoa reteyamakāfe. Mǎ fetsa retekē xanīfofo ano mato iyotirofo matori kopikiri retematirofo,’ ixō nōko xinifāfe yoinifo. ²² Mēstekōi anori yoifinikē ē mato meka fetsari mēstekōi yoinō. Ea nikasharakāfe. Fētsa fetsa ĭchaito mī xanīfofo ari iyotiro a omiskōimanō. Askatari fētsa fetsa chakafai iskafakī: ‘Mī afaa tāpiama. Mī tatimakōi,’ faito Niospa a omiskōipakenakafo mēra chiifā mēra potatiro anoax omiskōipakexanō.

²³⁻²⁴ “Nǎskakē mǎ Nios kīfiti pexefā mēraxō mǎ kīfipaikī mǎ iskafaki shināino: ‘Ooa, ē fetsa chakafaa ē raefama,’ ixō shinākī, anǎ Nios kīfixoma

nã mã Nios inãpaifafãinai fetsa ano koshi fo-takãfe. Akiki nokoxõ yoisharafe anã mikiki raenõ. Nãskaxõ anã mã Epa Nios kĩfitiro.

²⁵ “Mã fetsa nimiano matoki oxõ mato iskafatiro: ‘Mĩ ea nimia. ¿Afetĩa mĩ ea kopifaimẽ? Mĩ ea kopifayamaito ẽ mia xanĩfo ano iyoikai,’ mato faito, xanĩfo ano kayoxoma koshi raefakãfe. Akka mã askafayamaino xanĩfo ano mato iyotiro. Mã mato iyoano xanĩfãfe policia yoitiro iskafakĩ: ‘Na feronãfãke fetsa nimiakĩ kopifaamaki, karaxa mẽra ikimafe,’ fatiro. ²⁶ Ẽ mato paraima. Fẽtsa mato karaxa mẽra ikimanano mã fena tseketiroma. Akka nã mã nimia kopifatĩa mã tseketiro,” ixõ Jesús ato yoini.

“Mãto ãfikõima chotapaiyamakãfe,” Jesús ato fani

²⁷ Anã Jesús ato yoini: “Mã mã nikamis a nõko xini Moisés yoini keskara. Iskafakĩ ato yoini: ‘Mãto ãfima chotayamakãfe. Askatari kẽromãri mãto fenema chotamayamakãfe,’ ixõ ato yoini. ²⁸ Nãskara chanĩma. Nãskakẽ ẽri mato yoi, fẽtsa ãfe ãfima õikĩ ãfe shinã mẽraxõ shinã: ‘Ẽ na kẽro chotapai,’ ixõ shinãkĩ ãfe shinã mẽraxõ chotai.

²⁹ “Akka mãto fẽro õikĩ mã chakafatiro. Nãskakẽ afara chaka õiyamakãfe afara chakafaxikakima, nã nõko fero tsekaxõ nõ õitiroma keskafakĩ. Mã mãto chaka xateyamax omiskõipakenakafo mẽra mã katiro. Akka mã mãto chaka xateax mã Nios ika ari kaax mã afe ipaxatiro. Askara shara. ³⁰ Nãskarifikĩ mãto mẽke kayakai aõxori mato afara chakafamakẽ, mextemekãfe. Mã askafax shara mã itiroki. Nãskarifikĩ mãto chaka xatekãfe nã mã mextemea keskaraxõ. Akka mã mãto chaka xateyamax, nã omiskõipakenakafo mẽra mã katiro.

Akka mā māto chaka xateax, Nios ari mā kaax afe mā ipaxatiro. Askara shara,” ixō Jesús ato yoini.

Feronāfake āfe āfi fe enēnātirofoōnoa Jesús ato yoini (Mt. 19.9; Mr. 10.11-12; Lc. 16.18)

³¹ Anā Jesús ato yoini: “Nāskatari Moisés nōko xinifo yoini iskafakī: ‘Fētsa āfe āfi potaxikī a potayoxoma iskafatiro kirika kenexō: “Ē anā mia fi-paima. Ē mia eneikai,” ixō kenexotiro,’ ixō Moisés ato yoini. ³² Akka anori Moisés yoifinikē anā meka fetsari ē mato yoinō. Tsōa āfe āfi chotayamafiano, feronāfake āfe āfi eneano nā kēro feronāfake fetsa fe chotanāi chakanai. Askatari feronāfake fētsa nā kēro fīax chakanai āfe āfikōima chotai,” ixō Jesús ato yoini.

“A mā yoiyomis keskara akāfe,” ixō Jesús ato yoini

³³ Askata anā Jesús ato yoini: “Mā mā nikamis a Moisés nōko xinifo yoini keskara. Ato iskafakī yoipaoni: ‘A mā Nios yoiyomis keskara axosharakāfe. A mā yoiyomis keskara Epa Niospa mā nikakī akka mā ayamano nā chakakōi itiro,’ ixō Moisés nōko xinifo yoini. ³⁴ Akka nānori ato yoifinikē, ēri mato yoisharanō. Nikakapo. Mā fetsafo yoiyomis keskara axosharakāfe. Iskafakī yoiyamakāfe: ‘A ē mato yoiyoya keskara ē axii. Ē mato yoiyoya keskara ē ayamaino Epa Niospa ea omiskōimatiro,’ ixō yoiyamakāfe. Askatari, ‘A ē mato yoia keskara ē akēma keyokōi nai mēraxō ea omiskōimatiro,’ ixō yoiyamakāfe. Akka nai mēranoax Epa Nios xanīfo finakōia iki. Nāskakē anori nō yoitiroma. ³⁵ Askatari, ‘A ē mato yoiyoya keskara ē ayamaino nono mai

anoafãfe ea omiskõimatiro,’ ixõ anori yoiyamakãfe. Keyokõi mai ano Epa Niosnã. Askatari, ‘A ã mato yoiyoa keskara ã ayamaino a Jerusalén anoafãfe ea omiskõimatirofo,’ ixõ anori yoiyamakãfe. Nã Jerusalén nõko xanĩfo finakõi Niosnã. ³⁶ Askatari, ‘A ã mato yoiyoa keskara ã ayamaino ãfe mãpo ea omiskõimatiro,’ ixõ yoiyamakãfe. Akka nõa nõko mãpo shinãxõ nõko foo nõ fetsafatiroma oxo inõ, askatari fiso inõ. Epa Nios fistichi askafatiro. ³⁷ Akka fetsafo parayamakãfe. ‘Ë mia axõikai,’ ixõ axokãfe. Askatari, ‘Ë mia axõima,’ ixõ axoyamakãfe. ‘A ã yoiyoa keskara ã ayamaino afaa ranã ea omiskõimatiro,’ ixõ anori yoiyamakãfe. Mã askara yoikĩ mã chakafai,” ato fani.

*“Tsoa kopiyamakãfe,” Jesús ato fani
(Lc. 6.29-30)*

³⁸ Anã Jesús ato yoini iskafakĩ: “Mã mã nikamiski a nõko xinifo Moisés yoini. Iskafakĩ ato yoini: ‘Fẽtsa mato fero tsẽkaito, kopikiri mã fero tsẽkatiro. Askatari mato piti tẽkeaito, pitiri mã tẽketiro,’ ixõ Moisés yoini. ³⁹ Akka nõko xinifo anori yoifinifono, ã mato meka fetsa yoinõ. Ea nikakapo ã mato yoinõ. Fẽtsa mato chakafayanã mato tapasaito, ‘Takai fetsari ea afe,’ fakãfe mato tãpinõfo mã ato kopiyamaito. ⁴⁰ Fẽtsa mia xanĩfo ano iyoxõ mia rapati fiapaiyaito, inãfe fotanõ. Mĩ chõpari inãfe. ⁴¹ Xanĩfo iyamakĩ soraronõ, ‘Ea pisha chaima foxõikafe,’ mato fafiaito, mã chai foxotiro. ⁴² Akka fẽtsa mato afarafo yõkaito inãkãfe. ‘Ea inãyope,’ mato faito inãfe fiškoyamakãfe,” ixõ Jesús ato fani.

*“Mato noikaspafiaifono mǎroko ato noikǎfe,”
Jesús ato fani*

(Lc. 6.27-28, 32-36)

⁴³ Anǎ Jesús ato yoini iskafakǐ: “Askatari mǎ mǎ nikamis a nōko xinifo yoipaonifo keskara. Iskafakǐ ato yoipaonifo: ‘Mǎto kaifo noikǎfe. Akka a mato noikaspaifo ato kopikiri noikaspakǎfe,’ ixō nōko xinifo yoipaonifo. ⁴⁴ Anori yoifinifono, akka ē mato yoi a mato noikaspaifo ato kopikima ato noikǎfe. Askatari ato axosharakǎfe. Askatari a mato omiskōimamisfo Epa Nios ato kǐfixokǎfe. ⁴⁵ Mǎ askafai Niospa fake mǎ iki. Akka Niospa xini onifani yora chakafoya, yora sharafo ato chax-anō. Askatari oiri imani nǎ yora sharafoya a yora chakafori ato onifaxoni. Nǎskakē mǎri a mato chakafaifoya a mato sharafaifo keyokōi ato noikǎfe. Nǎskax mǎ Niospa fake ikikai. ⁴⁶ Akka a mato noiaifos mǎ ato noia fetsafo noiyamata askarakai sharama. Akka yora chakafo a ato paraxō kori ichapa ato fǐamisfori aska famis. Mǎ askaino Nios matoki inimaima. ⁴⁷ Mato fe yorafos mǎ noia askarakai afaama. Akka a Nios Ifofaafomari nǎskarifiakani aa ranǎri noinǎkani. ⁴⁸ Nǎskakē Epa Nios nai mēraxō yorafo noiai keskafakǐ mǎri yorafo keyokōi noikǎfe. A Epa Niospa shinǎsharamis keskafakǐ mǎri askafakǎfe,” ixō Jesús ato yoini.

6

*“Afaamaisfori ato noikǐ afara ato inǎsharakǎfe,”
Jesús ato fani*

¹ Anǎ Jesús ato yoini iskafakǐ: “Mǎ fetsafo sharafaino, ‘Nǎ feronǎfake sharakōi ea fanōfora,’

ixõ anori shinãyamakãfe yorafãfe ferotaiſi. Mã askaino yorafãfe, ‘Sharara,’ mato fafiaifono, akka Epa Nioskai matoki inimatiroma. Nãskaxõ mato afaa inãtiroma. ² Nã ãa keparanãmisfo keskara iyamakãfe. Afãfe nõko kaifãfe ichanãti pexe mẽraxõ afaamaisfo afara ato inãmisfo, ‘Sharara noko fanõfora,’ ikaxõ. Askatari fofãsakakĩ afaamaisfo ato afara inãfofãsafamisfo, ‘Noko yoisharanõfora,’ ikaxõ. Akka askafiaifono Niospa ato afaa inãxima. ³ A afara yopaifo mã afara inãkĩ tsoa yoyamakãfe tsõa tãpiyamanõ. ⁴ Akka tsõa õiyamaino a afaamaisfo mã ato inãino Epa Nios matoki ini-mani. Nãskaxõ mato afara axosharatiro,” ixõ Jesús ato yoini.

*“Epa Nios kĩfikĩ iskafakãfe,” ixõ Jesús ato fani
(Lc. 11.2-4)*

⁵ Anã Jesús ato yoini iskafakĩ: “Mã Epa Nios kĩfiatĩa a chanĩmisfãfe kĩfimisfo keskara iyamakãfe. Akka afãfe nõko kaifãfe ichanãti pexe mẽraxõ yorafãfe ferotaiſi Epa Nios kĩfimisfo: ‘Noko õinõfora,’ ikaxõ. Epa Nios shinãtamaroko ato õimapaikani. Yorafãfe ato õiaifono askamisfo. Akka Epa Nios atoki inimaima. Nãskakẽ ato afara shara inãxiima. ⁶ Akka mãri ato keskara iyamakãfe. Mã Nios kĩfikĩ tsõa mato õiyamaino nãnoxõ Epa Nios kĩfikãfe. Mãto pexe kene mẽra ikixõ tsõa mato õiyamaino nãnoxõ Epa Nios kĩfikãfe. Akka yorafãfe mato õiyamafiaino Epa Nios fistichi mato nikatiro. Nãskakẽ matoki inimai. Nãskaxõ afara shara mato inãxii.

⁷ “Akka a Nios chanĩmara faafãfema kĩfimisfo keskayamakãfe. Nãfãfe mẽxotaima nã meka fisti yoiri famisfo. ‘Nõ na meka fisti yoirifaito noko

Epa Niospa nikai, ixõ shinãmisfo. Askafiaifonokai Niospa a keskara meka nikapaima. ⁸ Akka mări ato keskara iyamakãfe. Mã Epa Niospa tâpiakĩ mã afara yopaito, mã yõkayoamano. ⁹ Akka mã kifikĩ iskafatiro:

Epa Niosi, mĩ fisti sharafinakõia. Mĩ nai mëra ika. Nõ mia noikõi. ¹⁰ Nai mëra mefe ikafo mĩ ato yoiaito mia nikakõimisfo. Akka nono mai anoxori nã mĩ noko amapaiyai keskara nõ atiro. Na nono mai ano ikafãfe keyokõichi mia Ifofanõfo. ¹¹ Nã pena tii a nõ piyai noko inãfãife nõ afaa yopayamanõ. ¹² Nõ afara chakafaito nõko chaka noko soaxõfe nã noko chakafaifãfe nõ ato raefai keskafakĩ. ¹³ Nokoki Satanás chaka omayamafe, askakimaroko nomakinoa põtafe nõ nikayamanõ, ixõ kifikĩ iskafakãfe.

¹⁴ “Akka fetsafãfe mato chakafaifono mã ato raefai keskafakĩ Epa Nios nai mëranoato mã fetsafo raefai keskafakĩ matori chaka soaxotiro. ¹⁵ Akka mã fetsafo raefayamaito Epa Niospari mato chaka soaxotiroma,” ixõ Jesús ato yoini.

Foni tenemisfoõnoa Jesús ato yoini

¹⁶ Anã Jesús ato yoini iskafakĩ: “Ë mato yoiyonõ. Mã foni tenei oa shinãmitsai keskara mãto femãnã iyamakãfe a ãa keparanãmisfo ikaifo keskai. Afãfe foni tenekani ãto femãnã shinãmitsai keskara ikani yorafãfe ato õikani. Askatari foaromekanima yorafãfe ato õinõfo. Nãskakẽ Epa Niosnoa shinãkanima. Askaifono Epa Nios atoki inimaima. Nãskakẽ ato afaa inãima. Akka mări foni tenei ato keskara iyamakãfe. ¹⁷⁻¹⁸ Akka mã foni tenei mã Nios shinãyanã mã fechokometiro. Askatari fõxti mã foaromesharatiro. Nãskakẽ Epa Nios

fistichi tāpitiro yorafāfe tāpiafomano. Mā askaito yorafāfe tāpitirofoma mā foni teneaito. Akka Epa Nios fistichi tāpitiro. Nāskakē Epa Nios matoki inimatiro. Askatari mato afara shara ināxii,” ixō Jesús ato yoini.

“Epa Nios ika anoxō afara sharakōifo mato mekexona,” ixō Jesús ato yoini

(Lc. 12.33-34)

¹⁹ Anā Jesús ato yoini iskafakī: “Nono mai anoxō afama mīshti ichapa mekeyamakāfe. Mato nakaxa pīaino mā fenotiroki. Askatari chakanai fetsetiro. Askatari yometsofo mātō pexe mēra ikixō mātō afama mīshtifo keyokōi mato fīano mā fenotiro. ²⁰ Akka afama mīshti noitama Nios noikāfe. Nā mato yoini keskara akāfe. Mā akiki nokoaito nā mato afara sharakōi mekexona mato ināxii. Akka ono nai mēraxō afama mīshti mato mekexona, a nakaxa mato pīatiroma. Askatari chakanaima. Askatari anā mātō pexe mēra ikiax tsoa yometsotiroma. ²¹ Akka mātō afama mīshtifo noikī mā shināfafāini. Nā mātō afama mīshtifo mā shināfafāinai keskafakī Niosri shināfafāikāfe, a noikī yonoxosharakāfe,” ixō Jesús ato yoini.

“Nōko ōiti sharakē nō shināsharakōitiro. Akka nōko ōiti chakakē nō shināsharatiroma,” ixō Jesús ato yoini

(Lc. 11.34-36)

²² Anā Jesús ato yoini iskafakī: “Anā ē mato meka fetsari yoinō mā tāpikōinō. Akka nōko fero rafeta nā rāparinī chai chaxai keskarakē, nōko yora shara itiro. Nāskarifiāi nōko fero sharano nō xafakīā ōisharatiro. Nāskatari nō isharakōitiro. ²³ Akka nōko fero chakakē nō ōisharatiroma. Fak-ishkōi itiro. Nāskarifiakī nōko ōiti mēraxō nō

chaka shinākī nō afara chakafamis nō itiro. Akka ōisharakāfe. Mā Epa Nios shināi xafakīa ifiaxō āfe meka kachikiri faxō mā anā xafakīa shinātiroma. Fakish keskara mā itiro,” ixō Jesús ato yoini.

*“Nōko afama mīshti noisharatama nō Nios noisharakōitiro,” Jesús ato fani
(Lc. 16.13)*

²⁴ Anā Jesús ato yoini iskafakī: “Tsōa āfe ifo rafe yonosharaxotiroma. Fetsa noikaspata, fetsa noisharatiro, nā yoiai keskarakōi axotiroma, akka a fētsa amapaiyai keskara axotiroma noikaspatiro. Nāskarifiakī mā kori fisti shinākī mā Nios shinātiroma. Nāskatari Epa Nios fisti shinākī mā kori noitiroma,” ixō Jesús ato yoini.

*“Epa Niospa āfe fakefo kexesharamis,” ixō Jesús ato yoini
(Lc. 12.22-31)*

²⁵ Anā Jesús ato yoini iskafakī: “Anā ē mato yoisharanō. Ea nikasharakāfe. Shināchakayamakāfe. Nō afaa piyamata, afaari nō ayaima iyamakāfe. Askatari afaari nō safeima ixō shināchakayamakāfe. Akka a nō piatokai noko imasharatiroma. Askatari a nō safeatori nōko yora noko imasharaxotiroma. ²⁶ Akka shinākapo. Peyafāfe afaa fanamisfoma. Afaari topimisfoma. Askaxori afaa mekemisfoma. Nāskafekē Epa Niospa ato pimamis. Akka nā peyafō afaayamafoiakē Epa Nios nai mēra ikato ato pimamis. Akka Niospa mato noikī nā peyafō finōmainīfōfā mato kexesharakōimis. ²⁷ Nāskakē, ¿afeskakī mā shināchakaimē? A nō shināchakaitokai

pena fisti noko anã nimatiroma. Nãskakẽ afaa shinãchakayamakãfe.

²⁸ “Askatari iskakĩ shinãyamakãfe: ‘Ooa. ¿Fanĩa ã rapati fitiromẽ safexiki?’ ixõ anori shinãyamakãfe. Akka shinãkapo afeskax charofo foaikamakĩ. Nã charofãfe yonokanima. Askatari xapo toro atirofoma rapati faxikakĩ. ²⁹ Nãskafix charofo sharamĩshti foaikani. Nãskarari xanĩfo Salomón rapati sharafinakõia safefixõ nã charofo finõama. ³⁰ Akka Niospa nafefo sharashtafo onifani. Sharafiano nõ sepakĩ xateano natiro. Nãskaxõ nõ koofatiro. Akka Niospa nafefo finõmainĩfofã mato noikĩ mato rapati safematiro mato kexesharaxõ. Akka mã shinãchakakĩ mã Nios chanĩmara fasharaima. ³¹ Nãskakẽ shinãchakayamakãfe. Shinãkĩ iskafayamakãfe: ‘Ooa. Ë fonãiki a ã piai keyoano, a ã ayairi keyoano koriyaxomari ã afaa safeima,’ ixõ anori shinãchakayamakãfe. ³² Akka nã Nios Ifofaifãfema iskara shinãmisfo. A piai fisti shinãkata, a safepaiyaifori shinãmisfo. Akka Epa Niospa mã mato tãpia afarafo mã yopaito. ³³ Nãskakẽ Nios mãto xanĩfoõnoa shinãkãfe. A Niospa mato amapaiyai keskara nãskara fisti shinãkõikãfe. Mã askafaito afara fetsa mã yopaito Epa Niospa mato inãxii. ³⁴ Nãskakẽ shinãchakayamakãfe. Yoi iskayamakãfe: ‘Ooa. Ë tãpiama penama afara chaka afeskara afiaino. Ë nã keskara tenetiroma,’ ixõ shinãyamakãfe. Shinãkĩ iskafakãfe: ‘Epa Niospa na penata ea kexesharamis keskafakĩ penamari ea kexesharai,’ ixõ nãnori shinãkãfe,” ixõ Jesús ato yoini.

7

“Fetsafo mekafakĩ chakafayamakãfe,” ixõ Jesús ato yoini

(Lc. 6.37-38, 41-42)

¹ Anã Jesús ato yoini iskafakĩ: “Měxotaima fetsafo mekafayamakãfe iskafakĩ yoikĩ: ‘Naato afara chakafakĩ Niospa omiskõimapainõ,’ fakĩ. Akka mã ato askafayamaino Niospari mato mekafatiroma iskafakĩ yoikĩ: ‘Na yorafo chakafo,’ mato fatiroma. ² Akka mãri nãato akai keskafakĩ afara mã chakafaito, matori Niospa omiskõimaxii. Akka mã fetsafo afara inãsharakẽma Niospa matori afaa ichapa inãxima, mã ato afara inãsharakõikẽma. ³ ¿Afeskakĩ ifi pasta pishta fetsa feronaki ikano mã õimẽ, mãroko ifi pasta efapa feostamefixõ? ⁴ Akka, ¿mã shinãimamẽ a mã ifi pasta efapa feostamea? Akka, ¿afeskakĩ mã fetsa iskafaimẽ?: ‘Yamã, ã mia fixonõ a mĩ ifi pasta pishta fero naki ika,’ fakĩ, mãkõi mã kakamepaimis. Mãkai afaa tãpiama. ⁵ Nãskax mã chanĩkõi mã ato parapaimis. Akka ã mato yoinõ ea nikakapo. Akka mãto fero mẽranoa a ifi pastafã mã feostamea tsekayokãfe. Nãskaxõ õisharakĩ, a fetsafo ifi pasta pishta feronaki ika mã tsekaxotiro. Nãskarifikĩ mãto chaka xateyamaxõ mã fetsafo chaka xatematiroma. Akka mãto chaka xatexõ fetsafo mã chaka xatematiro.

⁶ “Ë meka fetsari mato yoinõ mã tãpinõ. Paxta põfe nõ nami shara inãpaifiaino noko keyotiro mifiki. Askatari kochi nõ afara shara inãino peama peamakĩ chakana fatiro. Nãskari fakĩ yorafãfe Niospa meka shara nikakaspakĩ chakafatirofo, Epa Nios chakafakĩ mekafakakĩ. Askaifono Epa

Niospa meka shara anã ato yoipaiyamakãfe,” ixõ Jesús ato yoini.

“Nõ Epa Nios afara yõkaito noko inãtiro,” ixõ Jesús ato yoini

(Lc. 6.31; 11.9-13)

⁷⁻⁸ Anã Jesús ato yoini iskafakĩ: “Nãskakẽ ã mato yoi, afara fichipaikĩ Epa Nios yõkakãfe mato inãi kiki. Fena fena kakĩma manakãfe nã Epa Niospa mato inãitĩa. Nãskakẽ Epa Nios kĩfifafãikãfe mã kĩfiaito mato inãi kiki. Akka nã yõkai Epa Niospa afara shara inãxii. Nãskarifiakĩ fẽtsa afara shara fenaito Epa Niospa fichimatiro. Nãskarifiakĩ fẽtsa Epa Nios kĩfiaito inãsharakõixii.

⁹ “Akka mãto fake mato yoa yõkaito, ¿mã tokiri inãtiromẽ? Maa. Mãkai mãto fake mã askafatiroma. ¹⁰ Askatari, ¿mãto fãke mato foe yõkaito mã rono inãtiromẽ? Maa. Mãkai mãto fake mã askafatiroma. ¹¹ Akka mã chakafixõ mãto fakefo kexesharaxõ afara sharafo mã ato inãtiro. Nãskarifikĩ Epa Nios nai mẽranoato mã afara yõkaito mato kexesharakatsaxakĩ afara sharafo mato inãsharaxii nã nai mẽraxõ mato mekexona.

¹² “Nã mã fichipaiyai keskafakĩ fetsafãfe mato axosharaifono, nãskarifikĩ mãri fetsafo axosharakãfe. Moisés feta a Niospa meka yoimisfãfe nãnori yoinifo kirika kenekakĩ,” ixõ Jesús ato yoini.

Fepoti pishtaõnoa Jesús ato yoini

(Lc. 13.24)

¹³ Anã Jesús ato yoini iskafakĩ: “Meka fetsa ã mato yoinõ. Nikakapo. Fepoti rafe iskarakĩ: Fepoti fetsa pishtaki nã fepoti pishta ikikãfe. Akka

nã fepoti fetsa efapa. Nã fepoti efapato fai efapa kaa. Nãskakẽ nã fai efapato yora ichapa fomisfo a omiskõipakenakafo mẽra. ¹⁴ Akka fepoti pishta ano fai kaa, pishta fekax. Nã fai Nios ano nokoa nã fai atsõ pishtakõi. Nãskakẽ ichapama aõ fomisfo,” ixõ Jesús ato yoini.

*Ifi ãfe fimioxõ nõ tãpitiro afe keskaramãkĩ
(Lc. 6.43-44)*

¹⁵ Anã Jesús ato yoini iskafakĩ: “Õisharakãfe, a chanãifãfe mato paratirofokĩ: ‘Nõ Niospa meka yoimis,’ ixõ mato paratirofo. Afãfe Niospa meka yoimisfomaki. Akka afofi ovejafõ keskarafo fikanax akka ãto shinã mẽra poomã põfefe keskarakõifo. Nãskakẽ ato fishtayamakãfe. ¹⁶ Akka mã tãpitiro afaa afeskafakanimãkai. Akka ifi ãfe fimioxõ nõ tãpitiro afe keskaramãkĩ. Xopa foaikĩ moxaya foaitiroma. Askatari kachafi moxaya foaitiroma. Nãskaxõ nõ tãpitiro moxayafo õikĩ xopakairokokẽ. Nãskarifikĩ nõ tãpitiro kachafimã moxayakẽ. ¹⁷ Akka ifi shara fimi sharaya itiro. Akka ifi chaka fimi chakaya itiro. ¹⁸ Nãskakẽ Ifi shara fimi chakaya itiroma. Ifi chakari fimi sharaya itiroma. ¹⁹ Akka ififo fimi sharaya iyamaito ifãfe reraxõ koofatiro. ²⁰ Nãskakẽ a ato tãpimamisfoõnoa mã ato tãpitiro sharafo iyamakani chakafo itirofo,” ixõ Jesús ato yoini.

*“Akka keyokõifotirofoma Epa Nios ika ano. Fisti rasi fotirofo,” ixõ Jesús ato yoini
(Lc. 13.25-27)*

²¹ Anã Jesús ato yoini iskafakĩ: “Akka yora ichapato yoimis iskafakakĩ: ‘Jesús, mĩ ãfe Ifokõi,’ famisfo. Nãskafikaxõ atirito ea Ifofamisfoma.

Nāskakē ēfe Epa Nios ika ari nokotirofoma. Ēfe Epa nai mēra ikato nā ato amapaiyai keskara akatsaxakakī nāfo ēfe Epa ari nokotirofo afe ipaxakakī. ²² Akka mā mai keyoaino nā onifanifo tii keyokōi Niospa ichanāfaxii. Nā nikakaspamisfo tii omiskōipakenakafo mēra ato potaxii. Nāskakē yora ichapafāfe ea yoikani iskafakakī: ‘Ifo, shināpo. Nō mī aneōxō nō yorafo yoimis. Mī aneōxori nō a niafaka chakafo yorafo mēra nanea nō ato maki-noa potamis. Mī aneōxori nō afama mīshti famis yorafāfe atiroma keskafakī. Noko shināfe, Ifo,’ ixō ea yoixikani. ²³ Askaifono ē ato xafakīa yoixii iskafakī: ‘Mā kai efe yorama. Māfi ato pāramiski. Afara chaka fisti mā famiski. Emakinoax fotakāfe,’ ē ato faxii,” ixō Jesús ato yoini.

*Pe xe rafeōnoa Jesús ato yoini
(Mr. 1.22; Lc. 6.47-49)*

²⁴ Anā Jesús ato yoini iskafakī: “Akka nā ea nikaito nā ē yoiai keskara aki, nā yōra pe xe fakī tāpīxō mai chai pōkixō mai teikī pe xe kishi nīchitiro keskafakī. ²⁵ Akka oi ikaino, pe xe nāmā faka faitiro. Askatari nēfefakī pe xe afeskafatiroma. Nāskakē pe xe paketiro ma mā mai teikōikimāi pe xe kishi niano. ²⁶ Akka nā ē yoiaito ea nikafikī a ē yoiai keskara nikaima, askara yora nā yora tatimato pe xe fakī mashi ano pe xe fatiro keskarakōi. ²⁷ Akka oi ikaino faka faitiro. Askatari nēfefakī pe xe potatiro. Nāskax pe xe chakanatiro. Nāskarifiakī fētsa ēfe meka nikafikī ea nikaima afofi fenoī fetsekani. Nāskakē omiskōipakenakafo,” ixō Jesús ato yoini.

28-29 Nāskata mā Jesús mekai xateano yorafāfe nikakaxō, “¡Kee! Nikakapo. Nato tāpikī finakōia, a Moisés yoikī kirika keneni keskara ato tāpimamisfo keskarama, meka sharakōi nato yoi,” fanifo.

8

Jesús yora rashkishiai sharafani (Mr. 1.40-45; Lc. 5.12-16)

¹ Askata Jesús ato yoikī xateta māchi keya ariax tisirimepakeaito yorafāfe chīfafainifo afe fōkakī. ² Jesús kaino feronāfake isinī iki rashkishi fetseax Jesúski oni. Akiki oxō ratokonō mai chachipakefōfā yoini iskafakī: “Ifo, ea sharafapaikī mī ea sharafatiro,” fani. ³ Askafaino Jesús āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino, a rashkishi fetseai koshikōi sharatani. ⁴ Mā sharano Jesús nīchini iskafakī yoianā: “Mī tsoa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

Jesús sharafani romanō xanīfāfe āfe ina yonaito (Lc. 7.1-10)

⁵ Askafafāini Capernaúm ano kani. Nāno akiki soraro xanīfo nokoni a yonoxomis sharafamapai. ⁶ Nokoxō yoini: “Ifo, a ea yonoxomis isinī iki. Ēfe pexe ano rakax omiskōiferoikima,” fani.

⁷ Askafaino, “Ē kanōkī sharafaxikī,” fani.

⁸ “Ifo, ěkai afama. Akka mī tsoa keskarama. Mī finakōiakī ěfe pexe ano kayamafe. Mī mekapa a ea yonoxomis ea sharafaxōfe nonoxō. ⁹ Akka eari

ĕfe xanĭfĕfe yonomamis. Ĕri sorarofu yonomatiro. ‘Katĕfe,’ ĕ faino karisatiro. Askatari, ‘Ekeki ofe,’ ĕ faino ekeki orisatiro. Nĕskakĕ a ea yonoxomis afara ea axĕfe ĕ faino ea axotiro. Akka mĭ afama mĭшти fatiroki. Mĭ mekapa a ea yonoxomis ea sharafaxĕfe,” ixĕ yoini.

¹⁰ Askafaito nikakĭ a afe foafo Jesŭs ato yoini: “Kee, nikakapo. Na feronĕfake israeliyamafixĕ ea chanĭmara fakĭ finakĕi fetsafo keskarama. Akka Israel anoafĕfe ea iskafamisfoma chanĭmara fakakĭ. ¹¹ Ĕ mato xafakĭa yoinĕ. Na maitio ano ikafo Nios chanĭmara fakanax nĕko xinifo Abrahamnĕ Isaacanĕ Jacobonĕ ichanĕxikani Nios yorafo ixikakĭ. ¹² Akka atiri nĕko kaifo nĕ israelifo Niospa afe yorafo ato imapaifiaino chanĭmara fakanima. Nĕskakanax Nios ika ano nokotirofoma. Niospa ato fakishifĕ mĕra potaxii. Anoax eaiyanĕ fasi omiskĕixikani,” ixĕ Jesŭs ato yoini.

¹³ Nĕskata Jesŭs yoini soraro xanĭfo: “Mĭ pexe ano katĕfe. Mĭ ea chanĭmara faino a mia yonoxomis mĕ sharaki,” fani.

Jesŭs Pedro rayos sharafani

(Mr. 1.29-31; Lc. 4.38-39)

¹⁴ Askata Jesŭs Pedro pexe ano kani. Nĕno Pedro ĕfe rayos yĕxafo yonai oxati kamaki raka ini. ¹⁵ Jesŭs ĕikĭ ĕfe mĕkemĕ ramĕni. Ramĕino ĕfe yona matsirisatani. Mĕ Jesŭs sharafaano anĕ yonanima. Mĕ sharaxĕ fininĕkafĕta Jesŭs pimani.

A isinĭ ikaifo Jesŭs ato sharafani

(Mr. 1.32-34; Lc. 4.40-41)

¹⁶ Nĕskano mĕ xini kaino a isinĭ ikaifo Jesŭski efenifo ato Jesŭs sharafapanĕ. Atiri a niafaka chakafo ato mĕra nanea Jesŭs ĕfe mekapa ato

makinoa pōtapakeni. Keyokōi Jesús ato sharafapani. ¹⁷ Nānori Niospa meka yoimisto Isaías a inōpokoai yoikī kirika kenekī iskafani: “Nō isinī imisno Cristo mā noko sharafaa. Askatari nā noko pāefaifo nomakinoa mā noko potaxona,” ixō Isaías kirika keneni keskara Jesús ani.

A afe fopaimisfoōnoa Jesús ato yoini
(Lc. 9.57-62)

¹⁸ Askata Jesús ōini yorafā rasi akiki feaifāfe. Askaifono aōxō tāpimisfo yoini iskafakī: “Okiri nō iamāfā pokefainō fokāfe,” ato fani. ¹⁹ Akka Jesús kayoamano a Moisés yoikī kirika keneni keskara ato tāpimamis akiki oxō yoikī iskafani: “Maestro, ēri mefe kapai nā mī kai ari ēri mefe kafāsaxiki,” faito, ²⁰ Jesús kemani: “Akka maxoteneroa kiniya, peyafari naayafo akka ēkai pexe yama,” fani.

²¹ Askatari a afe kafāsamis fētsa iskafakī yoini: “Maestro, ea nīchiyofe ēfe epa naito ē maifayotanō. Chipo mia Ifofaxiki,” faito, Jesús kemani: ²² “Iskaratīa ea Ifofafe. Akka nā ea Ifofaafāfema yora nakē maifatirofo,” ixō Jesús yoini.

Jesús nefe yafi iamāfā poo iki meseniaito nishpa fani

(Mr. 4.35-41; Lc. 8.22-25)

²³ Nāskata Jesús kanōanāfānē naneinīkafāni aōxō tāpimisfori afe naneinīfofānifo. ²⁴ Iamāfā pokefainafono atoki nēfefā nokoni. Jesús kanōanāfā xaki mēra rakax oxano nefeyanā iamāfā poo ini. Kanōanāfā faka fospikōini. ²⁵ Askaino aōxō tāpimisfāfe mōinifo iskafayanā: “¡Ifo, mā nō āsaikai! ¡Nō āsayamanō moife!” fanifo.

²⁶ Askafaifono, Jesús ato yoini: “¿Afeskai mā rateimē? Mā ea chanīmara fasharama. Nāskakē mā ratei,” ato fani. Ato askafata, fininākfāta fāsikōi, “¡Nēfe, nishpafe!” fata, “¡Ĵamā, nishpafe!” fani. Askafaino anā Ĵamāfā feroinima. ²⁷ Askafaito ōikani yoinānifo: “¡Kee! ¿Na feronāfake afe keskaramē na nefe feta Ĵamāfānē ato yoiaito nikaifo?” ikanax yoinānifo.

Feronāfake rafeta Gadara mai anoxō niafaka chakafano nanea-fono Jesús ato makinoa potani
(Mr. 5.1-20; Lc. 8.26-39)

²⁸ Askata Jesús okiri Ĵamāfā aōxō tāpimisfo feta pokefainax Gadara mai ano nokonifo. Nāno feronāfake rafe niafaka yōshi chaka nanekanax Jesúski nokonifo kinīfā mēranoax. Nā rafe mesekōi ipaonifo. Nāskakē yorafāfe a ikafo ano tsōa ato finōtiroma ipaoni atoki mesekakī. Nā maiyafo ano nā rafe ipaonifo. ²⁹ Nāskakē Jesús fichikanax fāsikōi fiisiyanā yoinifo: “Mīfi Niospa Fakeki. Akka, ¿mī noko afeskafaiyoamē? ¿Mī noko omiskōimaniyoamē?” Jesús fanifo.

³⁰ Askafaifono chaimaxō kōchifā rasichi pinifo. ³¹ Nāskakē niafaka chakafāfe Jesús iskafanifo: “Mī nā feronāfake rafe makinoa mī noko potaimākai kochifo mēra noko nīchife,” faifono, ³² “Fotakāfe,” Jesús ato fani. Nāskax niafakafo feronāfake rafe makinoax tsekekanax kochifo mēra ikinifo. Nāskakē kochi rasi ichoax Ĵamāfā mēra keyopakeni. Nāskax āsai fetseni.

³³ Askaito ōikani a kochifo kexemisfo ichonifo. Mā pexefo tii ano nokokaxō ato yoinifo: “Nā feronāfake rafe nā niafaka naneafo rafe mā Jesús ato makinoa niafaka pōta. Askatari nōko kochifo mēra

ikimanano keyokōi nãfoya nõko kochifo ãamãfã mēra keyopakeax ãsai fetsea,” ato fanifo. ³⁴ Ato yoiaifono nikakanax keyokōi nã pexefo tii anoax Jesúski fenifo. Akiki nokokaxō yoinifo: “Na nõko mai anoax katãfe,” fanifo.

9

Jesús yora finimisma sharafani (Mr. 2.1-12; Lc. 5.17-26)

¹ Askata Jesús kanõanãfã mēra nanekaini. ãamãfã okiri pokefaini kaax ãfe mai ano nokoni. ² Nãno ikano a feronãfake finimisma yorafãfe akiki efenifo ãfe ratatinĩ ratakaxō Jesús sharafanō ikaxō. Jesús õini shinãifãfe iskakakĩ na finimisma Jesús sharafai kiki ikaxō. Nãskakē a finimisma Jesús iskafani: “Efe yorashta, inimafe. Iskaratĩa mē mia chaka soaxonaki,” fani.

³ Askafaino a Moisés yoikĩ kirika keneni keskara ato tãpimamisfãfe atirito nikakaxō ãto shinã mēraxō shinãnifo iskafakakĩ: “Natokai ato chaka soaxotiro. Nios fistichi ato chaka soaxotirokĩ. Akka nato noko feparapai, ‘È Niosra’ noko fapai,” ixō ãto shinã mēraxō shinãnifo. ⁴ Askaifono Jesús tãpixō a shinãnifo keskara ato yoini: “¿Afeskakĩ mãto shinã mēraxō mã chaka shinãimē? ⁵⁻⁶ Èfi Cristokĩ ē yorafo ato chaka soaxotiro. Akka, ¿ē afaa fatiromē? Mē mia chaka soaxona ē fatiroraka. Askatari ē mia sharafaa ē fatiroraka,” ato fani. “Akka ē mato tãpimanō ē Niosxō mato chaka soaxotiro nono mai anoxō.” Nãskata Jesús a feronãfake finimisma yoini: “Fininãkafata mĩ rakati fifaini mĩ pexe ano katãfe,” Jesús fani.

⁷ Jesús askafaino a finimisma fininākfāta āfe pexe ano kani. ⁸ Askaito ōikani yorafo ratei fet-senifo. “¡Kee, ōikapo! Nios tsoa keskarama. Fāsi sharakōi. Nō ōimisma keskara mā noko rama ōimana. Niospa Yōshi Sharaōxō na feronāfake finimisma Jesús āfe mekapa mā sharafaa. Askatari āfe chakari mā soaxona,” ikanax yoinānifo.

Jesús Mateo ifini aōxō tāpimis inō
(Mr. 2.13-17; Lc. 5.27-32)

⁹ Jesús nānoax kakī feronāfake fisti fichini, āfe ane Mateo,* āfe xanīfo kori fixōi tsaokē. Nāskaito Jesús yoini: “Efe kofe ē mia tāpimanō,” faino Mateo fininākfā Jesús fe kani.

¹⁰ Nāskafaito Mateo Jesús iyoni āfe pexe anoxō pikikakī. Askatari a yora chakafori afe inifo a xanīfo kori fixomisfo. Nāfāfe āa chanīxō kori finōmainīfofā fimisfo inifo. Askatari a yora fetsafo chakafamisfori fekanax akairi mīsa ano Jesús fe tsaonifo a feta pixikakī. Jesúsxō tāpimisfori nāno ato fe tsaonifo ato feta pixikakī. ¹¹ Askaito ōikakī fariseofāfe Jesúsxō tāpimisfo yōkanifo: “¿Afeskakī māto maestro nā ato kori fixomisfo feta piimē, a yora fetsa chakafo fetari pii?” fanifo.

¹²⁻¹³ Askafaifāfe nikakī Jesús ato yoini: “A sharafāfe notoro fenakanima. Akka nā isinī ikaifāfe notoro fenakani. Nāskafakīri yorafāfe yoimisfo iskakakī: ‘Ēkai afaa chakafamisma. Nāskakē ē afaa yopaima ēfe chaka ea soaxonō,’ imisfo. Nāskakē ē ato chaka soaxotiroma. Akka fetsafāfe yoikī iskafaifono: ‘Ē afara chakafamis. Nāskakē a ē imis keskara ē anā ipaima,’ ikaifono

* **9:9** Mateo ane rafeya ipaoni. Āfe ane fetsa Leví.

ẽ ato chaka soaxotiro. Akka nã nõ sharakõi ikaifoõnoax ẽ onima. Akka ẽ oni a yora chakafo ãto chaka ato soaxoxiki. Akka ẽ mato yoipai mã tâpinõ a Niospa ato shinãmanaino iskafakĩ kenenifo: ‘Mã yoinãfo retexõ ea inãxiki mã koamis mãto chaka soapaikĩ, askara ẽ fichipaima. Akka ẽ fichipai fetsafo mã ato noikĩ mã ato sharafaxõaito,’ ixõ kenenifo.

“Akka ẽ onima a yora sharafoõnoax. Askatamaroko a yora chakafoõnoax ẽ oni ato chaka soaxoxiki,” ixõ Jesús ato yoini.

*Nã foni tenemisfofãfe Jesús yõkanifo
(Mr. 2.18-22; Lc. 5.33-39)*

¹⁴ Juan ãfe inafõ fẽkaxõ Jesús yoinifo iskafakakĩ: “Fariseofãfe foni tenekĩ feyafamisfo Nios shinãkakĩ. Nõri askafamis foni tenekĩ Nios shinãkĩ. Akka, ¿afeskakĩ miõxõ tâpimisfãfe foni tenekanimamẽ?” fanifo.

¹⁵ Askafaifãfe Jesús ato kemani: “Feronãfake ãfiyaino, yorafo ano fisti ichanãkaxõ afara fetsa fetsatapafo afeta pitirofo inimayanã, aicho fakakĩ akiki inimakakĩ. Nã kẽromã ãfe fene ano ato fe ikano tsõa foni tenetirofoma inimakakĩ. Akka mã fene rẽteafono afe yorafãfe shinãkakĩ foni tenetiro,” ixõ Jesús ato yoini.

¹⁶ “Tsõa sama fenaya sama xini kishi fatiroma. Nõ askafaino sama fena samama chakanatiro. Nãskatari sama fena fe sama xini isharañtiro. Nãskakẽri nã ẽ mato yoiai keskara mã nikakõixõ a mã ipaoni keskara anã mã itiro ma mãmã ea nikakõiax. A mã ipaoni keskara shinãmakita nãskax mãto yora fena keskara shara itiro. ¹⁷ Nãskarifikã tsõa mãmã fata koiro pisha xini mẽra nanetiro ma nã mãmã nõ faraxakaino toxamãianõ. Nãskakẽ nã

mãmã fata fe koiro pisha chakanatirofo. Akka nã mãto xinifãfe mato yoimisfo keskara fe nã ã mato yoiai keskara õsinãtiroma. Nã ã mato yoiai keskara Niospa meka sharakõi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka õsinãtiroma. Nãskakẽ mã nikapaifi mã shinãsharatiroma. Nãskarifikĩ tsõa mãmã fata koiro pisha xini mẽra nanetiroma nã mãmãnõ faraxakaino toxamãianõ. Nãskakẽ mã mãmã fata fe koiro pisha chakanatirofo. Akka nã mãto xinifãfe mato yoimisfo keskara fe nã ã mato yoiai keskara õsinãtiroma. Nã ã mato yoiai keskara Niospa meka sharakõi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka õsinãtiroma. Nãskakẽ mã nika-paifi mã shinãsharatiroma,” ixõ Jesús ato yoini.

*Jairo fake xotofake mã nakẽ Jesús otofani.
Askatari kẽromãri Jesús rapati mẽeax sharani
(Mr. 5.21-43; Lc. 8.40-56)*

¹⁸ Nãnori Jesús ato yoiaino judeofãfe xanĩfo nokoni. Jesúski nokoxõ xanĩfãfe a nãmã ratokonõ mai chachipakefofã yoini: “Ëfe fake xotofake rama naa. Akka mã kaxõ mã mẽkemã mã ramãino anã ototiro,” xanĩfãfe Jesús fani.

¹⁹ Askafaino Jesús fininãfata aõxõ tãpimisfo fe kani xanĩfo acho. ²⁰ Askatari nãnori kẽro imi nesemisma ini, doce xinia amis imi nesekima. Nã kẽromã Jesús kaito acho kaxõ a kachikirixori ãfe tari kexa ramãkani. ²¹ “Ë ãfe tari mẽeax ã sharatirora,” ixõ ãfe shinã mẽraxõ shinãni. ²² Akka Jesús ifiakekafãta nã kẽro fichini. Fichita yoini: “Yõxashta, rateyamafe. Mã ea chanĩmara faax mã mã sharaki,” Jesús faino nã kẽro imi neserisatani.

²³ Askata mā Jesús nokoax xanĩfãfe pexe mēra ikikaini. Anoxõ Jesús õia yorafãfe ãto xãiti manenifo, yora fetsafo oiakani sheesaifono.

²⁴ Askaifono Jesús ato iskafani: “Nonoax fõtakãfe. Na fakekai naamaki. Oxaki,” ato faito Jesús õsanifo.

²⁵ Ato kãimata xotofake mêtsoinĩfofãnaino koshikõi fininãkafani. ²⁶ Nãskata Jesús nã xotofake naa otoakẽ nikakanax pexefo tii chanifofãsanifo.

Fẽxo rafe Jesús sharafani

²⁷ Nãskata Jesús xanĩfãfe pexe anoax kaino fẽxo rafetari chĩfafainifo iskafayanã fãsikõi: “Mĩ nõko xini David fenaki, noko noife,” fanifo.

²⁸ Askafaifono Jesús pexe fetsa mēra ikikaini. Nãno afe ikiafono Jesús ato yõkani: “¿Mã chanĩmara faimẽ a ã mato sharafatiro?” ato faito, “Èje, Ifo, nõ mia chanĩmara fai,” fanifo. ²⁹ Nãskata ato fero ramãkayanã ato yoini: “Ea chanĩmara faaxfi mã sharaikai,” ato fani. ³⁰ Ato askafaino õisharanifo. Nãskakẽ Jesús ato yoisharani: “Ea nikakapo. A ã mato sharafaa tsoa yoyamakãfe,” ato fani. ³¹ Akka ato anori yoifekẽ nã Jesús sharafaa nã ano ikafo ato yoifofãsafanifo nã rafeta.

Feronãfake mekamisma Jesús sharafani

³² Nã fẽxo rafe imisfo pexe mēranoax tsekefainaino fetsafãfe feronãfake mekamisma Jesúski efenifo Jesús sharafanõ. Niafaka chaka a mēra naneano mekamisma ini. ³³ Jesús mã feronãfake makinoa niafaka chaka potano nã feronãfake mekamisma mekani. Nãskakẽ nã ano ikafo rateyanã yoinãnifo: “¿Kee, õikapo! Na nõko mai Israel anoxõ Jesús akai keskara tsõa õimisma,” ikanax yoinãnifo. ³⁴ Askafaifono fariseofãfe

yoinifo: “Nato nĩafaka xanĩfoõxõ niafaka potai,”
 ikanax yoinãnifo chakafakĩ mekafakani.

Jesús yorafo shinãkõini

³⁵ Nãskakẽ Jesús pexefo tii judeofo ikafo ano kafãساني. Judeofãfe ichanãti pexe mẽraxõ Jesús Niospa meka shara ato yoisharani iskafakĩ: “Isharakãfe. Nios mãto xanĩfokõi ipai kiki,” ixõ ato yoifofãsafani. Nãskaxõ a isinĩ ikaifo fetsa fetsatapafo ato sharafani. ³⁶ Yorafã rasi akiki feaifono õikĩ Jesús ato shinãkõini fekaxteaifãfe õikĩ, nã ovejafo ifomaiskanax tsõa ato kexeyamano fofãsatirofo keskara ato õikĩ. ³⁷ Nãskaxõ a aõxõ tãpimisfo ato yoini iskafakĩ: “Yora ichapafãfe ea nikayamafiaifono ichapatoma ea yonoxokani eõnoa ato yoikakĩ. Nãskakẽ mã Epa Nios kĩfikãfe a yonoxomisfo katonõ eõnoa ato yoinõfo. ³⁸ Akka Epa Nios kĩfikãfe yorafo nĩchinõ ěfe meka ato yoitanofo ea Ifofanõfo,” ixõ Jesús ato yoini.

10

Jesús aõxõ tãpimisfo doce feronãfake ifini

(Mr. 3.13-19; Lc. 6.12-16)

¹ Askata Jesús aõxõ tãpimisfo kenani: “Ekeki fekãfe,” ato faino, akiki foaifono ato yoini aõxõ yorafo sharafanofo, a niafaka chakafo yorafo mẽra nanea ato makinoa potanofo, a isinĩ ikaifo fetsa fetsatapafo aõxõ sharafanofo.

² Nã feronãfake docefãfe ãto anefo iskarakĩ: fetsa Simón. Nã Simón ãfe ane fetsa Pedro. ãfe exto Andrés. Fetsafori ãto ane Santiago, ãfe exto Juan, nã rafe Zebedeo fake ini. ³ Felipe, Bartolomé, Tomás, Mateo, nã Mateo Roma anoxõ xanĩfo kori

fixomis ini. Askatari Santiago fetsa, Alfeopa fake, Tadeori ini. ⁴ Simón fetsa nãato ãfe kaifo feta romanõfo potapaini anã israelifo yonomayamanõfo. Askatari Judas Iscarioteri ifini, nãato Jesús chakafakĩ ato achimani Jesús retenõfo. Nã tii Jesús ifini aõxõ tãpimiskõi inõfo.

Jesús aõxõ tãpimisfo nĩchini Nios Xanĩfoõnoa ato yoitanõfo

(Mr. 6.7-13; Lc. 9.1-6)

⁵ Nãskata Jesús aõxõ tãpimisfo nĩchini ato iskafakĩ yoiyanã: “Nã nõko kaifomafãfe ãto mai ano foyamakani. Askatari nã samãritanõfo ikafo anoriri foyamakani. ⁶ Akka nã nõko kaifo israelifo ato mẽra fotakãfe. Nãfo oveja fenoafo keskarafokĩ. ⁷ Fokaxõ ato yoikĩ iskafatakãfe: ‘Mã chaima nõko Ifo Nios oi kiki nõko xanĩfo finakõia ixii,’ ixõ ato yoitakãfe. ⁸ A isinĩ ikaifo ẽfe sharaõxõ ato sharafatakãfe. Askatari naafono ato otofatakãfe. A rashkishii fetseaifori ato sharafatakãfe. A ni-afaka chakafori ãto mẽra naneafo ato makinõa põtatakãfe. Akka ẽfe shara kaxpa ẽ mato minia afaa ẽ mato yõkama. Nãskari fakĩ, ato kaxpa sharafatakãfe.

⁹⁻¹⁰ “Akka mã kakĩ afaa mã fokiki. Mãto kori foyamata, mãto rapati fetsa foyamata, mãto sapato fetsa foyamata, mãto forosa foyamata, mãto mẽsteti foyamata fakãki, eõxõ ẽfe meka mã ato tãpimani kaikai. Nãskakẽ mã afara yopaito mato inãtirofo mã pinõ a mato nikamisfãfe.

¹¹ “Mã pexe rasi ano nokoxõ nã feronãfãke Nios Ifofasharakõia fenakãfe. A keskara fichixõ ãfe pexe ano iyoxõ Niospa meka ato yoisharaxikaki nã mã kaitĩa. ¹² Nã pexe mẽra ikixõ ato yoikĩ

iskafakāfe: ‘Aicho. Nō mato ōiyoa,’ ato fakāfe. ¹³ Akka mato ifisharaino, mā tāpitiro nā peXe ifāfe afe yorafo ĩkisharamis. Nā mā yoiāi keskafakī Epa Niospa axosharai tanaima shara inō. Akka a mato ifisharayamaifo, afāfe afe yorafo ĩkisharamisfoma. Nāskakē nā mā yoiāi keskafakī Epa Niospa ato axosharaima. ¹⁴ Akka peXe fetsa mēraxō mato ifikaspaifono, a peXe mēranoax mā tseketiro. Askatari peXe rasi mēraxori mato askafaifono, mā anoax katiro. Mā anoax tsekekaikī mātō taekinoa mā mapo taa taa atiro ato ōimakī. Mā askafaino tāpitirofo Nios atoki inimayamaino. ¹⁵ Ē mato paraima yoi. Nā peXe rasi Sodoma anoafō feta Gomorra anoafāfe afara chakakōi fapaonifo. Nāskakē Niospa nā ato omiskōimanaitīa ato omiskōimaxii. Akka nā mato nikakaspaifo nāfo ato omiskōimaki finakōixii,” ixō Jesús ato yoini.

“Mato omiskōimakani kiki,” ixō Jesús ato yoini

¹⁶ Anā Jesús ato yoini iskafakī: “Ōikapo. Ē mato nīchikai nā yora chakafo mēra. Akka nā yora chakafāfe nā poomānā ovejafo pipaitiro keskafakani kiki mato. Mato askafaifono nā poomā onāyakōi keskara ikāfe eōxō tāpisharakāfe. Nā rīfi afaa chaka shināmisma keskafakī māri askara shinākāfe. ¹⁷ Ōisharakaki. Nā yora chakafāfe mato achikaxō āto xanīfofo ano mato iyotirofoki. Nāskakaxō āto ichanāti peXe mēraxō mato koshatirofoki. ¹⁸ Nāskakaxō xanīfofo ano mato iyotirofo eōxō. Akka anoxō na meka shara eōnoa mā ato yoixii. Askatari judeofomari mātō kaifomafori na meka shara eōnoa mā ato yoixii. ¹⁹ Akka mato achikaxō xanīfofo ano mato ināifono shināchakayamakāfe afeskaxō mā ato

yoisharaimākai. Xanĩfofo ano mato iyofaifono Epa Niospa mato shināmanaino mā ato yoisharaxii. ²⁰ Akka mā ato yoi mā mekaima Epa Niospa Yōshi Shara mekai mā ato yoiaino.

²¹ “Nāskatari yorafāfe āto extofo ato achimaxikani, yora fetsafāfe ato retenōfo. Askatari ato apafāferi āto fakefo ato achimakani fetsafāfe ato retenōfo. Fakefāferi āto apa yafi āto afaki ōitifishkikakĩ ato achimakani fetsafāfe ato retenōfo. ²² Mā ea chanĩmara fakē nāskakē eōxō mato yorafāfe noikaspakani. Akka mato noikaspafiaifono mā eōnoax omiskōifikĩ mā ěfe meka nikasharakōiaito ě mato kexesharakōixii Epa Nios fe mā isharapakexanō. ²³ Akka pexe rasi anoxō mato omiskōimanaifono, pexe rasi fetsa ano ichotakāfe. Akka ě mato yoisharanō. Ea nikasharakāfe. Mā israelifāfe pexe rasi anoxō keyokōi mā ato yoiyoamano, ě orisaxii.

²⁴ “Akka a aōxō tāpimisfāfe a ato tāpimamis finōtirofoma. Askatari a yonoxomisfāfe āfe patoro finōtirofoma. ²⁵ Akka a aōxō tāpimisfo a ato tāpimamis keskara ikani. Askatari a yonoxomisfo āto patoro keskara itirofo. Nāskax māri ea keskara ixii. Nāskakē nā ea chakafamisfo keskafakĩ matoro chakafakakĩ finakōixikani. Nāfāfe ea noikaspakakĩ ea yoimisfo iskafakakĩ: ‘Mĩ niafaka yōshi chakafāfe xanĩfo. Mĩ Beelzebú,’ ixō ea yoimisfo. Ě mātō Ifofekē ea askafamisfo. Akka matoro askafakakĩ finakōixikani,” ixō Jesús ato yoini.

Akka Nios fistiki nō mesetiro

(Lc. 12.2-7)

²⁶ Anā Jesús ato yoini iskafakĩ: “Akka mato omiskōimafiaifono, atoki rateyamakāfe. Akka

nã afara one yoifimisfono Niospa ato xafakĩa kãimaxoxii, afarari fomãpaimisfono, nãfori Niospa ato xafakĩa kãimaxoxii. ²⁷ Akka nã ě mato yoimis yorafãfe ato ferotaifi xafakĩa ato yoisharakãfe. ²⁸ Akka mato retepaiifaifono rateyamakãfe. Afãfe mato retefitirofono, akka mãto fero mẽsho afeska fatirofoma. Atoki ratetamaroko, Nios fistiki mesekãfe. Nãato noko retexõ nõko fero mẽsho nã omiskõipakenakafo mẽra potatiro.

²⁹ “Nãskakẽ a yora chakafo retemitsamisfoki atoki rateyamakãfe. Epa Niospa mato kexesharai kiki. Shinãkapo. Peya mĩshti afaayamafekẽ Epa Niospa afo shinãki. Ato namapaiyamaino tsõakai nã peya mĩstifo retetiroma. ³⁰ Akka ě mato yoi, Epa Niospa mãto foo fisti rasi mato tãpikakõia. ³¹ Nãskakẽ rateyamakãfe. Nã peya mĩstifo kexesharamis keskafakĩ, matori Epa Niospa kexesharakĩ finakõiakĩ,” ixõ Jesús ato yoini.

“Akka atiri yorafãfe, ‘Jesús ěfe Ifora’ ea famisfo yorafãfe ferotaifi. Akka atirifãferi, ‘Jesús ěfe Ifomara’ ea famisfo,” ixõ Jesús ato yoini

(Lc. 12.8-9)

³² Anã Jesús ato yoini iskafakĩ: “Yora fetsafãfe ferotaifi, ‘Jesús ěfe Ifora’ ea faifãfe ěri ěfe Epa Nios nai mẽra ika anoxõ, ‘Nafõ efe yoraki’ ě ato faxii. ³³ Akka nã yora fetsafãfe ferotaifi, ‘Jesús ěfe Ifomara’ ea faifãfe ěri, ‘Nafõ efe yorafomara’ ě ato faxii ěfe Epa Nios arixõ,” ixõ Jesús ato yoini.

“Akka atirifãfe ea chanĩmara faifono, atirifãferi ea chanĩmara fakanima,” ixõ Jesús ato yoini

(Lc. 12.51-53; 14.26-27)

³⁴ Anã Jesús ato yoini iskafakĩ: “¿Mã shinãimẽ maitio anoax keyokõi yorafo eõnoax inimanõfo ẽ oni? Maa. Anorima. Akka nã ẽ mato yoiai keskara tsõa anoris shinãkanima. Akka nã ea chanĩmara faifãfe shara shinãifono akka nã ea chanĩmara faafãfema afara fetsa chakafo shinãkani. ³⁵ Akka ãfe apa ea chanĩmara faino ãfe fãke ea chanĩmara fakaspakĩ ãfe apaki õitifishkitiro. Askatari ãfe ãfari ea chanĩmara faino ãfe fake xotofãke ea chanĩmara fakaspakĩ ãfe afaki õitifishkitiro. Askatari ãfe fãfafa yõxafãfe ea chanĩmara faino, ãfe fãfafa naetãfa ea chanĩmara fakaspakĩ, ãfe fãfafa yõxafoki õitifishkitiro. Akka ẽ nai mẽranoax matoki oyamanikẽ askakeranafoma. ³⁶ Eõxõ nãnorifos shinãkanima. Akka fetsafãfe ea chanĩmara faifono eõxõ ato fe yorakõifo noikaspatirofo.

³⁷ “Fẽtsa ãfe apa yafi ãfe afa noikĩ finakõixõ akka ea noikĩ finayamax, ea Ifofamis itiro. Askatari fẽtsari ãfe fake feronãfake yafi ãfe fake xotofake noikõixõ, akka ea noikĩ finayamax ea Ifofamis itiro. ³⁸ Akka fẽtsa yoitiro iskafakĩ: ‘Ea omiskõimafiaifono ẽfe Ifo ẽ potatiroma,’ ixõ yoitiro. Akka fẽtsari yoikĩ iskafatiro: ‘Ea omiskõimanaifono ẽ Jesús Ifofaima,’ ea askafax efe nĩpaxatiroma. ³⁹ Akka fẽtsa iskafakĩ shinãi: ‘Ë Jesús Ifofaito ea omiskõimakanira,’ ixõ shinãkĩ, ẽfe meka kachikiri faax, nã keskara yora naax omiskõipakenaka. Akka fetsa eõnoax omiskõifikĩ ea potaxma nã keskara yora naax efe isharapakenaka,” ixõ Jesús ato yoini.

*Akka fetsafãfe ato sharafaxõaino, Niospa afara shara inãxii
(Mr. 9.41)*

⁴⁰ Anã Jesús ato yoini iskafakĩ: “Akka fetsafãfe mato nikakõikakĩ eari nikakõikani. Askatari fetsafãfe ea nikakõikakĩ ěfe Epa Niosri nikakõikani nãatomãĩ ea nono mai ano ea nĩchinino. ⁴¹ Akka fĕtsa shinãkĩ iskafatiro: ‘Nãatofi Niospa meka yoimiski. Nãskakĕ ĕ ĕfe meka nikasharai,’ ixõ yoitiro. Akka nã Niospa meka yoimis afara shara inãĩ keskafakĩ ari Niospa inãsharaxii. Nãskakĕ fĕtsari shinãkĩ iskafatiro: ‘Nã feronãfake sharaki Niospa meka nikasharamiski. Nãskakĕ ĕfe meka ĕ nikakõĩ,’ ixõ shinãino, nã Niospa meka yoimis afara shara inãĩ keskafakĩ ari afara shara inãsharaxii. ⁴² Fĕtsa ea chanĩmara faxõ ea Ifofakĩ, aato shinãĩ iskatiro: ‘Ĕ Jesús Ifofamis. Nãskakĕ afara shara ĕ axõĩ,’ ixõ shinãkĩ afara shara axotiro. Nãskakĕ ĕ yoinõ, ea nikakapo. Faka pishta mã fetsa ayamakĕ Niospa matori afara shara inãsharaxii,” ixõ Jesús ato yoini.

11

Juan aõxõ tãpimisfo Jesúski nĩchini (Lc. 7.18-35)

¹ Askata Jesús aõxõ tãpimisfo doce ato tãpimaxõ ato nĩchini yorafo Niospa meka shara ato tãpimatanõfo. Jesús mã ato yoikĩ keyoax ari kani, fetsafo tãpimanikai a pexe rasi chaimashta ikafo ano.

²⁻³ Askatari Juan Maotista karaxa mĕra ixõ nikani Jesús Apa Niosxõ yorafo sharafaito. Nãskakĕ tãpisharapaini. Nãskaxõ karaxa mĕraxõ aõxõ tãpimisfo nĩchini Jesús ano. Mã ato nĩchia fõkaxõ yõkanifo: “¿Mĩmĕ Cristo nã Epa Niospa

nokoki nīchiai, askayamai fetsa nokoki oiraka nā nō manai?” ixō yōkatanōfo Juan ato nīchini.

⁴⁻⁵ Mā Jesús ano nokokaxō yōkanifo. Askafai-fono Jesús ato kemani: “Fokaxō Juan yoitakāfe a mā ōiyanā a mā nikafori. Yoitakāfe, mā fēxofāfe sharakaxō ōisharakani kiki, askatari nā chatofori mā sharakanax niafoki, a rashkishiaifori mā sharafokī, a pastofāferi mā nikasharakani kiki, a namisfori mā otoafoki, a afaamaisfāferi Niospa meka shara nikakani kiki afeskaxō Epa Niospa noko ifitiromakī.” ⁶ Nāskaxō ato yoini: “Akka a ea chanīmara fasharakōia afara fetsa shinātama ekeki inimakōitiro,” Jesús ato fani, Juan ina rafe.

Jesús ato yoini Juanoa

⁷ Nā a Juan ato nīchia rafe mā foaifono Jesús yorafo yoikī taefani Juanoa. “¿Afeskakī tsōa istoma anoa Juan ōifokani fonifomē? Juankai nā nēfe tafa pei taka taka akai keskarama. Nāskarifiakī mā mā tāpia Juankai ōiti ranāyama. ⁸ Akka, ¿tsoa ōikai mā kamismē? Ōitsai, feronāfake rapati sharakōi safekē ōikai mā kamisraka. Akka mā mā tāpia a rapati sharakōi safemisfo xanīfofōfāfe āto pexe anoxō rapati sharakōi safetirofo. ⁹ Akka, ¿tsoa ōikai mā kamismē? Nā Niospa meka yoimis ōikai mā kamisraka. Akka chanīma, nā Juan Niospa meka yoimis finakōia, fetsafo keskarama. ¹⁰ Akka nā Juanoa yoikī Isaiás kirika keneni iskafakī:

Mī nai ariax mai ano oyoamano, nā ēfe meka yoimis ē nīchi taefakī mīnona ato yoiaino itipinī sharakaxō mia nikakōinōfo, ixō keneni. ¹¹ Akka ē mato yoi ē mato paraima. Tsōakai Juan finōama. Juan yoimis keskara meka

shara noko tsōa yoimisma. Juanki Nios inimakōimis. Akka fetsafāferi afaayamafikaxō ea Ifofaifono Nios atoki inimakōirikai. Nāskakē Juan Maotista finakōifiano fetsafāfe finōkōiafo Niospa ato ōimis.

¹² “Nā Juan ato matotisa fapanitīa Niospa meka nikanixakakī, iskaratīari yorafo Nios ika ano ikipaikōikani. Iskakī shināmisfo; ‘Nios xanīfo ariax ēri āfe yora ipai afe nīpaxakī. Afaa pishtakai ea nētefatiroma ē āfe yora inō,’ ixō shināmisfo.

¹³ Akka Juan oniyamano taeyoi nā Niospa meka yoimisfo feta Moisésri keneni iskafakī: ‘Nā noko ifimis nōko Xanīfo finasharakōi oxii,’ ixō kenenifo. Akka nā Niospa meka yoimisfāfe kenenifo keskara nānorikōi Juan ato yoini. ¹⁴ Niospa meka yoimisto keneni iskafakī: ‘Ē matoki Elías nīchixii,’ ixō Niospa yoini. Akka mā āfe meka chanīmara fapaikī mā tāpitiro nā Juan Elías keskarari. ¹⁵ Mā ea nikatirokī ea nikakāfe. Ēfe meka mātō shinā mēra nanekāfe,” ato fani.

¹⁶ Nāskaxō anā ato yoini: “Iskaratīa na niyoafo afe keskarafomāki ē mato yoinō mā tāpinō. Nā fakefo āto kaxeti anoax kaxekakī āto yamafo kenatirofo tai tai iyanā. Akka mā āto yamafo nokokanax a ato yamafāfe fichipaiyaifo keskai tsoa kaxesharayamaino ato yoitirofo iskafakakī:

¹⁷ ‘Nō nōko xāiti maneaino akka mā mairamisma. Askatari shināmitsayanā nō fanāikaino mā oiamisma,’ ixō ato yoitirofo. Akka māri nāskariai mā tsoaki inimamisma. ¹⁸⁻¹⁹ Nāskafakīri Juan yafi ea mā mekafai. Juankai pikī finapaimisma nā ōiai pishta pimis, askatari fimi ene pae pishta ayamisma. Nāskakē aōnoa mā yoia iskafakī: ‘Nā

Juan ni afaka yōshi chakaya,’ mā famis. Akka ẽ yorakōi ẽ Niospa Fakekōi piyanã ẽ ayasharamis. Akka mā ea iskafakī yoimis: ‘Jesús ichapakōi piimis, askatari pae ayamis,’ mā ea famis. ‘Nāskax yora chakafo fe rafemis, a romanō xanīfo kori fixomisfo ferī rafemis,’ mā ea famis. Akka ẽ shara imis ea Niospa ea shināmanaino. Juanri shara imis Niospa shināmanaino. Yorafāfe noko ōikī tāpitirofo,” ixō Jesús ato yoini.

*Pexe rasi anoxō Jesús nikakaspanifo
(Lc. 10.13-15)*

²⁰⁻²¹ Askata anori ato yoita Jesús nã pexe rasi anoafō ato yōani iskafakī: “Ooa, Corazin anoafāfe Betsaida anoafō fe, mā omiskōi finakōixii. Akka Tiro anoxō Sidón anoxori nã ẽ mato ōimana keskara, ẽ ato ōimanano āto chaka xatekaxō Epa Nios Ifofakeranafo. ‘Ooa, nō afara chakafamiskī iskaratīa nō anã Nios Ifofai,’ iyanã rāfikaxō āto rapati chapo safekaxō chii māpo raish akeranafo fetsafāfe ato ōinōfo. ²² Akka Niospa Tiro anoafō yafi Sidón anoafori ato omiskōimafiakī ato omiskōimasharaima, akka matoroko omiskōimakī finakōixii. ²³ Akka, ¿nō Capernaúm anoax nō nai mēra kai Epa Nios ari ixō mā shināimē? Maa. Nã omiskōipakenakafo mēra ẽ mato potaxii. Akka yōra atiroma keskara afara shara ẽ mato ispafiano māto chaka mā kai xateama. Akka nã ẽ mato ōimana keskara Sodoma anoafō ẽ ato ōimamiskē āto chaka xatekeranafo. Nāskakē keyokeranafoma. Askatari āto pexefā rasi keyokeranama. ²⁴ Ẽ mato yoinō. Afetīara Epa Niospa nã chanīmara faafoma ato omiskōimani. Nã Sodoma

ano ipaonifo omiskōixikani. Akka māfi omiskōi finakōixii,” ixō Jesús ato yoini.

“Ekeki fekāfe ē mato shināmasharanō,” ixō Jesús ato yoini

(Lc. 10.21-22)

²⁵ Ato askafata Jesús Apa kīfini iskafakī: “Epa, ē mia aicho fai. Keyokōi nai mēranoafoya nono mai anofo mī āto Ifo. Mī sharafinakōi. Akka atirifāfe kirika kene tāpifikaxō mia Ifofakaxoma. Iskafakī shināmisfo: ‘Tsoa fetsakai noko keskarama. Nō tāpikōia,’ ixō shināmisfo. Akka nāfo mī meka mī ato tāpimani. Akka nā kirika kene tāpikaxoma, mia Ifofaifono nāfo mī meka shara mī ato tāpimani, ²⁶ nā mī fichipaiyai keskafakī,” ixō Jesús yoini.

²⁷ Askata anā Jesús ato yoini iskafakī: “Epa Niospa a tāpia keskara eari keyokōi tāpimani, ēmāi āfe Fakekē. Akka tsōakai ea tāpiama, ēfe Epa fistichi ea tāpikōia. Nāskarifikī tsōa ēfe Epa tāpiama, akka eres fisti ē tāpikōia. Akka nā fet-safori ē ato tāpimanaino nāfāferi Epa Nios tāpitirofo. ²⁸ Akka mā shināchakakōikī ea kīfikāfe. Nāskaxō mā ea chanīmara fasharayanā mā ea nikasharaito a mato fekaxtefai ē mato potaxotiro anā mā shināchakayamanō. ²⁹ Akka ea shinākōikī eōxō mā tāpisharakōitiro. Ē mato noikī fenāmāshta ē mato yonomamis tenemasharayanā. Nāskaxō mā anā shināchakatiroma. ³⁰ Akka a ē mato amapaiyai keskara anā fekaxma. Nāskakē anā mātō ōiti fekaxtetiroma,” Jesús ato fani.

12

Nā judeofāfe pena tenetitīa Jesúsxō tāpimisfāfe

*aros keskara metesfenifo**(Mr. 2.23-28; Lc. 6.1-5)*

¹ Askata judeofāfe āto pena tenetitīa Jesús aōxō tāpimisfo fe tarepa kani. Aōxō tāpimisfāfe fonāikakī aros keskara meteskaxō pii fonifo. ² Fariseofāfe ōikakī Jesús yoinifo: “Ōipo, Jesús. Iskaratīa nōko pena teneti. Akka Moisés noko yoini na pena tenetitīa tsōa pishta yonotiroma. Akka mī inafāfe yonokani na aros keskara meteskakī,” ixō yoinifo.

³ Ato askafaifono Jesús ato kemani: “Akka, ĵa nōko xini Davidōnoa kirika kenenifo keskara mā ōimismē David afaa afeska fanimē āfe inafō feta fonāikōikī? ⁴ Nāskaxō Nios kīfiti pexefā mēra ikikaixō a mēranoa pāa ato pikīni fonāikōikī ano afaayamano. Akka nā pāa nā judeofo ato Nios kīfixomisfonā ini. Nāskakē fetsafāfe nā pāa tsōa pitiroma ini. Nānori Niospa Moisés yoifinino akka fonāikōikī David pini a afe rafeafo feta. ⁵ Akka, ĵa Moisés keneni keskarari mā tāpiamamē? Iskafakī yoini: ‘Nios kīfiti pexefā mēra a ato Nios kīfixomisfāfe yonotirofo nā pena tenetitīa. Nāskakē afaa chakafakanima,’ ixō Moisés keneni. ⁶ Nios kīfiti pexefā sharafiano akka ē na pexefā finōkōia. ⁷⁻⁸ Epa Niospa shināmanaino Niospa meka yoimisto Oseas kirika keneni iskafakī: ‘Mā yoināfo inafō retexō ea ināxikī, mā koofamis ea shinākī nā shara. Askafiano fetsafo noikī, mā ato sharafaxōaito ē ōimis nā sharafinakōia,’ ixō kirika keneni Niospa shināmanaino. Niospa noko yoimis keskara mā tāpisharaxō, mā ato yoikī chakafakeranama. Nāskakē ē mato yoi iskafakī, ēfe Epa Niospa ea nāmā nīchini xanīfofinakōi ē inō. Nāskakē ē yoitiro afaa nō atiromakī pena tenetitīa. Ē mato

yoi na ěfe inafāfe akaifo keskara shara,” ixō ato yoini.

Feronāfake mēke yōshiya Jesús sharafani
(Mr. 3.1-6; Lc. 6.6-11)

⁹ Nāskata Jesús nānoax kaax judeofāfe āto ichanāti pexe mēra ikitoshini. ¹⁰ Nāno feronāfake āfe mēke yōshia ini. Nāskakē fariseofāfe Jesús yōkanifo afara chakafaito yōaxikakī. Iskafakī yōkanifo: “Maestro, pena tenetitīa, ¿nō yora sharafatiromē?” ixō yōkanifo.

¹¹ Askafaifono Jesús ato kemani iskafakī: “Mā ovejayaxō mātō oveja kini mēra pakeano, ¿mā pena tenetitīa mā ifirisafatiromamē?” ato fani. ¹² “Akka yorafo sharafinakoīafo, oveja keskarafoma. Nāskakē yorafo nō shinākī pena tenetitīa nō ato sharafatiro. Nāskaxō nō afaa chakafaima. Na pena tenetitīa yorafo nō sharafakī Epa Niospa ōia shara,” ixō Jesús ato yoini.

¹³ Nāskata a feronāfake mēke yōshiya Jesús yoini iskafakī: “Mēshafe,” faino, nā feronāfake mēke yōshiya mēshatanaino āfe mēke sharatani. Nā takai fetsa keskara shara ini. ¹⁴ Nāskata fariseofo mā tsekekanax yoinānifo: “¿Afeskaxō nō Jesús ato achi-matiromē retenōfo?” ikanax yoinānifo.

Epa Niospa shināmanaino Isaías keneni Jesúsnoa a inōpokoai yoikī

¹⁵ Jesús nānoax kani mā tāpiax retepaiyaifono. Nāskakē anoax kaino yorafā rasichi chīfainifo. Akka a isinī ikaifo Jesús ato sharafapani. ¹⁶ Akka ato sharafaxō ato yoini: “Ĕ Niospa Fakekī tsoa yoiyamakāfe,” ato fani. ¹⁷ Nāskarakōi Isaías kirika

keneni Niospa shinãmanaino Jesúsnoa. ¹⁸ Iskafakĩ keneni:

Õikapo. Nakĩa ea yonoxomis ã katoni. Ë aõ noikõ. Ë akiki inimakõ. Ëfe Yõshi Shara ã afe rafemamis. Nã maifotio ano ikafãfe ãfe meka nikasharaifono ã ãto chaka soaxotiro efe yora inõfo. ¹⁹ Nakai yora fetsafo fe feratenãxima. Meka mitsisipato ato yoima. ²⁰ Akka tafa kerexma ã xatexima. Askatari chii ketesharayamaito ã nokafaxima. Askatamaroko ã ketefaxii. Nãskarifikĩ yorafãfe ãfe meka nikapaifikĩ nikasharayamaifono ã ato potaima. Ato potatamaroko ã ato axosharai ea Ifo sharafanõfo. ²¹ Nãskakẽ keyokõ maitio ano ikafãfe yoixikani iskafakakĩ: “Nã fistichi noko ifitiro nõ aõnoax Epa Nios fe nĩpaxanõ,” ixõ yoixikani.

Nãskara Isaías yoikĩ kirikaki keneni. Nãskarakõ nõ õi Isaías keneni.

Yora fetsafãfe, “Jesús niafakaõxõ ato sharafaira,” fanifo

(Mr. 3.20-30; Lc. 11.14-23; 12.10)

²² Askata Jesúski feronãfake fẽxo efenifo. Askatari mekamisma ini. A mẽra niafaka chaka naneano Jesús sharafanõ akiki efenifo. Nãskakẽ Jesús a fẽxo õimasharani, askatari mekamasharani anã mekanõ. ²³ Askafaito õikani yoinãnifo: “¡Keel! Õikapo. Jesús afama mĩshti shara fatiro. Akka, ¿namẽ David ãfe fena nã Epa Niospa katoni, nãmẽ na nõ manai?” ikax yoinãnifo.

²⁴ Askafaifãfe nikakaxõ fariseofãfe yoinifo: “Maa. Natokai Epa Niosxõ niafaka chaka potatiroma. Akka nã niafaka chakafãfe ãto xanĩfo

nā Beelzebúxō ato makinoa niafaka chaka potai,” ikax yoinānifo.

²⁵ Askafaifono Jesús tāpini a shināifo keskara. Nāskaxō ato yoini: “Yorafo paxkanākanax āa ranā retenāi keyotirofo. Askatari pexe rasi anoax āa ranā retenāi keyotirofo. Nāskax isharatirofoma āa ranā retenātirofo. ²⁶ Nāskarifiakī Satanás āfe niafaka chakafo potaxō anā afaa afeska fatiroma.

²⁷ Akka mā ea iskafai: ‘Nato niafaka xanīfoōxō niafaka chakafo ato makinoa potai,’ mā ea fai. Akka ea yoikapo, ¿tsōaōxō mātō inafāfe niafaka chakafo potafomakī? Akka, ‘Niosxō nōko inafāfe niafaka chakafo potafo,’ ixō mā ea yoitiro. Nāskakē mā tāpitiro ēri Niosxō niafaka chakafo potaino.

²⁸ Akka ē niafaka chakafo Niospa Yōshi Sharaōxō ato makinoa potaino mā tāpitiro a Niospa matoki nīchiai mā nokoano. Nāskakē yorafāfe ea Ifo sharafaxii.

²⁹ “Ē anā mato yoinō, nikasharakāfe. Akka, ¿afeskaxō yorafāfe feronāfake mitsisipakōi āfe pexe kene mēranoa āfe rapatifo fīatirofomē? Akka rapati fīakakī achixō metexkere akaxō āfe rapati fīatirofo. Askafakaxō fīaifonokai ato afeska fatiroma.

³⁰ “Akka fetsa efe rafepaikima ea nikakaspai. Akka fētsa ēfe meka nikakaspai ea noikaspai. Nāskakē fetsafāferi ea Ifofaifono fichikaspakani. Askakimaroko emakinoa ato paxkanāfapai Epa Nios Ifofayamanōfo.

³¹ “Nāskakē ē mato yoi. Fētsa afara fetsafo chakafakē Niospa āfe chaka soaxotiro. Askatari fētsa afara chaka yoiaino Niospa āfe chaka soaxotiro. Akka ēfe Yōshi Shara chakafakī mekafaito,

Niospa ãfe chaka soaxonakama. ãto chaka neepakenaka. ³² Askatari fêtsa Niospa Fake yorakõi chakafaino Epa Niospa ãfe chaka soaxotiro. Akka fêtsa Epa Niospa Yõshi Shara mekafakĩ chakafaino, Epa Niospa ãfe chaka soaxonakama. ãto chaka neepakenaka. Nã naitĩari ãfe chaka aõ neepakenaka,” ixõ Jesús ato yoini.

*Ifi ãfe fimioxõ nõ tãpitiro afe keskaramãkĩ
(Lc. 6.43-45)*

³³ Anã Jesús ato yoini iskafakĩ: “Akka shinãkapo. Ifi shara ãfe fimi sharakõi itiro. Akka ifi chaka ãfe fimiri chaka itiro. Ififo ãfe fimioxõ nõ tãpitiro afe keskaramãkĩ. ³⁴ Akka mãfi keyokõi chakakõi, nã rono pae keskarakõi mã. Nãskaxõ meka shara mã yoitiroma mãmãi chakakõixõ. Nã mãto shinãmã mã shinãi keskafakĩ chakai mã mekamis. ³⁵ Nãskarifikĩ yora sharapa meka shara yoitiro, ãfe õiti mëraxomãi shara shinãkĩ. Akka yora chakapari meka chaka yoitiro, ãfe õiti mëraxomãi chaka shinãkĩ. Nãskaxõ nã ãfe õiti mëraxõ shinãi keskara yoitiro. ³⁶ Akka ê mato yoinõ. Fatora penata keyokõi Niospa ato ichanãfai tãpikõixõ ato yoixiki fatofãfe chanĩmara faafomãkĩ, akka fatofãferi nikakaspakanimakĩ. Nãskatari nã shinãtama chaka yoimisfori Niospa ato shinãmaxii kiki. ³⁷ Akka mã mãto mekaxõ mã Nios ispatiro mã isharamãkĩ, askayamai mã isharamamãkĩ. Nãskax isharax mã afe nipanaka. Askatari mã meka chaka yoimisno nã omiskõipakenakafo mëra mato potaxii. Mãto mekapa mato omiskõimaxii,” ixõ Jesús ato yoini.

Yora chakafāfe, “Tsōa atiroma keskara noko is-pafe nō mia chanīmara fanō,” ixō yōkanifo

(Mr. 8.12; Lc. 11.29-32)

³⁸ Askata fariseofo feta a Moisés yoikī kirika kene ni keskara ato tāpimamisfāfe Jesús iskafanifo: “Maestro, nō ōipai tsōa atiroma keskara mī faito,” ixō yoinifo.

³⁹ Askafaifono Jesús ato kemani: “Māfi afara chaka shināyanā mā Nios kachikiri famis. Nāskakē, ‘A tsōa atiroma keskara noko ispafe,’ mā ea fai. Akka nā Jonás ini keskara nā fisti mā ōixii. ⁴⁰ Akka nā Jonás ini keskai ēri askai. Jonás fafīnōa xaki mēra tres nia ini. Nāskarifi ai ēri mai mēra maiax tres nia ixii. ⁴¹ Akka fatora penata nā Niospa yorafo keyokōi ichanāfaitia ato yoixii fatofāfe chanīmara faafomakī, akka fatofāferi nikakaspakanimākai. Nāskakē nā Nīnive anoafāfe mato yoixikani iskafakakī: ‘Jonāspa noko Niospa meka yoiaito nikaxō nōko chaka xatexō nō Niospa meka chanīmara fani. Akka mā Niospa Fake nikafikī mātō chaka mā xatemisma,’ ixō mato yoixikani. Akka ē Jonás finōfekēkai mā ea nikapaimisma. ⁴² Askatari okirinoax nā nafa kēro āto xanīfo ipaoni nōko xanīfo Salomón ōipai chai inoaxkōi oni. Afara sharafo tāpikōia nikaferani oni. ‘Afara shara ea tāpimanō,’ ikax akiki oni. Akka ē nā Salomón ē finōfekē, mākai ea nikapaima. Akka keyokōi mā mai keyoano Niospa noko yoixii fatofomākī sharafo fatoforimākī nikayospafo. Askatari nā kēromā mato yoixii iskafakī: ‘Māfi chakakōifokī. ¿Afeskakī mā Niospa Fake nikakaspamismē? Mātō xanīfo Salomón tāpikōia keskafakī nāato keyokōi tāpikōifiano. Akka

ẽ Salomón nikaikai chaikõi ẽ kani. Akka mākai nã Jesús mato fe ifiakẽ mã nikakaspamis nãato tãpikõifekẽ, ixõ mato yoixii,” ixõ Jesús ato yoini.

Anã niafaka chaka yoraki nanetiro
(Lc. 11.24-26)

⁴³⁻⁴⁴ Anã Jesús ato yoini iskafakĩ: “Ë mato yoinõ meka fetsafaxõ. Niafaka chaka feronãfake makinoax tsekeax kafãsatiro tsõa istoma ano fenafofãfofãitiro ano tsaõxõ tenepaikĩ. Akka tsoa fichixoma niafaka chakata anã shinãtiro: ‘A ẽ anoax tsekeita ano ẽ anã kapai,’ itiro. Mã nokoxõ õia nã feronãfake nã pexe xaka mãtsomea keskara shara ini. ⁴⁵ Nãskakẽ nã nãfaka afe niafaka siete efetiro nã chaka finakõiafo, nãfo nã feronãfake mẽra iki fetsenõ. Nãskakẽ nã feronãfake chaka finakõi itiro a iypaoni keskarama,” ixõ Jesús ato yoini.

Jesús õifekani ãfe afanõ ãfe extonõ fenifo
(Mr. 3.31-35; Lc. 8.19-21)

⁴⁶ Jesús yorafo yoiaino ãfe afanõ ãfe extonõ akiki fenifo afe mekapaikani, pexe emãiti nikaxõ mananifo. ⁴⁷ Fẽtsa yoini: “Mĩ efanõ mĩ extonõ emãiti niafo mefe mekapaikani,” fani. ⁴⁸ Askafaino kemakĩ: “¿Fatomẽ ẽfe efa keskarafo ẽfe exto keskarafori?” ato fani.

⁴⁹ Nãskata a aõxõ tãpimisfo yoini mẽtoxõ: “Nafõ ẽfe efafo keskarafo, ẽfe exto keskarafori ẽ ato õi. ⁵⁰ Akka nã ẽfe Epa nai mẽra ikato ato amapaiyai keskara akaifo nãfofi ẽfe extofo ẽfe chikofori ẽfe efafori,” ixõ Jesús ato yoini.

13

Jesús ato yoini meka fetsafaxõ fimi exe saamis-noa

(Mr. 4.1-9; Lc. 8.4-8)

¹ Askata na pena fisti Jesús pexe mēranoax tsekekaini kaax, ĩamãfã kesemē tsaoni. ² Nãno tsaoano yorafã rasi akiki fenifo, ãfe meka nikai fekani. Akka Jesús kanõanãfã xaki mēra tsoaxõ ato yoiaino nikanifo, ĩamãfã kesemëxõ. ³ Askata meka fetsafaxõ afama mĩshti Jesús ato yoini iskafakĩ: “Feronãfake fistichi fimi exe saafoni ãfe nõxati mēra kēchoxõ fokĩ. ⁴ Fimi exe saafõikaino ranãri fai nēxpakĩa pakeaino a kachikirixori peyafãfe pini. ⁵ Nãskata fimi exe ranãri makexfoki pakei fetseni mai shara anoma. Nãskakē samamakõi fimi exe foaipaini. ⁶ Akka mã foaipaiyaito xinĩ namani, yosipanã, ãfe tapokairoko mai mēra kasharakē. Foaikax, samama nani xinĩ tsasifaano. ⁷ Ranãri fimi exefo moxafo mēra pakei fetseni. Moxafo mēranoax moxafoya foaipaiyaito moxafãfe namani. ⁸ Akka fimi exe ranãri mai shara ano pakeni. Nãskax foaisharax fimi ichapayakõi ini. Fetsa cien fimiya ini, fetsari sesenta fimiya ini, fetsari treinta fimiya ini. ⁹ Mã pachoyakĩ ea nikasharakõikãfe,” ato fani.

Meka fetsafaxõ yorafo yoixõ a aõxõ tãpimisfo xafakĩakõi ato yoini

(Mr. 4.10-12; Lc. 8.9-10)

¹⁰ Nãskata Jesúski a aõxõ tãpimisfo fëkaxõ yõkanifo: “¿Afeskakĩ meka fetsafaxõ mĩ yorafo yoimē? Meka xafakĩa mĩ ato yoimisma,” ixõ yõkanifo.

¹¹ Askafaifãfe Jesús ato kemani: “Akka afeskaxõ Epa Niospa afe yorafo ĩkinãmakĩ ã

mato fisti tãpimanõ. ¹² Akka nã Niospa meka nikasharakõiaifo ãfe Yõshi Shara ãto mẽra naneano nãato ato tãpimasharakõixii kiki. Nãskaxõ mã tãpikĩ finasharakõi. Akka nã nikasharayamaifãfe tãpisharakanamax nãfo fenokõixikani. ¹³ Nãskakẽ meka fetsafaxõ ẽ ato yoi. Akka õifikakĩ tãpikanima. Askatari nikafikakĩ nikasharakanima. ¹⁴ Nãnori a Niospa meka yoimisto Isaías kirika keneni a inõpokoai yoikĩ. Iskafakĩ yoini:

Nikataifafafikakĩ nikakanima. Õifikakĩ tãpikanima. ¹⁵ Nã yorafo ãto mapo kerexkõifo. Askatari ãto pachõ fẽstokõifo. Askatari ãto fero fepoa keskarafõ. Nãskaxõ ẽfe meka chanĩmara fakanima. Nãskakẽ ẽ ãto chaka soaxotiroma, ixõ Niospa yoini keskara Isaías kirika keneni.

¹⁶ “Akka mãkai ato keskarama. Ẽ mato yoia keskara mã nikasharamis. Ẽ mato tãpimanai keskara mã tãpisharakõia. ¹⁷ Shinãkapo. Mã õimis keskara a Niospa meka ato yoimisfo feta a Nios Ifofamis fetsafãferi õipaifikakĩ õipaonifoma. A ẽ mato yoimis keskara nikasharapaifikakĩ nika-paonifoma,” ixõ Jesús ato yoini.

Jesús meka fetsafaxõ fimi exe saamisnoa ato yoini ato tãpimasharakõixiki

(Mr. 4.13-20; Lc. 8.11-15)

¹⁸ Anã Jesús ato yoini iskafakĩ: “Nã ẽ mato meka fetsafaxõ yoiã nã fimi exe saamisfoõnoa ẽ mato yoikai. Nikasharakãfe tãpixikakĩ. ¹⁹ Atiri fimi exe fai kesemẽ pakeaino peyafãfe pinifo. Nãskafakĩri fẽtsa Nios Xanĩfoõnoa nikafikĩ Niospa meka nikasharayamaito, nã Satanás chakata Niospa meka fĩatiro. ²⁰⁻²¹ Akka atiri fimi exe

makex mēra pakeax, foaipafiaito xinī namani, āfe tapo mai mēra ikikēma. Nāskafakīri fētsa taefakī Niospa meka nikai inimayotiro. Akka afara chaka nokoaino anā inimatiroma, anā Nios Ifofayamaino Niospa meka anā āfe shinā mēra nanetiroma. ²² Akka atiri fimi exe moxafo mēranoax foaikax yosinima. Nāskari fakī fētsa Niospa meka nikasharamax, nāskaxō afara fetsa shinākī, āfe shinā mēraxō shināchakakōitiro. Nāskaxō kori ichapakōi noikī, ‘Ē kori ichapayax ē inimatiro,’ ixō shinākī Niospa meka anā shināima. Nāskakē Niospa meka nikafikī afara fetsafo shināino, afaa Niospa axotiroma. ²³ Akka atiri fimi exe mai shara anoax foaikax mā yosiax fimi ichapaya ini, āfe fimi cien ini, fetsari āfe fimi sesenta ini, fetsari āfe fimi treinta ini. Nāskafakīri fētsa Niospa meka nikakōikī Niospa meka nanexō nikasharakōitiro. Akka fētsa Niospa meka nikakōisharakī nā fimi exe cien keskara itiro, fētsari nikasharakōi nā fimi exe sesenta keskara itiro, fētsari nikakōisharakī nā fimi exe treinta keskara itiro,” ixō Jesús ato yoini.

Meka fetsafaxō afara fetsa ato tāpimaxiki anā Jesús ato yoini

²⁴ Anā Jesús meka fetsafaxō afara fetsa ato tāpimaxii ato yoini iskafakī: “Ē mato yoinō nā Nios xanīfokōi ika anoax afe keskara ixikanimākai. Ifokōi faafo afe keskaramākī ē mato anā yoinō. Nā yorafāfe Nios Ifokōi faafāfe fimi exe shara fana keskarafo. ²⁵ Akka tare ifo āfe inafō fe oxano, a ato noikaspamis fakishi kaxō a fana shara ano fana chakafanafaini kani. ²⁶ Akka nā fana shara foaikī pei sharayakōi foaini. Askatari fana chakari

foaini. ²⁷ Nāskata a tare ifoki āfe inafō fokaxō yoinifo: ‘Ifo, fana shara mī tarepa mī fanafiano, akka, ¿fanīax na fana chaka foaikamē?’ ixō yōkanifo.

²⁸ “Askafaifono nā tare ifāfe ato yoini: ‘Nā noko noikaspamisfāfe fanafo rakikīa,’ ato faito āfe inafāfe yoinifo: ‘¿Na fana chaka nō tsekatiromē?’ fanifo. ²⁹ Akka a tare ifāfe ato yoini iskafakī: ‘Maa, fana chaka tsekapaikī fana sharari mā tsekatiro. ³⁰ Nāskanōki. Nā fana sharafoya yosiyonō nā fana shara āfe fimi topiaifotīa, ē mato yoixinō iskafakī: “Na fana chakafo xatekāfe. Xatexō mextexō koaxikaki. Nāskata nā fana sharafo ēfe tapas mēra ea faxoxikakī,” ’ ixō a tare ifāfe ato yoitiro keskafakī, nāskarifakī Epa Niospa mato paxkanāfaxii ea Ifofaafō ē ato ifixii. Akka ea Ifofayamafo chiifā mēra ē ato nīchixii,” Jesús ato fani.

Mostaza exeōnoa yoikī meka fetsafaxō Jesús ato tāpimani

(Mr. 4.30-32; Lc. 13.18-19)

³¹⁻³² Askata anā Jesús meka fetsafaxō ato yoini iskafakī: “Afe keskaramākī Nios xanīfāfe noko īkinā ē mato yoinō. Nā fimi exe mostaza yōra āfe tarepa fanatiro. Akka nā mostaza exe pishatakōi. Akka mā yosiax efapakōi itiro fana fetsafo keskarama. Nāskakē peyafāfe āfe teshpafo ano naa faxō too fatiro. Nāskari fakī taefakī pishta mā Epa Nios Ifofayotiro. Nāskaxō fisti rasichi mā Ifofayotiro. Akka chipo ichapakōichi atirofo Nios Ifofakakī,” ixō ato yoini.

Meka fetsafaxō pāa faraxika keskaraōnoa Jesús ato yoini

(Lc. 13.20-21)

³³ Askata anā Jesús meka fetsafaxō ato yoini iskafakī: “Afe keskaramākī Nios xanīfāfe noko īkinā ē mato yoinō. Nā kēromā pāa fakī levaduraya arinā osixō kamosakano faraxitiro keskara. Nāskarifiakī nō ōitiroma. Yorafāfe Niospa meka āto shinā mēra naneano nō ōiyamafiaino āto ōiti fetsafakanax Nios keskara shara itirofo,” ixō Jesús ato yoini.

Afama mīshtikiri yoikī meka fetsafaxō Jesús ato yoipaoni

(Mr. 4.33-34)

³⁴ Askatari Jesús nā yorafā rasi yoini meka fetsafaxō afara fetsa ato tāpimaxii. Akka meka fetsafaxō Jesús mēxotaima ato yoipaoni. ³⁵ Akka nā Niospa meka yoimisto a inōpokoai yoikī kirika kenekī keskakōifakī Jesús nāskakōi fani. Iskafakī keneni Jesúsnoa yoikī:

Ē ato meka fetsafaxō yoixii. Niospa keyokōi onifanitīa nāskatari a nikamisfoma ē ato tāpimaxii,
ixō Jesúsnoa yoikī keneni.

Jesús nā fana chakafoōnoa ato tāpimani

³⁶ Askata yorafā rasi makinoax Jesús pexe mēra ikikaini. Mā pexe mēra kaano, aōxō tāpimisfāfe anā yōkanifo ato yoisharanō. “Ifo, meka fetsafaxō mī noko yoia nā fana chakaōnoa nō tāpiama. Anā noko xafakīa yoife nō tāpisharanō,” ixō yoinifo.

³⁷ Askafaifono Jesús ato kemani: “A fana shara fanamisfo keskara ěkīa,” ato fani. ³⁸ “Akka a

tare ě yoiai mǎ tǎpitiro nǎ maitio ě yoi. Akka nǎ fimi exe shara ě yoiai nǎ Nios Ifofamisfo ě yoi. Akka nǎ fana chakafo ě yoiai nǎ Satanás ifofamisfo ě yoi. ³⁹ Akka nǎ noko noikas-pamisto fimi chakafana ě yoiai, a Satanás ě yoi. Akka nǎ fimi exe topiaifo ě yoiaito mǎ nikai, mǎ mai keyoaino ě yoi. Akka a fimi exe topimisfo ě yoiaito mǎ nikai, nǎ Niospa áfe ájirifo ě yoi. ⁴⁰ Nǎ fana chakafo xatekaxō chīi koatirofo keskai, nǎskarifaxikani nǎ omiskōiai nokoaitīa omiskōixikani mǎ mai keyoaino. ⁴¹⁻⁴² Nǎskarifaxī ěfe ájirifo ě nīchixii a afara ato chakafamamisfoya a afara chaka tǎpimisfori ato chii xoisai mēra ato potanōfo anoax oiayanǎ omiskōipakexanōfo. ⁴³ Akka nǎ Niospa meka nikasharakōiaifo, Epa Nios ika anoax nǎ xinī chaxai keskara shara ixikani. Mǎ pachoyakī ěfe meka nikasharakī mǎto shinǎ mēra nanekǎfe,” ato fani.

*Afara sharakōi oneaōnoa yoikī meka fetsafaxō
Jesús ato tǎpimani*

⁴⁴ Anǎ Jesús ato yoini iskafakī: “Ě mato yoinō nǎ Nios xanīfokōi ika anoax áfe keskara ixikanimǎkai. Feronǎfǎke tare ano yonokī orokī afara sharafinakōia fichixō nǎ fichia ano anǎ oneni. Nǎskaxō áfe afama mīshti keyokōi ato minixō mǎ kori fixō nǎ mai fini nǎ afara sharakōi áfenǎ inō. Nǎskarifaxī mǎ Nios Ifokōifapaikī mǎ fichikōipaitiro,” ixō Jesús ato yoini.

*Makex oxo fakkai fakkaisai keskaraōnoa áfe ane
perlaōnoa, meka fetsafaxō Jesús ato tǎpimani*

45-46 Anã Jesús ato yoini iskafakĩ: “Ë mato yoinõ nã Nios xanĩfokõi ika anoax afe keskara ixikan-imãkai. Yora fistichi fenafofãfofãimis perla ato inãxii. Akka nã perla sharafinakõia mã fichixõ ãfe afama mĩshti keyokõi ato minixõ kori fixõ nã perla sharakõi fini. Nãskarifiakĩ nõ Epa Nios Ifofasharapaikĩ nõko afama mĩshtifo nõ shinãmakitiro Epa Niosmãi sharafinakõikẽ,” ixõ Jesús ato yoini.

Anã meka fetsafaxõ riniõnoa Jesús ato tãpimani

47 Anã Jesús ato yoini iskafakĩ: “Ë mato yoinõ nã Nios xanĩfokõi ika anoax afe keskara ixikan-imãkai. Nã rini faka mẽra potexõ foe fetsa fetsa-tapafo fitirofo keskara ixikani. 48 Akka nã rini mã foe fospikõiano, nã rinipa fimisfãfe faka ketokonõ rini ninifotirofo. Faka ketokonõ tsoaxõ fofo katotirofo. Nã sharafo fẽta mẽra nanekaxõ nã chakafo potatirofo. 49 Nãskarifiaxii nõko mai keyoaino. Nãskatari Niospa ãfe ãjirifãfe noko paxkanã faxii nã chakafoya nã sharafo. 50 Akka nã chakafo nã chii xoisai mẽra ato potaxii. Nãnoax oiayanã omiskõipakenakafo,” ato fani.

Afara fena sharakõi yafi afara shara xiniõnoa Jesús ato yoini

51 Nãskaxõ Jesús ato yõkani: “¿Nã ã mato yoiai keskara mã mã nikaimẽ?” ato faito, “Ëje, a mã noko yoiai nõ nikai,” faifono anã Jesús ato yoini: 52 “Akka pexe ifãfe pexe xaki mẽra ãfe afara shara onekatsaxakĩ nã fena yafi nã xini ato ispatiro. Nãskarifiakĩ a Moisés yoikĩ kirika keneni keskara ato tãpimamisfãfe mã Nios Ifokõi faifono, Nios xanĩfoõnoa ato yoitirofo. Akka meka xiniõxõ meka fena sharari mã tãpitiro,” ato fani.

Jesús Nazarete anoxō nikakaspanifo
(Mr. 6.1-6; Lc. 4.16-30)

⁵³ Askata Jesús mā meka fetsafaxō ato yoikī keyoax nānoax kani. ⁵⁴ Mā kaax āfe mai anokōi nokoni. A judeofāfe āto ichanāti pexe mēraxō ato yoikī taefani ano. Nānoxō yorafāfe iskafanifo: “¡Kee, nikakapo! ¿Fanīxō iskara tāpixō yoimē askatari nā tsōa atiroma keskara fai? ¿Fanīxō iskara tāpīamē?” fanifo. ⁵⁵ “Nā mīsa famisto fakeki. Āfe afa María. Āfe extofo mā nō ōimis. Santiago ikaino, José ikaino, Simón ikaino, Judas ikaino, nāfo āfe extofo,” fanifo. ⁵⁶ “Āfe poifori nofe imisfo. Nōfi Jesús tāpia. Nākai afama. Akka, ¿afeskaxō afama mīshti fatiromē?” ikax yoinānifo.

⁵⁷ Nāskakē nikakaspanifo. Akka Jesús ato yoini iskafakī: “Keyokōi nā maitio anoxō Niospa meka yoimis nikatirofo. Akka nā āfe maikōi anoxō nikapaitirofoma. Nāskakē mā ea nikakaspamis,” ixō ato yoini.

⁵⁸ Nāskakē anoxō afama mīshti ato ōimanimā tsōakairoko nikaito.

14

Juan Maotista nani
(Mr. 6.14-29; Lc. 9.7-9)

¹⁻² Nāskatari Galilea anoa nā xanīfo Herodes ini. A Jesús afama mīshti faito nikaxō āfe ināfo yoini iskafakī: “Akka nā Juan Maotista ē ato textemayamea mā anā otoa. Mā otoxō tsōa atiroma keskara afama mīshtifo fai,” ixō shināni.

³⁻⁴ Akka Herodes Juan reteyoamano Juan yōani iskafakī: “Xanīfo Herodes, mī exto Felipe mī āfe āfi Herodías mī fīa. Askara chakakōi,” nāskafani.

Nāskakē Herodes akiki ōitifiškini. Nāskaxō āfe sorarofō achimani karaxa mēra ikimaxii.

⁵ Akka Herodes Juan retepaifi yorafoki meseni yorafāfemāi chanīmara faifono Juanmāi Niospa meka ato yoimiskē. Nāskakē Herodes shināni iskafakī: “Ē Juan retekē eari yorafāfe retetirofo,” ixō shināni. ⁶⁻⁷ Akka Herodes āfe cumpleño ikaino, yorafo ato ichanāfani. Ichanāfono nā Herodías fake xomaya ares mairani yorafāfe ferotaifi ato inimamai. Nāskakē Herodes yoikī iskafani nā xomaya yorafāfe ferotaifi, “Mī afara fichipaiyai keskara ea yōkafe ē mia inānō,” ixō yoini. ⁸ Nāskakē nā kēro xomayato āfe afa ano kaxō yōkani iskafakī: “¿Ē afaa Herodes yōkatiromē?” faito āfa yoini iskafakī: “Juan Maotista āfe mapo textexō ea sapaki rataxō ea fexōfe fafe,” fani.

⁹ Askafaito nikai xanīfo Herodes shināmitsani. Shināmitsayanā āfe shinā mēraxō shināni iskafakī: “¡Ooa! Ē Juan ato textemapaima. Akka yorafāfe nikaifono mē na kēro xomaya yoia. Nāskakē ē Juan ato textemapaiyamafikī ē ato textemani,” ixō shināni. ¹⁰ Nāskaxō xanīfāfe āfe sorarofō yoini: “Juan textexō āfe mapo ea fixotakāfe,” ixō yoini. ¹¹ Ato askafaino fōkaxō sorarofāfe Juan textekaxō āfe mapo sapaki rataxō fenifo. Fēkaxō nā kēro xomaya inānifo. Nāatori āfe afa ināni.

¹² Nāskakē Juan inafō fēkaxō āfe yora fōkaxō maifanifo. Mā askafakaxō Jesúski nokokaxō yoinifo.

*Jesús cinco mil feronāfakefo ato pimani
(Mr. 6.30-44; Lc. 9.10-17; Jn. 6.1-14)*

¹³ Askata Herodes sorarofu Juan textemana nikai Jesús ares fisti kani kanōanāfānē tsōa istoma ano. Mā Jesús ato makinoax kaa nikakani pexe rasi anoax yorafā rasi fāi fonifo. ¹⁴ Mā kanōanāfā makinoax fotoxō akiki yorafā rasi foaito fichini. Ato ōikī ato shinākōini. Nāskaxō a isinī ikaifo ato sharafapani.

¹⁵ Mā yātapakeaino aōxō tāpimisfo akiki nokokaxō yoinifo: “Mā yātapakei kiki nono afaamakī yorafo nīchife a piaifo fitanōfo pexe rasi anoafu,” ixō yoinifo.

¹⁶ Askafaifono Jesús ato kemani: “Maa. Fokanima kiki. Māroko ato pimakāfe,” ato faito, ¹⁷ kemanifo: “Nō nono cinco pāaya, askatari foe rafes,” fanifo.

¹⁸ Askafaifono Jesús ato yoini: “Ea fixotakāfe,” ato fani.

¹⁹ Nāskaxō yorafā rasi yoini fasi ano tsaonōfo. Askata foe rafe yafi cinco pāa tsofaxō nai fois-inīfofā Apa Nios kīfini iskafakī: “Aicho, Epa, mīōxō ē ato pīmai. Mī sharakōi,” fata, pāa kaxketa foe rafeya osixō aōxō tāpimisfo ināni a yorafo ato ināketsanōfo. ²⁰ Nāskax pīkanax māyakōinifo. Akka nā chetefaafo doce fēta fospini. ²¹ Nā piaifo cinco mil feronāfakefos ini. Kērofāferi fakefo feta pinifo.

Jesús ĩamāfā femākīa kani
(Mr. 6.45-52; Jn. 6.16-21)

²² Mā cinco mil yorafo pimata Jesús aōxō tāpimisfo yoini iskafakī: “Kanōanāfānē nanekāfe, okiri ĩamāfā pokefaitaxikākī,” ixō ato yoini. Jesús kayoxoma yorafo nīchiaino aōxō tāpimisfo fonifo.

²³ Mā yorafo nīchita, māchi keya ari arese kani

arixō Apa Nios kīfikai. Mā fakishaino, ares fisti ano ini. ²⁴ Akka a aōxō tāpimisfo kanōanāfānē mā chai foafono, nēfefaino ĩamāfā poikī ato katimafani. ²⁵ Akka mā penaino Jesús ĩa femākīa atoki kaito tsōa tāpinima. ²⁶ Nāskata tāpikanamax aōxō tāpimisfo Jesús ĩamāfā femākīa kaito fichikanax tai tai iyanā ratekōinifo, niafakara ikanax.

²⁷ Askaifono Jesús ato yoini: “Rateyamakāfe, ēki,” ato fani.

²⁸ Ato askafaino Pedro kemani: “Ifo, mīmākī eari kenafe ēri ĩamāfā femākīa kanō mia ari,” Pedro fani.

²⁹ “Ofe,” Jesús fani. Nāskakē Pedro kanōanāfā makinoax fotopakekafā ĩamāfā femākīa Jesús ari kani. ³⁰ Kapaifi nefeaito ōi nefe kerexkōi mei mesekōini. Nāskakē ĩamāfā mēra ikipakekafakī fāsikōi kenani: “¡Ifo, ea ifife!” fani.

³¹ Askaito Jesús koshikōi āfe mēke achixō yoini: “Mīkai ea chanīmara fasharama. ¿Afeskakī mīa chanīmara faimamē?” ixō Jesús yoini.

³² Askata nā rafe kanōanāfā mēra naneinīfofanaifono nefe nishpatani. ³³ Nāskakē nā kanōanāfā mēra naneafāfe Jesús nāmā ratokonō mai chachipakefōfā yoinifo: “Chanīma, mīfi Niospa Fakeki,” ixō yoinifo.

Jesús Genesaret anoafo a isinī ikaifo ato sharafani

(Mr. 6.53-56)

³⁴ Akka ĩamāfā pokefaikani Genesaret mai ano nokonifo. ³⁵ Nāskata nā ano ikafāfe yorafāfe Jesús tāpirisafanifo. Nāskakē nā chai ikaforti ato yoinifo akairi tāpinōfo. Nāskakē a isinī ikaifo Jesúski efenifo. ³⁶ Nāskakē Jesús yōkanifo: “¿Nō mia tari

kexa maikiri pishta ramākatromē nō sharaxiki?” fanifo. Nāskakē Jesús tari ramākanax sharai fet-senifo.

15

Jesús ato yoini afeskai yorafo chakafomakī
(Mr. 7.1-23)

¹ Askata fariseofo fe a Moisés yoikī kirika keneni keskara ato tāpimamisfo Jerusalén anoax Jesúski fēkaxō yōkanifo: ² “¿Afesakai na mīōxō tāpimisfo a nōko xinifo ipaonifo keskakanimamē? Akka a nōko xinifāfe yoinifo keskara tāpifikaxō pixikakī mechokomekeranafo,” ixō yoiaifāfe Jesús ato ke-mani:

³ “Akka, ¿afeskakī māri mātō xinifo ipaonifo keskara mā tanapaimē? Nāskaxō a Niospa yoini keskara mā nikatama nā mātō xinifāfe yoimisfo keskara mā nikamis. ⁴ Akka Epa Niospa yoikī iskafani: ‘Mātō epa yafi mātō efa nikasharakāfe. Akka a āto apa yafi āto afa chakafaifo ato retemakāfe,’ ixō Niospa yoini. ⁵⁻⁶ Nānori Niospa yoifinikē māfi ato mēstekōi nofe yorafo mā ato tāpimamismaki. Akka mā ato yoimis iskafakī: ‘Mātō epa yafi mātō efa mā yoikī iskafatiro: “Epa, na kori ē mia inākerana. Nāskafixō mē kori keyoa ē Nios inākī. Nāskakē ē mia anā afaa inātiroma,” ixō mā ato yoitiro. Nāskaxō mātō epafo mā shināmākīa keskara mā itiro,’ ixō mā ato yoimis parakī. Askafixō mā ato tāpimasharamisma. A kirikaki yoikī Niospa meka kenenifo anori mā yoimisma. Nā mātō xinifo ipaonifo keskara fisti mā tanamis. A Niospa yoini keskara mā akima. ⁷ Māfi keparanāmiski. Matoōnoa yoikī Niospa

meka yoimisto Isaías kirika keneni chanĩmakõi iskafakĩ:

⁸ Nã yorafãfe eõnoa yoisharafikakĩ ãto shinã mēraxõ ea shinãkõiafoma. ⁹ Æa kaxpa ichanãkanax fanãimisfo ea kĩfiyanã. A ato tãpimanaifo yorafãfe shinã keskarafõ. Akka askarakai Niospa shinãma, ixõ Isaías keneni, Niospa shinãmanaino.”

¹⁰ Nãskata Jesús yorafo kenaxõ ato yoini iskafakĩ: “Ea nikasharakõikãfe tãpisharakõixikakĩ ã mato yoinõ. ¹¹ Na mã piaito choshta keskara mato imatiroma. Askatamaroko yorafãfe ãto shinã mēraxõ chaka shinãkani, askatari chakai mekai-fono choshta keskara Niospa ato õi,” Jesús ato fani.

¹² Askata aõxõ tãpimisfo fõkaxõ Jesús yõkanifo: “Ifo, ¿mĩ tãpiamamẽ fariseofo õitifishkikani nã mĩ yoiaito nikakani?” ikaxõ yoinifo.

¹³ Askafafono Jesús ato kemani meka fetsafaxõ: “Tare ifãfe afara chakafo fanatiroma. Askatamaroko a chaka foaikaino tsekaxõ potatiro. Nãskarifikĩ ãfe Epa nã nai mēra ikato afarafo fanayamaxõ, ãfe tapo tsekaxõ potaxii anã afaa inõma. ¹⁴ Akka fariseofo nikayamakãfe. Nã fẽxo keskarafoki. Akka fẽxo afe fẽxo iyopai xato mēra paketiro. Nãskarifiakĩ nã fariseofãfe Niospa meka tãpikaxoma fetsafo tãpimatirofoma. Nãskakẽ ato fe Nios ari nokotirofoma,” ixõ Jesús ato yoini.

¹⁵ Ato askafaito Pedro Jesús yoini: “A na mĩ yoia keskara meka fetsafaxõ noko yoisharafe nõ tãpisharanõ,” fani.

¹⁶ Askafaito Jesús kemani: “¿Afeskakĩ mãri mã nikasharaimamẽ? ¹⁷ Akka nõ afara piano nõko ato mēranoax payokomeano nõ aya safatiro.

Nāatokai mato chakana fatiroma. ¹⁸ Akka a mātō shināmā shināxō mā afara chaka yoiaino nāato mato chakana fatiro. ¹⁹ Akka yorafāfe afara chakafakāī āto shinā mēraxō chaka shinātirofo, ato retetirofo, askatari āto āfima chotatirofo, askatari kēro fetsa kaxefatirofo, askatari yometstirofo, askatari chanītirofo, askatari ato īchatirofo. ²⁰ Akka mechokomexoma mā piaino Epa Niospa choshta keskara mato ōima. Akka yorafāfe āa shinākaxō afara chakafatirofo. Nāskakē Epa Niospa ato ōi choshta keskara,” ixō Jesús ato yoini.

*Xotofake judeoyamafixō Jesús chanīmara fakōini
(Mr. 7.24-30)*

²¹ Askata Jesús aōxō tāpimisfo fe kani nā pexe rasi Tiro fe Sidón chaimashta ano. ²² Askata kēro fisti Canaán mai ano ikatsaxakī judeo kaifoma Jesús ano kani. Kaxō fāsikōi yoikī kenani iskafakī: “Ifo, mī David fenaki, ea shināfe. Ēfe fake xotofakeshta niafaka chakata omiskōimamiski,” ixō yoini.

²³ Askafaito nikafikī Jesús kemanima. Nāskakē āfe inafāfe fōkaxō yoinifo: “Ifo, na kēro yoife katanō. Nocho okī noko fekaxtefafei kiki. Fāsikōi fiisiki kiki,” fanifo.

²⁴ Askafaifono Jesús ato yoini: “Ēfe Epa Niospa ea nīchini judeofos ano, nāfo oveja fenoa keskarafō. Akka yora fetsafō ano ea nīchinima,” ato askafani.

²⁵ Akka nā kēro Jesús nāmā ratokonō mai chachipakefōfāyanā iskafakī yoini: “Ifo, ēfe fake ea sharafaxope,” fani.

²⁶ Askafaino Jesús kemani meka fetsafaxō: “A fakefāfe piai fīaxō nō paxta inā, askarakai sharama,” fani.

²⁷ Jesús askafaito nā kēromā kemani: “Ēje, Ifo. Akka paxtafāfe pitirofo a ifāfe piai āfe potofō mīsa nāmā keyo pakeaito,” fani.

²⁸ Askafaito Jesús yoini nā kēro: “Mī ea chanīmara fakōini fetsafo keskarama. Akka nā mī ea yoiāi keskara ē mia axonō,” ixō Jesús nā kēro yoini. Askafaino āfe fake xotofake shararisatani.

Jesús yora ichapa sharafani

²⁹ Askata Jesús anoax aōxō tāpimisfo fe kaax ĩa Galilea kesemē nokoni. Nāskata machi keya māpefainax tsaoni. ³⁰ Nāno yorafā rasi akiki fenifo. Nā isinī imisfo akiki efenifo Jesús ato sharafanō. Fetsa chāto ini, fetsari fēxo ini, fetsari mifi yōshia ini, fetsari mekamisma ini. Nāskakē fetsa fetsa-tapafo a isinī ikaifo Jesús keyokōi ato sharafani.

³¹ Ato sharafaino ōikani yorafo yoinānifo: “¡Keel Ōikapo. Iskarakai nō ōimisma. Nā mekamisfoma mā mekakani. A mifi yōshiafori mā sharafo. Nā chatofori mā nisharakani. Nā fēxofāferi mā ōisharakani. Jesús afama mīshti fatiro. Akka nōfi israelifokī nōko Nios fāsi sharakōi,” ikanax yoinānifo.

Jesús cuatro mil feronāfakefo pimani (Mr. 8.1-10)

³² Askata Jesús aōxō tāpimisfo kenaxō yoini: “Ē na yorafo shinākōi, nono tres nia mā efe ikafono, nonoxori afaa pikanima. A piaifo mā keyoa. Akka afaa pimaxoma āto pexe ano ē ato nīchiano

fonãikani afaa pikanaxma fai nẽxpakĩa paketirofo,” ixõ Jesús ato yoini.

³³ Akka ato askafaino aõxõ tãpimisfãfe kemanifo: “Akka, ¿afeskaxõ a nõ piari nõ fichitiromẽ na yorafo ato pimaxikĩ nono tsoa ikama?” fanifo.

³⁴ Askafaifono Jesús ato yõkani: “¿Afe tii mã pãayamẽ?” ato faito, “Siete pãa pishta, foe ichapamashtari,” fanifo.

³⁵ Nãskata nã yorafo nãmã tsaonõfo Jesús aõxõ tãpimisfo ato yoini. ³⁶ Nãskata Jesús siete pãa yafi foeri tsofaxõ Apa Nios kĩfini: “Aicho Epa, miõxõ ã ato pimaikai. Mĩ fãsi sharafĩnakõiakĩ,” fata, pãa kaxketa, foeri tekenãfaxõ aõxõ tãpimisfo ato inãni nã yorafã rasi ato miniketsanõfo. ³⁷ Nãskakẽ keyokõichi pikanax mãyakõinifo. A pikĩ chetefaafo siete fẽta fospikõia ini. ³⁸ Akka nã pãa piafo cuatro mil feronãfakefos inifo. Kẽrofãferi fakefofaxori ato feta pinifo. ³⁹ Nãskata Jesús yorafo yoini fõtãnõfo ãto pexe ano. Nãskata Jesús kanõanãfã mẽra naneinãkafani aõxõ tãpimisfo fe. Mã naneinãkafãta aõxõ tãpimisfo fe mai fetsa ano kani, Magdala ano.

16

Fariseofo feta saduceofãfe, “Tsõa atiroma keskara noko ispafe nõ mia chanĩmara fanõ,” ixõ Jesús yõkanifo

(Mr. 8.11-13; Lc. 12.54-56)

¹ Askata Magdala mai ano Jesús nokoano fariseo fe saduceofo Jesús õifokani fonifo afara chakafamapaikani. Nãskakaxõ yoinifo: “Mĩ Niospa Fakemãkĩ tsõa atiroma keskara noko ispafe nõ mia chanĩmara fanõ,” fanifo. Nãskakaxõ

Jesús afara chakafamapainifo. ² Askafaifono Jesús ato kemani: “Mā yātapakeaino xini iki sharapakekōikai, ‘Penama oi ikima,’ mā famis. ³ Akka mā penaino nai choshtakōi ōikī, ‘Oi iki kiki,’ mā famis. Akka nai choshtakēma ōikī, ‘Oi ikima,’ mā famis. Nai foiskī mā tāpitiro oi feyamai feima rakikā mā fatiro. Askafixokai nā Niospa mato yoiai keskara mā chanīmara faima. Nāskakē mā ea tsōa atiroma keskara fafe, nō ōinō mā ea famis. Akka, ¿afeskakī mā tāpiamamē Epa Niospa noko ikīfiano?” ato askafani yoikī. ⁴ “Na yora chakafāfe ea chanīmara faafāfema ōipaikani ẽ Niosxō afara shara ẽ ato ispanō. Akka ẽ ato ōimانيا. Akka Jonás fafīnōfānē xeaitano fafīnōfānē xaki mēra tres nia ini. Nāskakē Niospa Jonás kāimani fafīnōfānē xāki mēranoax tsekeinō. Nāskakē a tsōa atiroma keskara ẽ mato ispaima,” ato fata ato makinoax Jesús kani.

*“Fariseofo feta saduceofāfe anorima yoimisfoki ato nikayamakāfe,” Jesús ato fani
(Mr. 8.14-21)*

⁵ Nāskano Jesúsxō tāpimisfāfe okiri ĩamāfā pokefaini fōkakī a pii foaifo shināmakifainifo. Nāskakaxō shinānifo: “Kee, ¿nō afaa piikaimē? A nō piikai mā nō shināmakikerani,” ikanax yoinānifo. ⁶ Nāskakē Jesús ato yoini iskafakī: “Nā fariseofo feta saduceofāfe āto pāa faraxati keskara fiyamakāfe,” ixō ato yoini.

⁷ Ato askafaito nikakani aōxō tāpimisfo yoinānifo: “¿Afeskakī Jesús noko yoimē fariseofo feta saduceofāfe āto pāa faraxati fiyamakāfe noko fai? Akka

nõ pãa feama. Nãskakẽ pãanoa noko yoiraka,” ikax yoinãnifo.

⁸ Akka mã tâpixõ Jesús ato yoini: “¿Afeskai nõ pãayamara mã ikimẽ? Akka mã ea chanĩmara fasharama,” ato fani. ⁹ “Mãkai ea tâpisharama. Akka, ¿mã shinãimamẽ cinco pãa kaxkexõ cinco mil feronãfakefo ẽ ato pimati? Akka, ¿afe tii fẽta pãa fospia ikitamẽ?” ato fani. ¹⁰ “Askatari, ¿mã shinãimamẽ nã siete pãa kaxkexõ cuatro mil feronãfakefo ẽ ato pimati? Akka, ¿afe tii fẽta texefafo mã fitamẽ? ¹¹ Akka, ¿mã tâpiamamẽ pãanoa ẽ mato yoima? Nã fariseofoya saducefofoõnoa ẽ mato yoi,” Jesús ato fani.

¹² Nãskakẽ tâpinifo Jesús ato yoiaito. Akka nã pãa faraxitiõnoa Jesús ato yoinima. Nã fariseofãfe saducefofo feta ato anorima tâpimapaiyaito Jesús ato yoini.

*“Mĩ Cristo mia Niospa ifini nokoki nĩchixii mĩ nõko xanĩfo finakõia inõ,” ixõ Pedro Jesús yoini
(Mr. 8.27-30; Lc. 9.18-21)*

¹³ Askata Jesús aõxõ tâpimisfo fe mai fetsa ari nokoni, Cesarea Filipino mai ano. Nãnoxõ aõxõ tâpimisfo yõkani iskafakĩ: “Yorafãfe, ¿afaa ea fakanimẽ ẽ tsoamẽ?” ato fani.

¹⁴ Ato askafaito kemanifo iskafakakĩ: “Fetsafãfe, ‘Juan Maotistara’ mia fakani. Fetsafãferi, ‘Elíasra’ mia fakani. Fetsafãferi mia iskafakani: ‘Nã Niospa meka ato yoimis nã Jeremíaskĩa, askayamai nã Niospa meka ato yoimis fetsa rakikĩa,’ mia fakani,” fanifo aõxõ tâpimisfãfe.

15 “Akka, ¿mã, ea tsoara faimē?” ato faito, Pedro kemani iskafakī: 16 “Mīfi Cristoki, nã Nios nĩpanakato Fakekõi,” fani.

17 Askafaito Jesús kemani iskafakī: “Simón, mīfi Jonáspa fakeki. Niospa mia noixõ mia sharafaxõa. Akka ã Niospa Fakekẽ tsõa mia tãpimanama. Ëfe Epa Niospa nã nai mẽra ikato ãa mia tãpimana. 18 Ë mia anã yoinõ. Mīfi Pedroki,” ixõ Jesús yoini. Akka israeli mekapa Pedro Tokirinĩfã nõ fatiro. Tsõa tokiri efapa pĩtsi itiroma. Nãskaxõ Jesús anã yoikĩ iskafani: “Mĩ ea yoia: ‘Mĩ Cristo, nã Nios nĩpanakato Fakekõi,’ mĩ ea faa. Nã mĩ yoia keskaraõxõ fetsafãfe arifi chanĩmara faxikani. Nãskaifãfe efe yorafo ã ato imaxii. Nãskax ichanãxikani ea fanãkani ekeki inimakani. Yõshi chakafãfe Nios noikaspakakĩ ato namapayanã ato xatemapaifiaifono tsoa xatetiroma. Nã ea Ifofafo xatenakafoma ea fanãkani. Tokiri efapanãfã pĩtsikiki tsõa tararatiroma keskara ixikani. 19 Akka fẽtsa chamisi fepoti fẽpetiro yorafo pexe mẽra ikimaxikĩ. Nãskarifiakĩ ã mia yoi mĩ yorafo eõnoa mĩ ato tãpimaxii ea Ifofanõfo. Akka mĩ ato yoiaito nikakõikanax efe yora itirofo Epa Nios fe ipaxakakĩ. Nãskai mĩ chamis keskara itiro. Nã mĩ õiai fato sharakõimãkĩ mĩ ato yoitiro: ‘Nã sharakõi mã atiro,’ ixõ mĩ ato yoitiro. Nã sharakõi mĩ õiai, Epa Niospari sharakõi õi. Askatari mĩ õikai fato chakamakĩ, mĩ ato yoitiro: ‘Na chaka mã atiroma.’ Nãskara mĩ yoiaino, Epa Niospari nã chaka õitiro.”

20 Nãskata Jesús aõxõ tãpimisfo yoini: “Tsoa yoia-makãfe ãfi Cristokĩ,” ato fani.

*“Chipo ea retexikani,” Jesús ato fani
(Mr. 8.31-9.1; Lc. 9.22-27)*

²¹ Akka anā meka fetsafaxō Jesús ato yoinima. Xafakīakōi a aōxō tāpimisfo ato yoini achiyoafomanō: “Ē Jerusalén ano kai. Nānoxō a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāferi, askatari nōko kaifāfe āto xanīfofofāferi ea omiskōimaxikani. Ea ato retemafiafono, tres nia oxata ē anā otoxii,” ixō ato yoini. ²² Askafaino Pedro Jesús ori iyoxō yoini iskafakī: “Ifo, askayamafe. Miakai retekanima kiki,” fani.

²³ Pedro askafaino Jesús texkeakekafāni. Nāskaxō iskafakī yoini: “Satanás, emakinoax katāfe. Mī ea xītipaikai a Niospa ea amapaiyai ē anōma. A Niospa shināi anori mī shināima. Akka nā yorafāfe shināi keskara mī shināi,” fani.

²⁴ Askafata Jesús aōxō tāpimisfo yoini: “Fatora fetsa ēfe inakōi ipaikī āakōi apaiyai keskara anā atiroma. Nā ē yoiai keskara nikakōitiro. Nāskakē iskatiro: ‘Ēfe Ifoxō ea retefiaifono ēkai ēfe Ifo ē potapakenakama,’ ixō shinātiro. ²⁵ Akka fētsa āa shinātiro iskakī: ‘Ē Nios Ifofaito ea retetirofo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, eōxō reteafono ē ifixii efe ĩpaxanō eamāi Ifofamiskē. ²⁶ Akka fatora fetsa nono mai anoax kori ichapaya ikatsaxakī mā naax aya katiroma. Ea Ifofayamax koriya ifiyakatsaxakī Epa Nios ano katiroma. Nāskakē afama mīshtifoya iyopaofinixakī nā omiskōipakenakafo mēra mā kaax anā aya itiroma. Nāskakē āfe afaraforikai Nios inātiroma afe ĩpaxakī. ²⁷ Akka ēfi Niospa Fakekī yorakōiri.

Nāskakē sharafinakōia chaxapakefōfāxii ēfe ājirifo fe nai mēranoax mai ano okī. Mē oax ē āto xanīfo finakōia ē ixii. Nāskakē nā afara shara famisfo ē ato ināsharakōixii ē atoki inimakōikī. Akka nā afara chakafamisfo afara shara ē ato ināsharakōima. Ē ato omiskōimaxii. ²⁸ Ē mato yoi ē xanīfo finakōia ixii. Akka mā atirito ea Ifofaxō nayoxoma mā ōiyotiro,” ixō Jesús ato yoini.

17

Jesús āfe femānā fetsa keskara ini, fafekōini. Āfe rapatiri oxokōi ini

(Mr. 9.2-13; Lc. 9.28-36)

¹ Askata seis nia mā finōano Jesús aōxō tāpimisfo tres iyonī. Pedro iyota, Santiago iyota, Santiago āfe exto Juanri iyonī. Ranāri ato nīchifaini. Nāskaxō māchi keya māmākīa ato iyoini. ² Nānoax āto ferotaifi Jesús fetsa keskara itani. Āfe femānā fafekōini xini keskara. Āfe rapatiri oxokōi itani oa luzpa chaxa keskara. ³ Nāskakē nānoa Moisés yafi Elías ōinifo Jesús fe mekaifāfe. ⁴ Askaito Pedro Jesús yoini: “Ifo, sharakōi ano nō oa. Akka, ¿mī fichipaimē ē tres tapas fanō? Mia fetsafaxota, Moisés fetsafaxota, Elías fetsafaxota, ē fanō,” ixō Pedro yoini.

⁵ Akka Pedro askafaino kōinī ato keyokōi maipakefōfāni. Nā kōi mēranoax Nios mekaito nikanifo iskaito: “Nafi ēfe Fakeki ē fichisharapaikōi. Ē akiki inimakōi. A nikakōikāfe,” ikaito nikanifo. ⁶ Nikakani Jesúsxō tāpimisfo ratekōiyanā feopakefōfānifo. ⁷ Askaifono Jesús ato ano kaxō ato ramāyanā ato yoini: “Finikāfe.

Ratekakima,” ato fani. ⁸ Nāskakē foisinĩfofākakĩ anoa tsoa òinifoma, Jesús fisti nikē òinifo.

⁹ Nāskata machi keya ariax anā tisirimepakenifo mā fekani. Tisirimepakekĩ Jesús ato yoifeni: “A mā òia keskara mā tsoa yoiki. Ē naax mē anā otoano mā ato yoitiroki,” ixō Jesús ato yoini.

¹⁰ Nāskakē a aōxō tāpimisfāfe Jesús yōkanifo iskafakakĩ: “A Moisés yoikĩ kirika keneni keskara ato tāpimamisfāferi iskafakĩ yoinifo: ‘Cristo oyoa-mano Elías rekē oi taexii kiki,’ ixō yoimisfo. Akka, ¿afeskakĩ iskara yoimē?” fanifo.

¹¹ Askafaiifāfe Jesús ato kemani: “Chanĩma, Elías rekē oi taei nāato keyokōi itipinĩsharafaiyoi āto chaka xatenōfo. ¹² Akka ě mato yoinō mā Elías ifana mākai tāpiama. Nāskakē nā apaiyai keskafakakĩ chakafanifo. Nāskarifikĩ ea omiskōimakani,” ixō Jesús ato yoini.

¹³ Nāskakē aōxō tāpimisfāfe tāpinifo Juan Maotistaōna Jesús ato yoiaito.

*Jesús feronāfake naetapa niafaka chaka pōtaxoni
(Mr. 9.14-29; Lc. 9.37-43)*

¹⁴ Askata Jesús a aōxō tāpimisfo fe mā māchifā ariax fotoano yorafā rasi akiki fenifo. Akka feronāfake fistichi ratokonō mai chachipakefofā Jesús yoini: ¹⁵ “Ifo, ěfe fake shināfe. Ēfe fake nĩsoi omiskōimiski. Nāskakē chii naki pakeyanā faka mēra pakemiski. ¹⁶ Akka mĩ inafō ano ěfe fake ě efefekē mĩ inafāfe ěfe fake ea sharafaxomisfoma,” fani.

¹⁷ Askafaito Jesús kemani: “Ooa. Mākai ea tāpisharama. Mā afara shināmis. Akka afetiākai ě

matoki onima. ¿Afetĩakai mã ea tãpimẽ? Niri nã fake efekãfe,” Jesús ato fani.

¹⁸ Nãskakẽ Jesús nã feronãfake naetapa makinoa niafaka chaka potani. Nãskax sharakõi itani nã feronãfake naetapa.

¹⁹ Nãskaxõ aõxõ tãpimisfãfe Jesús yõkanifo: “Akka, ¿afeskakĩri nõ niafaka yõshi chaka potatiromamẽ?” ixõ yõkanifo.

²⁰ Askafaifono Jesús ato yoini: “Akka mã ea nikaima. Ë mato yoinõ, ea nikakapo. Akka mã ea pishta nikaxõ mã na machi, ‘Nonoax tsekekainax mai fetsa ari katãfe,’ mã faino na machi tsekekaitiro. Ea nikakõixõ nã mã apaiyai keskara mã atiro. ²¹ Akka na keskara niafaka chaka mã foni tenekĩ Nios shinãkĩ mã Epa Nios kĩfianã mã potatiro,” ixõ Jesús ato yoini.

Anã Jesús ato yoini: “Chipo ea retexikani,” ixõ (Mr. 9.30-32; Lc. 9.43-45)

²²⁻²³ Askata aõxõ tãpimisfo fe Galilea ano ichanãxõ ato yoini: “Ea achikaxõ ãto xanĩfofo ano ea iyoxikani, afãfe ea retenõfo. Akka ea retefiafono tres nia oxata ã anã otoxii,” ixõ Jesús ato yoini. Ato askafaito nikakani aõxõ tãpimisfo shinãmitsakõinifo.

Nã Nios kĩfiti pexefã ano yonomisfãfe ato kori yõkanifo

²⁴ Askata Jesús aõxõ tãpimisfo fe Capernaúm ano nokoaino a Nios kĩfiti pexefã anoxõ ato kori fiamisfãfe Pedro õifokaxõ yõkanifo: “¿Mĩ Ifãfe kopi-faimamẽ na Nios kĩfiti pexefã nã ato kori fixomisfãfe?” Pedro fanifo. ²⁵ “Ëje, kopifai,” Pedro ato fani.

Askata Pedro pexe mēra ikikainaito Jesús yoini iskafakī: “Simón, ¿afe keskara mī shināimē? ¿Xanifāfe nā maitio anoa āfe kaifo kori fīaimē, askayamakī yora fetsafo ato fīairaka?” ixō Jesús Pedro yōkani.

²⁶ Askafaito Pedro kemani: “Yora fetsafo fīatiro,” fani. “Ēje, chanīma,” Jesús ini. “Akka āfe kaifāfe kopifatiroma. ²⁷ Akka nokoki ōitifishkiyamanōfo ĩa ano kaxō mīshkimātāfe. Nā mī fafī mīshkimāna āfe axfa mēranoa mī kori exe fichikai. Nāskakē nā Nios kīfiti pexefā kori fixomisfo nō ato kopifaikai,” ixō Jesús Pedro yoini.

18

*“Akka, ¿tsoakaimē sharafinakōia?” inifo
(Mr. 9.33-37; Lc. 9.46-48)*

¹ Akka nāskatari aōxō tāpimisfo fōkaxō Jesús yōkanifo: “Akka, nō mia Ifofamiski, ¿fatomē finakōia?” ixō yōkanifo.

² Askata Jesús fake yome kenaxō ato nēxpakīa nīchini. ³ Nāskaxō ato yoini: “Ē mato pāraima. Iskara mā shinātiroma: ‘Ē keyokōi finōfakī,’ mā itiroma. Akka fake yome kakapaitiroma. Akka mā shinā fetsafaax na fake yome keskara mā itiro. Mā askayamaxō mā Nios Ifofatiroma. ⁴ Akka Nios Ifo sharakōi faax nā Nios nikakōiaifo fake yome keskarrafo, askatari, ‘Nō tsoama,’ ixō shināifo nāskarrafo sharafinakōiafo. ⁵ Akka fatora fētsa ēfe aneōxō na fake yome noikī nāatori ea noisharakōi,” ixō Jesús ato yoini.

Noko fētsa afara chakafamaino āfenā mesekōi itiro

(Mr. 9.42-48; Lc. 17.1-2)

⁶ Jesús anā yoini iskafakī: “Akka nā ea rama Ifofai fetsafāfe ato afara chakafamaino ōikī, nā keskarafō ato achixō tokirinīfāya tenextifaxō fakafā noa mēra potatirofo āsanōfo fetsafo anā ato afaa chakafamayamanōfo. Nā keskara shara ikerana,” ato fani. ⁷ Askafata Jesús aōxō tāpimisfo yoini iskafakī: “Mēxotaima ea chanīmara faafāfema yorafo chakafamapaimisfo. Akka fētsa fetsafo chakafamax omiskōi finakōixikani.

⁸⁻⁹ “Akka māto mēkemā mato afara chakafamatiro, askayamākī mato tae mato afara chakafamatiro, askayamākī mato fēro mato chakafamatiro. Nāskaino māto chaka xatekōitakāfe anā chakafayamaxii. Oa māto mēke xateta pota keskara itaxikakī, oa māto tae xateta pota keskara itaxikakī, oa māto fero fetoshimea keskarakōi itaxikakī afaa mā chakafayamanō. Akka mā mā mēke fisti potax anā afaa chakafayamai mā Epa Nios fe isharapakenakaki. Nā keskara sharakōi. Nā māto mēke mā xateama keskaraxō mā aō chakafaino, nā omiskōipakenakafo mēra mā kanaka ari chiifā nokanakama mēra. Nā mātonā chaka finakōia ixii. Nāskatari māto tae fisti xatea keskara mā sharafinakōia mā isharapakekōitiro. Nāskax, mā askayamaino nā omiskōipakenakafo mēra mā ipanakaki ari chiifā nokanakama mēra. Nāskatari māto fēro chakafaino, mā fetoshimeax mā isharapakenakaki. Mā askayamax fero rafeyax nā omiskōipakenakafo mēra mā kaxii nā chiifā nokanakama mēra,” ato askafani.

*Oveja fenoaõnoa Jesús meka fetsafaxõ ato yoini
(Lc. 15.3-7)*

¹⁰ Anã Jesús ato yoini iskafakĩ: “Nã rama ea Ifofaõnoa fakefo keskara shinãkĩ iskafayamakãfe: ‘Na rama Jesús Ifofaafokai afaafoma,’ ixõ yoiyamakãfe. Ë mato mẽstekõĩ yoinõ. Epa Niospa ãfe ãjirifãfe nã rama ea Ifofaafõ ato kexesharafafãimis. Nã ãjirifo Epa Nios fe imisfo. Nãskakẽ ãfe fakefo kexesharamis. ¹¹ Akka nã yorafo fenoafõ ã ato chaka soaxoniyoĩ ã oni isharapakexanõfo.

¹² “Akka, ¿afaa mã shinãimẽ? Feronãfake fetsa cien ovejaya itiro. Nãskakẽ fisti a makinoax fenoano nã noventa y nueve anã kãimatiroma nã fenoa fenakĩ. ¹³ Ë mato chanĩma yoinõ. Mã oveja fisti fichiãx inimaifinãkõitiro. Akka nã fenoamafoki inimatama nã fenoitaki mã fichiãx inimaifinãkõitiro. ¹⁴ Nãskarifiã Epa Nios nã nai mẽranoato nã rama Ifofaifõ keyokõĩ ato noisharai ato õikĩ. Askatari tsoa pishta fenopaima ãfe fakefo,” ato fani.

Jesús chanĩmara faa fẽtsa mia chakafaito mã rae-fatiro

(Lc. 17.3)

¹⁵ Anã Jesús ato yoini iskafakĩ: “Akka meka fetsa ã mato yoinõ. Ea chanĩmara famis fẽtsa mia chakafakẽ mã yoitiro iskafakĩ: ‘Yamã, mã ea chakafaa,’ ixõ mã yoitiro. Mã askafaito mia nikaxõ, ‘Ëje. Ea mã chakafa. Ea anã raefafe,’ ixõ mia yoiaito mã afe rae faatanãtiro. ¹⁶ Nã mã askafafiaito mia nikakaspaito feronãfake fisti kenafe, askayamakĩ rafe kenafe nã rafetari nikanõfo

mia chanĩmara faimãkai. ¹⁷ Nãskatari atori nikayamaito nã ea Ifofaafõ ichanãfo anoxõ ato yoife mia tãpinõfo. Nã ichanãfo anoxõ mĩyoiaito mia nikayamaito mĩiskafakĩyoitiro: ‘Na feronãfãke Epa Nios Ifofafiax nã Nios Ifofaafoma keskara ika. Nãskatari nã ato pãraxõ ato kori fiamisfo keskarakõ,’ ixõ mĩyoitiro.

¹⁸ “Ë mato chanĩma yoi. Nã mã õiai fato sharakõimãkĩ mã ato yoitiro: ‘Nã sharakõ. Nãskara nõ atiro,’ ixõ ato yoitiro. Nãskara mã sharakõ õi Epa Niospari shara õi. Askata mã õikai fato chakamakĩ, mã ato yoitiro: ‘Na chaka. Nãskara nõ atiroma,’ ixõ ato yoitiro. Nãskara mã õikĩ chakamakĩ, ‘Na chaka nõ atiroma,’ ixõ mã yoiaino, Epa Niospari nã chaka õitiro.

¹⁹ “Askatari fetsari ã mato yoinõ, ea nikakõikapo. Fatora mã rafeta nono mai anoxõ mã shinãsharaxõ, mã Epa Nios afara yõkaiyanã mã kĩaiaito ãfe Epa nai mẽranoato mato afara inãsharaxii. ²⁰ Akka rafe iyamakani tres yora ea shinãkani eõnoax ichanãkaxikani ãri ato fe ichanãxii,” ixõ Jesús ato yoini.

²¹ Askata Pedro akiki kaxõ Jesús yõkani: “¿Ifo, oato ea noikaspakĩ ea chakafamis, afe tii fakĩ ã yoitiromẽ ã raefaxiki? ¿Siete fakĩ ã yoitiromẽ?” faito, ²² Jesús kemani: “Maa. Siete fakĩ mĩyoitiroma. Mẽxotaima mĩyoitiro,” fani.

Jesús anã meka fetsafaxõ ato yoini feronãfake fẽtsa a afeta yonomis raefapainima

²³ Anã Jesús ato yoini: “Nõ Epa Nios Ifofaxõ nõ fetsafo raefatiro, Epa Niospa mato raefamis keskafakĩ. Nã ã mato yoiai keskara nikakapo

mã tãpinõ mã rae faatanãino. A xanĩfãfe ato yonomamis kenani ato yoixii afe tii mã nimiamakĩ. ²⁴ Xanĩfãfe taefakĩ afe rafea kenani ichapakõĩ nimiano. ²⁵ Akka a nimia koriya inima afaa kopifatiroma ini. Nãskakẽ xanĩfãfe iskafani: ‘Mĩ koriyama mĩ kori nokotiroma mĩ ea kopifapanã. Akka ẽ mia xanĩfo fetsa inãĩ mĩ ãfe ina inõ ea kori inãnõ. Mia inãta mĩ ãfi inãta mĩ fakefo inãta mĩ afama mĩshtifo keyokõĩ ea inãĩ mĩ ea aõ kopifanõ,’ ixõ xanĩfãfe yoini. ²⁶ Nãskakẽ ãfe inapa ratokonõ mai chachipakefõã yoini: ‘Ifo, ea manayofe. A ẽ mia nimia ẽ mia chipo kopifaikai,’ ixõ yoini.

²⁷ “Askafaito nikakĩ xanĩfãfe shinãkõini. Nãskaxõ yoini: ‘Rateyamafe. A mĩ ea nimia ẽ anã shinãima. Mĩ ea nimia ẽ keyokõĩ sofai mĩ anã ea niminõma. Kasharatãfe,’ ixõ yoini. ²⁸⁻²⁹ Nãskakẽ xanĩfãfe pexe mẽranoax kakĩ, ãfe yama fichini, nãato ichapama pishta nimia ini. Nãskakẽ fichixõ testopa achixõ temo temosayanã yoini: ‘Mĩ ea nimia ea kopifarisaãfe,’ fani. Mã eneano ratokonõ mai chachipafofã yoini, ‘Ea manayofe ẽ mia inãnõ,’ fani. ³⁰ Askafaito nikakaspakĩ karaxa mẽra ikimani a mẽraxõ kopifanõ. ³¹ Nãskakẽ ranãri shinãmitsakõikakĩ a õiaifo ãto xanĩfo yoifokani fonifo. ³² Nãskakẽ xanĩfãfe kenaxõ mã oano yoini: ‘Mĩ chaka finakõia. Akka ẽ mia askafatima mĩ ea nimifiano, “A ẽ mia nimia ẽ mia kopifanõ ea manayofe,” mĩ ea faito, ³³ akka mĩri mĩ yama mĩ shinãkerana nã ẽ mia noikĩ shinãti keskafakĩ,’ ixõ xanĩfãfe yoini. ³⁴ Nãskax õitifishki finakõikĩ xanĩfãfe nã ãfe ina karaxa mẽra ikimani anoax omiskõĩ finakõinõ nã nimia kopifayanã.

³⁵ “Èfe Epa nai ari ikato matori askafaxii fetsafo

mã raefayamaito mato omiskõimaki,” ixõ Jesús ato yoini.

19

*Feronãfake ãfe ãfi fe enẽnãtirofoõnoa Jesús ato yoini
(Mr. 10.1-12; Lc. 16.18)*

¹ Mã ato yoikĩ keyota Jesús aõxõ tãpimisfo fe Galilea anoax kakĩ faka Jordán pokefainax Judea mai ano nokoni. ² Nãskakẽ yorafã rasichi chĩfafãinifo. Nãrixõ nã isinĩ ikaifo ato sharafapani.

³ Nãskakẽ fariseofo akiki fẽkaxõ chakafakĩ mekamapainifo. Nãskaxõ yõkanifo iskafakĩ: “Nõko xinifãfe Niospa meka yoikĩ kenenifo keskafakĩ, ¿feronãfake ãfe ãfi enepaikĩ enetiromẽ afeskaraito?” ixõ yõkanifo. ⁴ Askafaifono Jesús ato kemani: “¿A Moisés kirika keneni mã õimismamẽ? Iskafakĩ keneni: ‘Niospa keyokõi onifani. Feronãfake yafi kẽro onifakĩ taefani. ⁵⁻⁶ Mã askafaxõ iskafakĩ yoini: “Feronãfake mã ãfiyax ãfe apa yafi ãfe afa makinoax paxkatiro ãfi fe fianãxiki. Nãskakẽ ãfe ãfi fe yora fisti keskara itirofo,” ’ ixõ Niospa yoinino Moisés keneni. Nãskakẽ anã yora rafema, yora fisti keskara ikani ãfe ãfi fe. Nãskakẽ feronãfake ãfe ãfi enetiroma Niospamãi ato fianãmano,” ixõ Jesús ato yoini.

⁷ Ato askafaino yõkanifo: “Akka, ¿afeskakĩ Moisés yoinimẽ iskafakĩ? ‘Feronãfake ãfe ãfi eneyoxoma kirika kenexõ yoitiro iskafakĩ: “Ë anã mia fipaima. Ë mia enei,” ’ ixõ yoitiro Moisés fani,” fariseofãfe Jesús fanifo.

⁸ Askafaifono Jesús ato yoini: “Akka mãri mãto xinifo keskara mã Niospa meka nikakaspamis.

Akka Moisés yoini nõ këro enetiro. Akka Niospa taefakĩ anori shinānima. ⁹ Ë mato yoinõ. Akka fětsa āfe āfi enetiroma fetsa fe chotanāyamafiano. Akka fětsa āfe āfi enexõ këro fetsa fia askara sharama, chakafai. Askatari a këro feně enea fětsa fia askarari sharama, chakafai,” ixõ Jesús ato yoini.

¹⁰ Askara nikakakĩ Jesús a aõxõ tãpimisfãfe yoinifo: “Akka nã mĩ noko yoiai keskara nikakanax, fianãfoma askara shara itirofo,” ikaxõ yoinifo.

¹¹ Askafaifono Jesús ato kemani: “Na ã yoiai keskara atirifãfe nikasharatirofoma. Akka nã Niospa ato shināmanai tiitos shinākanax nãfo shara itirofo fianākanamax. ¹² Akka yõshikõĩ kãiax mã yosiax āfiyatiroma. Akka fetsafori ato oxkofixotirofo āfiyanõfoma. Akka fetsafãferi Epa Nios fisti nikakõipaikakĩ, nã fisti nikakõitirofo. Nãskakẽ afo āfiyapakenakafoma,” ixõ Jesús ato yoini.

Jesús fakefo chishtoxõ ato mãmãyanã Epa Nios kĩfixopakeni

(Mr. 10.13-16; Lc. 18.15-17)

¹³ Ato askafaino yorafãfe ãto fakefo Jesúski efenifo ato mãmãpakeyanã ato Nios kĩfixonõ. Akka a Jesúsxõ tãpimisfãfe ato iskafanifo: “Mãto fakefo efexõ nõko Ifo fekaxtefayamakãfe,” ato fanifo.

¹⁴ Ato askafaifono Jesús ato yoini: “Ato enekãfe nã fakefo ekeki fenõfo. Ato nētefayamakãfe. Ëfe Epa Nios xanĩfo ika ari na fakefo keskarakõifoki,” ixõ ato yoini. ¹⁵ Nãskaxõ fakefo mãmãpaketa Jesús nãnoax kani.

Feronãfake naetapa kori ichapayax Jesús fe mekani

(Mr. 10.17-31; Lc. 18.18-30)

¹⁶ Feronãfake naetapa fistichi Jesús õikaxõ yõkani: “Maestro, mĩ sharaki, ea yoife afaa shara ã afeska fatiromakĩ Nios xanĩfo fe ipaxaki,” ixõ yõkaito, ¹⁷ Jesús kemani: “¿Afeskakĩ sharara mĩ ea faimẽ? Akka Nios fisti sharafinakõia. Nios xanĩfo fe mĩ ipaxapaikĩ a Moisés yoini keskara mĩ nikasharakõitiro,” faito, ¹⁸ “¿Fatomẽ ã nikanõ?” faito, Jesús yoini iskafakĩ: “Nã Moisés yoini keskarakõi mĩ nikakõitiro. Iskafakĩ yoini: ‘Ato reteyamakãfe. Askatari mãto ãfima chotayamakãfe. Askatari atoki yometsoyamakãfe. Askatari chanĩ yoiyamakãfe. Askatari kaxpa ato parayamakãfe. ¹⁹ Askatari mãto epa yafi mãto efa nikasharakõikãfe, ato sharafakãfe. Askatari a mã chaima nikari noisharakõikãfe a mã mã noimeai keskafakĩ,’” ixõ Jesús yoini.

²⁰ Askafaito a kori ichapayato kemakĩ iskafani: “Nã mã yoiai keskara mẽ nikakõimis. Akka, ¿afaa fetsari ã nikamamẽ?” faito, ²¹ Jesús kemani: “Mĩ isharakõipaikĩ, mĩ afama mĩshtifo ato minitãfe. Kori fixõ nã afaamaisfo ato inãketsatãfe. Nãskakẽ nai mẽranoax afama mĩshtifoya mĩ ixikai. Mã mĩ kori ato inãketsata anã oxõ ea Ifofasharafe,” ixõ Jesús yoini.

²² Askafaito nikai nã feronãfãke shinãchakakõi tooxinima kori ichapayamãiyaxõ ato inãkaspai. Nãskax Jesús makinoax kani.

²³ Nãskaxõ Jesús aõxõ tãpimisfo yoini: “Ë mato pãraima, fekaxkõi yora kori ichapayato Epa Nios

Ifofapaia. ²⁴ Akka anã ã mato yoinõ meka fet-safaxõ. Camello akoja kini mẽra ikipaifi ikitiroma, fekaxkõi, efapamãiax. Nãskarari yora kori ichapay-ato Nios Ifofapai, fekaxkõi ãfe afama mĩshtifomãipotakaspakĩ,” ixõ Jesús ato yoini.

²⁵ Ato askafaito nikakakĩ a aõxõ tãpimisfãfe tãpipainifo. “¡Keel! ¿Afeskax nõ Nios fe ipaxatiromẽ?” ikanax yoinãnifo.

²⁶ Askaifãfe õikĩ Jesús ato yoini: “Yorafokai ãa ifimetirofoma. Nios fistichi yorafo ifitiro. Niospa afama mĩshtifo fatiro, yorafãfe atiroma keskara,” ixõ ato yoini.

²⁷ Ato askafaito nikakĩ Pedro yoini: “Ifo, nõ mefe okĩ nõko afama mĩshtifo nõ õiferani nõ mefe oni. Akka, ¿afaa nõ fimmẽ?” fani.

²⁸ Askafaito Jesús ato kemani: “Ë mato pãraima. Keyokõi ã ato ãkinãno sharafinakõia ea õixikani, ãfe Epa Nios keskara sharakõi ã ikaito. Akka mãmãi ea Ifofasharakatsaxakĩ nai mẽranoax mã efe xanĩfofo ixii. Mã nõko kaifo israelifãfe ãto xanĩfori mã ixii. Nã doce nofe yorafo israelifo mã ato ãkipakenakakĩ. ²⁹ Akka yora fẽtsa eõxõ ãfe meka sharaõnoa ato yoikakĩ ãfe pexe õifaini, askatari ãfe onefetsafori õifaini, ãfe poifori õifaini, ãfe apari õifaini, ãfe afari õifaini, ãfe ãfiri õifaini, ãfe fakefori õifaini, ãfe tareri õifaini, akka nãato afama mĩshtifo fixii. Nãskatari mã naax Nios fe ipanaka. ³⁰ Akka iskaratĩa yora ichapafãfe ato finõpaikani, nõ finakõiara ikaxõ, akka chipo fenotirofo. Akka a ato finõpaiyamaifo iskaratĩa Niospa ato finakõia imaino Nios fe ipanakafo,” ixõ ato yoini.

20

A yonomisfokiri yoikī meka fetsafaxō Jesús ato yoini

¹ Anā Jesús ato yoini: “Afe keskaramākī Epa Niospa keyokōi ato ĩkinā mā Ifosharafaino, ě anā meka fetsafaxō ě mato yoinō. Ea nikasharakāfe. Nā tare ifo mā fakishparikōi kani yorafo fenaikai āfe tare ano yonoxonōfo. ² Ato fichixō ato yoini iskafakī: ‘Ĕ mato pena fisti yonomapai. Akka nā ě ato kopifamis tii mā pena fisti yonoano ě mato kopifai, ĵnāskara sharamē?’ ato faito, ‘Ĕje, shara,’ fanifo. Nāskaxō āfe tare ari ato nīchini. ³ Askata rama xini keyaino tare ifo anā kakī ōia plaza anoxō ranārīto manaifono yonopaikakī tsōa ato yonomayamaino. ⁴ Askaifono tare ifāfe ato yoini: ‘ĵMāri ěfe tare ano yonopaimē nā ě ato kopifamis keskafakī ě mato kopifanō?’ ato faito nikakata atiri fonifo yonoi fokani. ⁵ Askata tare ifo anā xini keya kaxō ōia ranārīto mananifo yonopaikakī. Nāskakē afori nīchini āfe tare ano. Askata mā xini kaino anā kaxō ōia ranārītori manaifono. Nāfori nīchini yonotanōfo. ⁶ Askatari yātapishtakōi plaza ano anā kaxō ōia nānoa ranāri ato fichitoshini yonopaiyaiāfe. Nāskaxō ato yōkani: ‘ĵAfaa nonoxō mā afeskafaimē yonokima?’ ato faito kemanifo, ⁷ ‘Tsōa noko yonomayamaino nō iki,’ fanifo. Askafaifono ato yoini: ‘Māri ěfe tare ano yonotakāfe,’ ato fani.

⁸ “Nāskata mā fakishano nā tare ifāfe afe xanīfo yoini iskafakī: ‘Ea yonoxonaifo ato kenafe ato kopifanō. Nā rama ikiafo ato kopifakī taefafe. Askata nā iki taeafō chipo ato kopifaxiki,’ fani.

⁹ Akka yātapishtakōi ikikaxō yonoafo nāfo ato kopifani nā pena fisti yonoafo kopifamis keskafakī. ¹⁰ Akka nā yonoi iki taeafāfe shinānifo: ‘Nō kori ichapa fira,’ ikaxō, askafikaxō nā fetsafāfe fiaitiri finifo. ¹¹ Nāskakē mā ato kopifaino, nā tare ifo mekafakakī yōachēpenifo. ¹² Iskafakī yoinifo: ‘Akka nā rama fēkaxō yonoafo mā ato kopifaa nā mā noko kopifaa keskafakī. Akka nō xini pae meeyanā nō yonoa nīskayanā nā pena tii,’ fanifo. ¹³ Akka nā tare ifāfe fisti kemani: ‘Efe yorashta, ē mia chakafakī mekafaama. Akka mē mia kopifaa nā mī pena fisti yonoa. Nā pena fisti ē ato kopifamis tii ē mato kopifai ē mato faaki. Nā sharaki mā ea faaki,’ fani. ¹⁴ ‘Akka ē mia kopifanō, nakīa mī kori. Katāfe mī pexe ano. Akka nā rama ikikaxō yonoafo nā ē mia ināi keskafakī atori ē ināi. ¹⁵ Nā ē ināpaiyai keska fakī ē ato inātiro, ēfe korimāiyakē. Akka, ¿afeskai mī ekeki ōitifishkikimē ē fetsafo ināsharaino?’ ixō yoini. ¹⁶ Nāskarifakī Epa Niospa nā taefakī chanīmara faafo ato ināi keskafakī nā rama chanīmara faifo nāfori ato ināsharaxii. Akka Epa Niospa yora ichapa kena a ika ano fonōfo. Nāskakē Epa Niospa ato kenafiaito tsōa nikayamaito nā Ifofaafos ato ifixii,” ixō Jesús ato yoini.

Anā Jesús ato yoini: “Mā chaima ea retekanira,”
ixō

(Mr. 10.32-34; Lc. 18.31-34)

¹⁷ Askata Jesús Jerusalén ari fāi kakī a aōxō tāpimisfo kenaxō ato yoini iskafakī: ¹⁸ “Ea nikakāfe. Mā mā ōikai iskaratīa Jerusalén ano nō māpei kaikai. Nānoxō ea achikaxō ea ato inākani, a Nios ato kīfixomisfāfe āto xanīfofo, askatari a Moisés yoikī kirika kenenī keskara ato tāpimamisfo

anori ea iyoxikani. Nānoxō, ‘Mā mī naikai,’ ixō ea yoixikani kiki. ¹⁹ Nāskakaxō yora fetsafo nōko kaifoma ea inākani ea kamaketsayanā ea koshaketsakani. Nāskakaxō ifi cruz ikaki ea mas-takani. Akka ea askafafono tres nia oxata ē anā otoxii Epa Niospa ea otofaano,” ixō ato yoini.

Āfa āfe fake rafe Jesús yoixoni
(Mr. 10.35-45)

²⁰ Zebedeo fake rafe Juan fe Santiago ini. Nā rafe āto afa fe Jesús ano fonifo. Mā Jesúski nokoxō nā kēromā ratokonō mai chachipakefofāni Jesús afara shara yōkapaikī. ²¹ Askafaito Jesús yōkani: “¿Afaa mī fichipaimē ē mia axonō?” faito, nā kēromā yoini: “Ifo, nā mī xanīfo finakōia ikaitīa ēfe fake raferi mefe xanīfo inōfo ato xanīfo imafe. Nā xanīfāfe tsaoti ano mī tsaooano ēfe fake rafe takairafe mefe ketaxamei tsaonōfo,” fani.

²² Askafaito Jesús nā kēromā fake rafe yoini: “Mā tāpiama a mā ea yōkai keskara. ¿A ē omiskōixiai keskara māri omiskōitiromē?” Jesús ato faito ke-manifo: “Ēje, nōri tenetiro,” fanifo.

²³ Askafaiifāfe Jesús ato yoini: “Chanīma, māri mā omiskōixii. Akka ēkai tsoa yoitiro, ‘Efe ketaxamei tsaofe efe rafexii’ ixō. Akka ēfe Epa Nios fistichi yoitiro. Nā Niospa ato katoafos nāfo afe ketaxamei tsaotirofo efe rafexikakī,” ixō ato yoini.

²⁴ Nāskakē a aōxō tāpimis rafeta askafakī yōkaifāfe a aōxō tāpimisfo fetsafāferi nikakakī, “¿Afeskai oa iskai rafe mekakanimē?” ikaxō a rafe meepainifo. ²⁵ Askaifono Jesús ato kenaxō ato yoini: “Mā mā tāpia yora fetsafāfe āto xanīfofo afe keskarafomākī. Nā xanīfāfe mitsisipakōixō ato yonomamis. A xanīfo fe rafeafāferi ato yoimisfo

iskafakakī: ‘Nōri māto xanīfo. Nō mato yoiaito mā noko afara axorisafatiro,’ ixō fāsikōi ato yoimisfo. ²⁶ Akka mā ranā askayamakāfe. Askatamaroko fatora fetsa mā xanīfo ipai ato yonoxomis keskara mā itiro. ²⁷ Askatari fatora fetsari xanīfo ipaikī iskafakī shinātiro: ‘Ēkai afaama. Nāskakē ē fetsafo axosharapai. Nā apaiyaifo keskara ē ato axosharai,’ ixō shinātiro. ²⁸ Akka ēri anori shināima, ēfe Epa Nios ariax ē nāmā ftoni feronāfakekōi ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē oni. Ē atoōnoax naxiki ē oni Satanás chaka āto ifo inōma,” ixō Jesús ato yoini.

Jesús yora fēxo rafekōi sharafani
(Mr. 10.46-52; Lc. 18.35-43)

²⁹ Askata Jericó anoax Jesús aōxō tāpimisfo fe kaino yorafā rasichi chīfafainifo. ³⁰ Akka fai kesemē fēxokōi rafe tsaonifo. Nānoxō Jesús fāi kaito nikakaxō nā rafeta kenanifo iskafakakī: “Ifo, David fenapa, noko shināfe,” fāsikōi fanifo.

³¹ Askafaifono nā yorafā rasichi ato iskafanifo: “Nōko Ifo fekaxtefayamakāfe,” ato faifono, akka nā fēxokōi rafe fāsikōi kenanifo: “Ifo, David fenapa, jnoko shināfe!” fanifo.

³² Askafaifono Jesús nēteakekafani. Ato kenaxō ato yōkani nā fēxokōi rafe: “¿Afaa mā fichipaimē ē mato axonō?” ixō ato yōkani.

³³ Ato askafaito kemanifo: “Ifo, nō fēro ōisharapaikōi,” fanifo. ³⁴ Jesús ato shinākī āto fero mēeni. Āto fero mēeaino nā fēxokōi rafeta āto fēro ōirisafatanifo. Nāskakaxō Jesús chīfafainifo.

21

Jesús nokoni Jerusalén ano

(Mr. 11.1-11; Lc. 19.28-40; Jn. 12.12-19)

¹ Nāskata mā Jerusalén chaima fokanax pexe rasi Betfagé ano nokonifo machi Olivos ano. Nānoxō Jesús a aōxō tāpimis rafe nīchini, ² ato iskafayanā: “Mēstekōi fotakāfe oa ono pexe rasi ano. Nānoa burro nexekē mā fichi kaikai āfe fake fe nexekē. Nāskakē tēpexō ea efexotakāfe. ³ Anoxō yora fētsa mato yōkaito: ‘¿Afeskakī mā burro tēpeyoamē?’ mato faito, yoikī iskafakāfe: ‘Nōko Ifāfe fichipaiyaito nō ifixoniyoa. Akka samama nō mia nīchixoniyokai,’ fakāki,” a aōxō tāpimis rafe fani.

⁴ Nā Niospa meka yoimisto kirikaki kenekī yoini keskakōini Jesús. ⁵ Iskafakī keneni:

Pexe rasi Sión anoafo ato yoikāfe iskafakī: “Ōikapo. Māto xanīfokōi mā matoki oi kiki. Xanīfofiāx afama keskara oi kikī. Burro fake kamaki tsoa na feronāfakekai kakapaimisma,” ixō Niospa meka yoimisto kirika keneni.

⁶ Nā Jesúsxō tāpimisfāfe mā fōkaxō nā ato yoia keskara fanifo. ⁷ Nāskata burro fake yafi āfe afa iyonifo. Nāskaxō burro kate kamaki āto sama fanifo. Nāskakē Jesús a kamaki tsoainākafāni. ⁸ Yora ichapakōi inifo. Nāfāfe āto rapatifo kakafa fonifo fai nēxpakīa. Ranāritori epe pei xatekaxō kakafanifo. ⁹ Akka nā rekē foaifo fe a acho foaifo fāsikōi mekafonifo. Tai tai fokani. “¿Aicho! ¿Nōko xanīfo David āfe fena nokoki oi kiki! ¿Sharafinakōia nokoki oi kiki Niospa nīchiano nai mēraxō! ¿Nōko Ifo Nios sharafinakōia!” ikanax tai taifonifo.

¹⁰ Nāskata Jesús Jerusalén ano kaito òikani yorafo ratei fetsenifo òiakefaikani. “¿Tsoamē na?” ikanax āa ranā yòināi fetsenifo. ¹¹ Askaifāfe nā Jesús fe foafāfe ato kemanifo: “Nafi Jesúski Niospa meka ato yoimis. Nazarete anoa Galilea mai ano imis,” ixō ato yoinifo.

Jesús a Nios kīfiti pexefā mēraxō a ato ināifo ato potani

(Mr. 11.15-19; Lc. 19.45-48; Jn. 2.13-22)

¹² Mā fotoax Nios kīfiti pexefā mēra Jesús ik-itoshini. Ikikaixō òia a mēraxō yorafāfe āto afama mīshtifo ato miniketsakani inifo kori fikani. Askafaifāfe òikī Jesús ato pōtaketsani a ato afama mīshtifo miniaifo, a ato fīaifori potani. A kori fīanōnāifo anoari āto mīsa pōtakī ato nāpakaketsani. Askatari a ato rifi miniaifori āto tsaotifori ato pōtaketsani. ¹³ Askafata ato yoini iskafakī: “Niospa shināmanaino Isaías Niospa meka keneni iskafakī: ‘Mā ēfe pexefā mēraxō mā ea kīfitiro,’ ixō keneni. Akka nā yometsofāfe pexe keskara mā famis,” ixō Jesús ato yoini.

¹⁴ Ato askafaino a Nios kīfiti pexefā ano fēxofo, chatofa Jesúski fenifo. Nāskakē anoxō Jesús ato sharafani. ¹⁵ Jesús askarafo ato sharafaino òikani. Akka nā Nios ato kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe òinifo afama mīshtifo Jesús akaito. Askatari fakefo Nios kīfiti pexefā mēranoaxri tai tai ikaifāfe nikanifo iskaifāfe, “¡Aicho! ¡Nā Jesús David āfe fena sharafinakōia!” ikaifāfe nikakani òitifishkinifo.

16 Nāskakakī Jesús yoinifo iskafakakī: “¿Oaiskai mī nikaimē yoiaifo keskara faifāfe?” Jesús ato kemani: “Ēje, mē nikai,” ato fani. “Akka a kirika ke-neano, ¿mā ōimismamē? Iskafakī kenenifo, Niospa ato shināmanaino:

Fake yomefāfe mia fanākani, mī ato fanāimaino,
ixō kenenifo,” Jesús ato fani.

17 Askafakī ato yoita ato makinoax kani pexe rasi ano Betania ano. Nāno oxafistishini.

“Fana higuera, mī anā fimiyanakama,” Jesús fani

(Mr. 11.12-14, 20-26)

18 Mā penano Jerusalén ano anā okī Jesús meea fonāikōini. 19 Mā anā kakī Jesús ōini a fana higuera fai kesemē nikē. Nāskakē akiki kaxō āfe fimi fenani pipaikī. Akka fimiya inima, āfe pei fisti ini. Nāskakē yoikī iskafani: “Anā mī fimiyanakamaki,” faino koshikōi nā higuera xanarisatani.

20 Askaito ōikakī aōxō tāpimisfāfe yōkanifo: “Kee, ¿afeskai na ifi xanarisatanimē?” ikaxō, 21 yōkaifono Jesús ato kemani: “Ē mato pāraima mā ea nikakōixō māri atiro na ē ifi higuera xanafaa keskafakī. Nāskarifakī na machiri mā yoitiro iskafakī: ‘Nonoax tsekekainax fakafā mēra paketāfe,’ mā faino fakafā mēra paketiro. 22 Mā Epa Nios chanīmara fakōixō mā afara kīfaiato mato inātiro,” ixō ato Jesús yoini.

“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī

(Mr. 11.27-33; Lc. 20.1-8)

²³ Ato askafata Nios kīfiti pexefā mēra ikikaini. Nā Nios kīfiti pexefā mēraxō ato tāpimanaino, nā ato Nios kīfixomisfāfe āto xanīfofo fe judeo anifofo fonifo. Akiki fōkaxō yōkanifo iskafakakī: “¿Tsōa mia nīchinimē? ¿Tsōa mia yoiamē mī iskafanō?” ixō yōkanifo.

²⁴⁻²⁵ Askafaifono Jesús ato kemani: “Ēri mato yōkanō. Ea yoikapo ě nikanō. ¿Tsōa Juan nīchinimē ato maotisafakī ato faka mēra ikimapakenō? Niospa nīchiyamakī yorafāfe nīchiniforaka. Akka mā ea kemaito, ěri mato yoikai tsōaōxō ě iskafaimākai.”

Ato askafaino, āa ranā mēenāpai fetsayanā. Shinānifo iskakakī: “Niospa Juan nīchini nō faito noko yoikī iskafatiro: ‘¿Akka afeskakī mā Juan nikamismamē?’ noko fatiroki,” ikanax yoinānifo. ²⁶ “Akka nō iskafatiroma: ‘Yorafāfe Juan nīchinifo,’ nō fatiroma. Nō yorafoki mesei keyokōichi shinākani Niospa shināmanaino Juan ato yoipaoni,” ikanax xanīfofo yoinānifo.

²⁷ Nāskakaxō Jesús yoinifo iskafakakī: “Nō tāpiama,” faifono Jesúsri ato kemani iskafakī: “Ēri mato yoima tsōa ea nīchinimākī ě iskafanō,” Jesús ato fani.

Meka fetsafaxō feronāfake rafeōnoa Jesús ato yoini

²⁸ Jesús ato yoini: “Meka fetsafaxō ě mato yoinō. Feronāfake fisti fake naetapa rafeya ini. Nāskaxō āfe fake iyoa yoini: ‘Ēfe tare ano kaxō ea yonoxotāfe,’ fani. ²⁹ Askafaito āfe fāke kemani: ‘Ē kapaima,’ fani. Askafiax mā shināx kani.

³⁰ “Askata ãfe fake chipokori yoini iskafakĩ: ‘Mĩri kaxõ ãfe tare ano ea yonoxotãfe,’ fani. Askafaito nãato kemani iskafakĩ: ‘Ia, epa. Ë yonotanõkĩ,’ fafiãx kanima. ³¹ Akka, ¿fatoto a ãfe ãpa fichipaiyai keskafakĩ axonimẽ?” ato faito, “Iyoato axoni,” fanifo. Nãskaxõ Jesús ato yoini: “Ë mato pãraima. Nã xanĩfo kori fĩxomisfo fe, nã kẽro chotaferomafo ãto chaka xatekanax mã Epa Nios Ifofakõikani. Akka mã afaa afeskafaxoma mã Epa Nios Ifofaama. ³² Akka Juan ato maotisafamis oni ato tãpimaxiki afeskax mã itiomãki, Niospa fichipai keskara. Akka mãkai Juan nikamisma. Akka nã xanĩfo kori fĩxomisfo feta nã kẽro chotaferomafãfe nikakõinifo. Akka mãto chaka mã xateama mã afara fetsafo shinãmis,” ixõ Jesús ato yoini.

Meka fetsafaxõ Jesús ato yoini a ato yonoxomis chakafoõnoa

(Mr. 12.1-12; Lc. 20.9-19)

³³ Anã Jesús ato yoini iskafakĩ: “Ea nikakapo ã mato meka fetsafaxõ yoinõ. Tare ifãfe ãfe tare ano uva fanani. Fanaxõ akiki keneakeni. Nãskaxõ mai põkini a mẽraxõ uva tsinĩxiki. Askatari pexe keya fani anoxõ kexexiki tsõa mẽeyamanõ. Mã askafakĩ fetsaxõ ato inãni nã uva tare kexenõfo. Nãskata mai fetsa ari kani. ³⁴ Akka nã fimimistĩa mã ãfe fanafo pachiaino, a yonoxomisfo nĩchini a kexexonafo ato yõkaxõ nã ãfenã tiiri fixotanõfo. ³⁵ Akka nã tare kexexonafãfe a xanĩfo yonoxomis achikaxõ fisti seteketsanifo. Askatari fetsari retenifo. Askatari fetsari tokirinĩ tsakaketsanifo. ³⁶ Nãskakẽ tare ifãfe anã ãfe inafõ ichapakõi nĩchini. Mã foafono nã tare kexemisfãfe ato askari fanifo.

³⁷ “Mā ato askafapaxō āfe fakekōi nīchini aōnoa shināchakatama, ‘Ēfe fake nikatirofokī,’ ixō. ³⁸ Akka mā āfe fake kaito fichikanax nā tare kexemisfo aa ranā yoinānifo: ‘Nato āfe apa naano na fanafo fixii kiki. A nari retekape na āfe fanafo nōkonā inō,’ inifo. ³⁹ Nāskakata achinifo. Mā achikaxō tare pasotai iyokaxō retenifo. ⁴⁰ Akka, ¿mā tare ifo oxō a tare kexemisfo ato afeskafatiromē?” ixō Jesús ato yōkani.

⁴¹ Ato askafaito kemanifo: “Ato retetiro ato noitama yora chakafokē. Nāskaxō tare ifāfe yora fetsafo āfe tare inātiro, nāfāfe inānōfo nā āfenā tiiri mā āfe fana fimifo pachiano,” ixō yoinifo.

⁴² Nāskata Jesús ato yoini meka fetsafaxō: “¿Na kirika kenea anoa mā anemismamē? Iskafakī kenenifo:

Tokiri pexe fapaikakī nā pexe famisfāfe na tokiri chakara ixō potafiafono, fetsafāfe fichikaxō na tokiri sharakōi ikaxō akiki pexe fatirofo. Nāskarifiakī xanīfofofāfe, ‘Nakai afama,’ ikaxō Niospa Fake ōikaspamisfo. Askafafiaifono Niospa āfe Fake katoni nōko Ifo inō. Nāskakē nō akiki inimakōi, ixō kirika ano kenenifo,” Jesús ato fani.

⁴³ “Nāskakē ē mato yoi, taeyoi Nios fe rafexō āfe meka mā ato yoiyomis. Askafixō mā ea nikakaspai. Nāskakē Epa Niospa fetsafo yoi āfe meka ato tāpimanōfo afeska faxō Nios Ifo sharakōifatiromakī. ⁴⁴ Akka tokiriki fetsa pakeki aō xao teketiro. Akka tokiri yoraki pakekī yamakōi fatatiro. Nāskarifiakī ē Niospa Fakekōixō a ea nikakaspafono ē ato omiskōimaxii,” ixō Jesús ato yoini.

⁴⁵ Akka nã Nios ato kifixomisfo ãto xanĩfofo feta fariseofãfe nikanifo Jesús meka fetsafaxõ ato yoiaito. Nãskakaxõ tãpinifo Jesús atoõnoa yoiaito. ⁴⁶ Nãskakaxõ achipainifo. Akka achipaifikani mesenifo yorafãfemãi chanĩmara faifono Jesús Niospa meka ato yoimiskẽ. Nãskakẽ achinifoma achipaifikakĩ.

22

Meka fetsafaxõ Jesús ato yoini a feronãfake ãfiyaino inimayanã piaifoõnoa yoikĩ
(Lc. 14.15-24)

¹ Anã Jesús meka fetsafaxõ ato yoini iskafakĩ: ² “A Epa Nios xanĩfo ika ano iskaraki ã mato yoinõ. Nikakãfe. Nã xanĩfãfe ãfe fake ãfi fiaino fista axoxiki. ³ Akka xanĩfãfe a yonoxomisfo nĩchini ato yoitanõfo fenõfo. Akka mã fõkaxõ ato yoiaino fekaspanifo. ⁴ Nãskaxõ anã a yonoxomis fetsafo nĩchini ato iskafayanã: ‘Ato yoikĩ iskafatakãfe: “Mã xanĩfãfe ãfe fãke ãfiyaino mã itipinĩsharakõi faa pixiki. Æfe fakka efapa mã ato retemana. Askatari fakka fake xoakõiari ato retemana. Mã keyokõi itipinĩsharafakĩ, kookãfe pixikakĩ,” ’ ato fani. ⁵ Akka ato askafaifono ato fe fekaspanifo. Fetsa ãfe tare ari kani. Fetsari kani ãfe afama mĩshti minikai. ⁶ Atirifãfe nã xanĩfãfe inafõ ato achikaxõ ato seteketsayanã ato retenifo. ⁷ Nãskakẽ xanĩfo õitifishkifinakõini. Nãskaxõ ãfe sorarõfo nĩchini a retemitsamisfo ato reteyanã ãto pexefori ato kõakĩ mĩtokakõitanõfo. ⁸ Nãskaxõ xanĩfãfe a yonoxomis fetsafo yoini ato iskafakĩ: ‘Mẽ itipinĩshara faa ãfe fãke ãfiyaino pixiki. Akka nã chakafo ãto kena-manafõ fekaspakõiafokĩ. ⁹ Akka mãri fotakãfe nã

pexe rasi ano. Nãria ato fichixõ nã mã õiaifo ato yoikãfe fenõfo pii fenõfo, êfe fãke ãfiyaino,' ixõ ato yoini. ¹⁰ Nãskakê a yonoxomisfo fai fêtsa fonifo. Mã fõkaxõ yora ichapafo fichikaxõ ato efenifo. Yora sharafo efeta yora chakafori efenifo. Nãskakê xanĩfãfe ãfe fãke ãfiyaino yorafo pexe fospikõinifo.

¹¹ “Nãskakê xanĩfo pexe mẽra ikikaini yorafo feito itipinĩsharafaxõ ato rapati sharakõi ato inãketsani safenõfo ãfe fãke fiſta akaino. Xanĩfo ikikaini ato õikai mã sharakõi safeketsafomakĩ. Akka fistichi rapati shara safea inima, chapokõi safea fichini. ¹² Akka a rapati shara safeama fichixõ yoini: ‘¿Afeskakĩ mã rapati sharakõi safeax mã oamamẽ êfe fãke ãfiyafiaino?’ Askafaino nã feronãfake tooxinima. ¹³ Nãskaxõ xanĩfãfe a yonoxomisfo yoini: ‘Na feronãfake otekere ata metexkeraxõ fakishifã mẽra potakãfe, anoax omiskõipakexanõ eaiyanã,’ ixõ ato yoini. ¹⁴ Nãskarifiyai Epa Niospa yora ichapa kenai a ika ano fenõfo nã ãfe Fake Ifofaifo tii afe ipanakafo,” ixõ Jesús ato yoini.

“¿Xanĩfo nõ kori inãtiromẽ noko yõkaito?” ixõ Jesús yõkanifo

(Mr. 12.13-17; Lc. 20.20-26)

¹⁵ Nãskata mã Jesús ato yoiaito nikakata mã fokanax fariseofo yoinãnifo: “¿Afeskaxõ nõ Jesús afara chaka yoimatiromẽ? Afara chaka noko yoiaito nõ yõaxiki,” ikanax yoinãnifo. ¹⁶ Nãskafakata ãto inafõ nĩchinifo, Herodes ãfe inafõya iskafakĩ yoitanõfo: “Maestro, mã nõ tãpia mã chanĩmakõi yoimis. Nã Epa Niospa noko shinãmapaiyai keskarakõi mã noko yoimis yorafãfe mĩõnoa afara chaka yoifiaifono. Afara mã yoipai mã

ranomisma. Keyokōi nāskarafos mī ato yoimis. ¹⁷ Nāskakē noko tāpimasharafe. Akka chanīmamakī noko yoife na romanō xanīfo nō kopifatiromakī askayamakī nō kopifatiroma rakikīa,” fanifo. Jesús chakafamapaikakī askafanifo.

¹⁸ Askafaifāfe ōikī Jesús tāpini feparapaiyāifāfe. Ato yoini: “Feparamisfāfe, ¿afara chaka mā ea yoimapaimē eōnoa afara chaka yoipaikī? ¹⁹ Akka māto kori exe ea ispakāfe a aō mā xanīfo kopi-famis,” ato fani. Ato askafaito kori exe fisti fōxonifo. ²⁰ Nāskaxō Jesús ato yōkani: “¿Tsōa femānā na keskaramē? ¿Tsōa aneri na kori exe ano ke-neamē?” ixō ato yōkaito, ²¹ kemanifo iskafakakī: “Nōko xanīfo César keskara,” fanifo. Nāskakē Jesús ato yoini: “Akka na kori exe Césarnākē César inākāfe, akka Niosnākē Niosri inākāfe,” ixō Jesús ato yoini.

²² Ato askafaito nikakani, ratekōiyanā. “Kee. Āfe mekakai tsōa finōtiroma,” ikanax a makinoax fonifo ōifaikani.

“¿Yora naax anā otoax afeskatiromē?” ixō Jesús yōkanifo

(Mr. 12.18-27; Lc. 20.27-40)

²³ Nāskatari afia pena fisti saduceofo fenifo Jesús ōifekani. Nā saduceofāfe yoimisfo iskafakakī: “Yora naaxkai anā afeskax ototiroma,” ixō shināmisfo. Nāskakaxō Jesús yōkai fekanī fenifo iskafakakī: ²⁴ “Maestro, Moisés yoini iskafakī: ‘Feronāfake naano āfe āfi feta fake akamax, one fētsa nā kēro fitiro, āfe āfi inō. Mā fixō afeta fake atiro āfe ōchi fake inō,’ ixō Moisés noko yoikī kenenī. ²⁵ Akka nō mia yoikī taefanō. Noko

nikafe chipo noko yoixiki. Akka nã nane tii siete inifo, feronãfake. Āto ochi iyoa ãfiyai taeni. Mã ãfiyax afeta fake akamax nani. Mã ãfe ochi naano chipokoto fini. ²⁶ Nãskarifiai nã chipokori nani afeta fake akamax. Nãskatari chipoko fětsari fini, nãri nani afeta fake akamax. Nãskakanax akikinoax nai keyonifo afeta fake akanamax. ²⁷ Nãskata mã nai keyoafono nã kėrori chipo nani. ²⁸ Akka, ¿a yorafo mã otokaxõ nai mēraxõ, fatoto nã kėro fixiimē, nã fistimãi fīpakaxõ?” ixõ yõkanifo.

²⁹ Askafaifono Jesús ato kemani: “Mākai afaa tãpiama. Nã kirika ano Niospa meka yoikī keneni-fokai mã tãpiama. Nãskaxori Niospa akai keskara ãfe sharaõxõ ari mã tãpiama. Na mã ea fanīrira yoiai,” ato fani. ³⁰ “Akka yorafo nakanax anã otokanax anã ãfiyatirofoma. Kėrofori anã feney-atirofoma. Nãskakanax ãjirifo keskara itirofo nai mēranoax. ³¹ Akka, ¿a yorafo naax otoxiaifo Niospa yoini keskara, a kirika keneano mã õimismamē? ³² Iskafakī Niospa yoini: ‘Ĕfi mī xinifãfe ãto Nioskõiki, Abraham ikaino Isaaca ikaino Jacobo ikaino,’ ixõ Niospa yoini. Akka yorafo mã nafi-afono naafoma keskara Epa Niospa ato õimis. Niospa yoini iskafakī: ‘Ĕkĩa ãto Nioskõi,’ ixõ Niospa yoini.” Nãskara Jesús keyokõi ato yoini.

³³ Saduceofãfe nikanifo Jesús ato askafaito, “¡Aira! ¡Nikakapo! Jesús sharakõi yoi,” ikanax yoinãnifo.

*“Akka, ¿fato meka sharařinakõiamē, nã Niospa shinãmanaino Moisés ato yoiniraka?” ikaxõ farise-ofãfe Jesús yõkanifo
(Mr. 12.28-34)*

³⁴ Nāskakē saduceofo Jesús ato meka xatemanaito nikakaxō fariseofo ichanākanax Jesús ano fenifo. ³⁵ Akka feronāfake fisti a Moisés yoikī kirika keneni keskara ato tāpimamis ini. Nāato Jesús fanīrira kemamapaikī yōkani, ³⁶ “Maestro, ¿fato meka sharafinakōiamē, nā Niospa shināmanaino Moisés keneniraka sharafinakōia?” faito,

³⁷⁻³⁸ Jesús yoini iskafakī: “Moisés yoikī taefani iskafakī: ‘Nōko Ifo Nios noikōikāfe nōko ōitifoyaxō, nōko māpori shināsharakōita, nōko yōshi sharafoyaxori.’ Nā mekafi sharafinakōiakī nā Moisés yoini keskara. ³⁹ Nāskatari nā ē mato taefakī yoia keskarakōiri nāno fetsari, a mia chaima nikari noisharafe a mā mā noimeai keskafakī ixō Moisés keneni. ⁴⁰ Moisés noko yoini keskai afeskax nō shara itiromāki. Askatari a Niospa meka yoimisfāfe yoinifo keskai afeskaxri nō askatiromakī. Akka nō askasharapai nā meka rafe nikakōisharax nō askasharakōitiro,” ixō Jesús ato yoini.

“Akka, ¿tsōa fenamē Cristo?” ixō Jesús ato yōkani (Mr. 12.35-37; Lc. 20.41-44)

⁴¹ Fariseofo afe ichanāyoafono, ⁴² Jesús ato yōkani: “Akka, ¿nā Niospa katoa nā Cristoōnoa, afaa mā shināimē? ¿Tsōa fenamē?” ato faito kemanifo: “David āfe fenakīa,” fanifo. ⁴³ Nāskata Jesús ato yoini: “David Niospa Yōshi Sharapa shināmanaino nōko Ifo Cristoōnoa kirikaki keneni iskafakī Cristo oyoamano. Ē mato yoinō mā shinākōinō:

⁴⁴ Epa Niospa ēfe Ifo yoini iskafakī: ‘Mī efe xanīfokōi ĩpanakaki. Akka nā mia noikaspaifo mī ato finōkōinō ē ato mīnāmā nīchikai,’

ixõ Epa Niospa yoinino David kirika keneni.

⁴⁵ “Akka, ĵafeskai Cristo David ĵefe fena itiomẽ, nã David Cristo ĵefe Ifora fafiapaonino?” Jesús ato fani.

⁴⁶ Ato askafaino nikakakĩ tsõakai pishta kema-
ima. Nãskakẽ akiki ranokakĩ anã tsõa afaa pishta
yõkanima.

23

*Jesús ato yõani fariseofoya a Moisés yoini
keskara ato tãpimamisfo*

(Mr. 12.38-40; Lc. 11.37-54; 20.45-47)

¹ Mã askafata Jesús yorafo yoini aõxõ tãpimisfoya:
² “A Moisés yoikĩ kirika keneni keskara ato
tãpimamisfo feta fariseofãfe a Moisés yoini keskara
mato tãpimakani. ³ Akka ato nikakãfe. Nã mato
yoiaifo keskara akãfe. Akka nãfãfe nã yoiaifo
keskara akanima. Nãskakẽ nã yoiaifo keskara
akãtama afara fetsafo amisfo. Nãskakẽ mãri
ato keskara iyamakãfe. ⁴ Āto patoronõ ato
yoitiro iskafakĩ: ‘Na efekõi pefexõ fõtakãfe,’ ato
fafiãxõ ěri foyoikanõ ato fatiroma. Nãskarifiakĩ
a Moisés keneni ato tãpimamisfo feta fariseofãfe
mato afara fekaõkõi yoimisfo afeskax Epa
Nios fe mã itiomãkĩ Epa Nios matoki inimanõ
ikaxõ. Nãskafikaxõ mato afara axosharamisfoma.
⁵ Afama mĩshti sharafo apaikani yorafãfe noko
õinõfora ikaxõ kakapaiyanã. Niospa meka kirikaki
kenekata koiro kafo pishta fakãta a mẽra Niospa
meka nanekaxõ Āto fishpi ano nẽtamisfo. Askatari
Āto põya anori nẽtamisfo. Askatari tari kepanãtia
chainipa safemisfo sharakõira noko fanõfo ikaxõ.
⁶ Askatari sharakõi anoxõ pipaimisfo, askatari

tsaoti sharakōi anori tsaopaimisfo ichanāti pexe anoax, keyokōichi noko ōinōfora ikanax. ⁷ Nāskakata nā yora ichapa rasi ano fopaikani noko finōkakī noko yoisharakakī, ‘Maestro noko fanōfora,’ ikanax.

⁸ “Akka mā, ‘Maestro, noko fakāfe,’ ato fayamakāfe. Akka keyokōi mā yora fisti keskara. Tsoa fetsakai finama. Akka mātō Maestro fisti finakōiaki. ⁹ Nāskakē iskaratīa nono mai anoxō tsoa Ēpa fayamakāfe. Akka nōko Epa Nioskōi nai mēra ikaki. Nā fisti Epa nō fatiroki. ¹⁰ Askatari tsoa ifofayamakāfe. Akka nā Epa Niospa katonī fisti na Cristo fisti mā Ifofatiro. ¹¹ Nā fatora fetsa xanīfo ipai nā ato yonoxomis keskara itiro. Nāskaxō ato afara axosharatiro. ¹² Akka fatora fētsa ato finōpaiyaito a keskara Niospa ato nāmā nīchitiro anā afaa inōma. Akka a shināi iskai: ‘Ēkai afama, ē fetsafo finōpaima, ē ato keskarama,’ ixō shināito Niospa fetsafo finōmainīfofā sharakōi nīchitiro,” ixō Jesús ato yoini.

¹³ Nāskata Jesús a Moisés yoikī kirika keneni keskara ato tāpimamisfoya fariseofo yoini iskafakī: “Moisés meka ato tāpimamisfāfe, māri fariseofāfe ea nikasharakāfe. Māfi ato pārapaimiski. Mā kai a mā yoia keskara mā ato yoimisma. Mā ato xītimis Epa Nios Ifofayamanōfo. Māri mā Nios Ifofamisma. Nā Nios Ifofapaiyaifo mā ato xītimis. ¡Ooa! Epa Niospa mato fāsi omiskōimaxii.

¹⁴ “¡Ooa! Mā omiskōikai, Moisés meka ato tāpimamisfāfe fariseofo fe. Mā ato yoimiski iskafakī: ‘Nō mato afara shara faxōira,’ ixō mā ato pāramis. Akka kēro ifomafa mā pāraxō mā pexe fīamis. Nāskaxō mā Nios kīfikī mā chaikōi

kĩfimis yorafãfe sharakõi shinãnõfora ixõ. Nãskakẽ Epa Niospa mato fãsi omiskõimaxii.

¹⁵ “¡Ooa, a Moisés yoikĩ kirika keneni keskara ato tãpimamisfãfe, mã omiskõixii fariseofo fe! Akka mã judeofoma ari kafãsamis ato yoikai noko keskara inõfora ikax, nõ mato Niospa meka tãpimanõra ixõ. Askafixõ mã ato yoisharamisma. Nãskakẽ mato nikakanax mato keskarari ikani kiki. Mã chakakõifo nãfori chakafinakõia ikani kiki. Nãskakẽ mã nakanax Epa Nios ari foxikanima. Mato fe nã omiskõipakenakafo mẽra foxikani.

¹⁶ “¡Ooa! Niospa mato omiskõimaxii, mã ato mẽstekõi yoimiskẽma. Mã tãpimafixõ mã ato paramiskĩ ato tãpimapaikĩ. Mã fẽxo keskarakĩ fẽxo afe fẽxo iyoikai nã rafe fenotirofo. Nãskarifiakĩ Niospa meka anoriyamafiano mã ato paramiskĩ iskafakĩ mã ato yoikĩ: ‘Ë mato paraima. Nãskakẽ ã mato yoi, nã ã mato yoiyoa keskara ã ayamaito Nios kĩfiti pexefãne ea omiskõimatiro,’ mã imis. ‘Akka nã Nios kĩfiti pexefã aneõxõ mã yoiyoa keskafakĩ mã ato axoyamaxõ shinãchakayamakãfe. Askafixõ nã Nios kĩfiti pexefã mẽranoa oro aneõxõ mã ato yoiyoa keskafakĩ ato axokãfe,’ ixõ mã ato yoimis. ¹⁷ Mã tatimakõifo, askatari mã fẽxo keskarakõifo. Akka, ¿fato sharafinakõiamẽ? Nã Nios kĩfiti pexefã mẽranoa oro raka sharafinakõia, askayamai Nios kĩfiti pexefã raka sharafinakõia. Akka oro ares rakax shara itiro. Akka Nios kĩfiti pexefã mẽramã rakax shara itiro.

¹⁸ “Nãskarifiakĩ, ‘Nã ã mato yoiyoa keskara ã ayamaito nã a kamakixõ yoinã koati mĩsamãfãne ea omiskõimatiro,’ ixõ yoimisfo. Akka mã fariseofãfe, anorima mã ato yoikĩ iskafamis: ‘Nã mĩsamãfã

aneõxõ mã ato yoiyomis keskafakĩ mã ato axoyamafixõ shinãchakayamakãfe. Askatari nã mĩsamãfã kamakixõ yoinã koaki nã yoinã aneõxõ mã ato yoiyomis keskara akãfe, ixõ mã ato yoimis.

¹⁹ “Akka mã fẽxo keskarakõi. Akka, ¿fato sharafinakõiamẽ? Nã afarafo mã Nios inãi raka sharafinakõia, askayamai a kamakixõ yoinã koati mĩsamãfã raka sharafinakõia. Akka nã yoinã ina ares shara itiroma. Askafix nã shara, mãmã mã Nios inãno mĩsamãfã anoxõ koakĩ. Nãskakẽ nã yoinã inapa nã koati mĩsamãfã finõama. ²⁰ Akka nã koati mĩsamãfã aneõxõ afara yoiaito nã koati mĩsafã fistiõnoa aneima. Akka nã mĩsamãfã kamaki rakaõnoari yoi. ²¹ Akka nã Nios kĩfiti pexefã aneõxõ afara yoikĩ Nios kĩfiti pexefã fistiõnoa yoima. Akka Niosri a mẽra ikano mã yoi. ²² Akka nã nai aneõxori mã afara yoikĩ, nai fistiõnoa mã yoima. Nã Nios Xanĩfo nai mẽra ika anoafori mã yoi.

²³ “¡Ooa, a Moisés yoikĩ kirika keneni keskara ato tãpimamisfãfe fariseofo feta! Ea nikakapo. Mãfi ato parapaimiski. Mãto afama mĩshtifo mã Nios inãpaifikĩ a Niospa afara fetsa yoia keskara mã shinãmisma. Mã mãto fana mĩshtifo nã korãtorofo fana fetsa mĩshtifori mã Nios inãmĩs. Akka fetsafo mã ato yonomaxõ afara fichipaifiaifãfe mã ato noikima mã ato afaa inãmisma. Epa Niospa yoini keskafakĩ mã ato noima. Akka a mã yoiakĩ keskara tsõa mãto meka chanĩmara fatiroma. Nãskaxõ mãto fana mĩshtifo mã Nios inãfikĩ a Niospa yoia keskara mã shinãima. ²⁴ Akka mã nã fẽxo afe fẽxo iyotiroma keskarafõ. Nãskarifiakĩ mãri mẽstekõi shinãsharaima yorafo Niospa meka tãpimapaifikĩ. Nãskaxõ afara sharakõifo mã ato tãpimasharamisma.

Akka afara sharama mǎ ato tǎpimamis. Akka nǎpe pishta mǎto kecho mǎra naneano, mǎ fixō mǎ potamiski. Akka nǎ camello efapakōi mǎ potakaspakī mǎ ayamis.

²⁵ “¡Ooa, a Moisés yoikī kirika keneni keskara ato tǎpimamisfǎfe fariseofo feta! Mǎ ato parapaimiskōi. Akka mǎto kecho yafi mǎto sapa femǎkīa fisti chokasharafikī, oke mǎrakai mǎ chokasharamisma, nachoshtax pisikōi itiro. Nǎskarifiakī mǎ yorafo ōimapai nafa sharafora noko fanōfora ixō. Akka mǎto shinǎ mǎraxō mǎ shara shinǎyamafikī, oa choshta pisi keskaraxō. Nǎskaxō afarafo mǎ ato fīamis fetsafo ratexō. Askatari mareskōi mǎ shinākī, ichapakōi fichipaikī mǎ icha icha famis. Nǎskakē Epa Niospa mato omiskōimakōixii. ²⁶ Fariseofǎfe, mǎkai mǎstekōi shinǎsharamisma. Akka iskaratīa mǎto shinǎ mǎraxō shinǎsharakǎfe, isharakōixikakī. Anǎ afaa chaka shinǎkakima. Nǎskaxō mǎ yorafo ikisharakōitiroki.

²⁷ “¡Ooa, a Moisés yoikī kirika keneni keskara ato tǎpimamisfǎfe, fariseofo feta! Mǎfi ato parapaimiski. Mǎfi nǎ mafa kini keskaraki. Akka mafa kini femǎkīa oxo sharakōi nō ōifiaino oke mǎra sharama. A namisfǎfe āto xaofu fospikōia pisia fetsa fetsatapafu. ²⁸ Nǎskarari shara keskara yorafǎfe mato ōikani. Akka mǎto shinǎ mǎraxō mǎ shara shinǎima. Afara chakakōifo mǎ shinǎmis, ato mǎ parakōimis.

²⁹ “¡Ooa, a Moisés yoikī kirika keneni keskara ato tǎpimamisfǎfe, fariseofo feta! Mǎ ato parapaimis. Nǎskakē Niospa mato omiskōimakī finakōixii. Nǎ mǎto xinifu a Niospa meka yoimisfo fetsafǎfe ato retenifu maiafu ano mǎ tokiri famis

a mǎto xinifo namisfo ato shinǎxikĩ. Nǎskaxori a mairafo mǎnǎo charofori mǎ famis yorafǎfe ōikakĩ na mǎra sharakōira fanōfora ixō. ³⁰ Nǎskaxō mǎ yoimis iskafakĩ: ‘Nōko xinifǎfe a Niospa meka ato yoimisfo retenifo keskafakĩ nōri niyoxō nō ato retekerañima,’ ixō mǎ yoimis. ³¹ Akka nǎ mǎ yoiai keskara chanĩma. Mǎto xinifǎfe ato chakafakĩ ato retenifo. Mǎri ato keskarakōifo. ³² Nǎ Niospa matoki nĩchiari mǎ retexii. Akka nǎ mǎ apaiyai keskafakĩ ayotakǎfe.

³³ “Mǎ afara chakafa fafafǎini. Nǎskakē mǎ rono keskarafō. Mǎ chakafa fafafǎini. Mǎ rono paekapato fake keskarakōifo. Nǎskakē mǎ omiskōipakenakafo mǎra mǎ kaxii. Akka afeskax mǎ faki ichotiroma. Askatari tsōakai mato nētefatiroma. ³⁴ Nǎskakē a Niospa meka yoimis ē matoki nĩchikai. Askatari a Niospa meka tǎpisharakōixō shinǎsharakōimisno ē nĩchikai. Nǎskatari a Moisés yoikĩ kirika keneni keskara ato tǎpimamisfori ē matoki nĩchixii. Nǎskakē atiri mǎ ato retexii. Askatari fetsafori ifi cruz ikaki mǎ ato mastaxii nanōfo. Askatari fetsafori mǎto ichanǎti peXe mēraxō mǎ ato koshaxii. Nǎskakĩ mǎ ato omiskōimakōixii. Nǎskaxori fetsafori mǎ ato chĩfafofǎsa faxii ato omiskōimayanǎ. ³⁵ Nǎskakē Epa Niospa matori omiskōimaxii nǎ mǎto xinifǎfe nǎ yora sharafo retenifono. Akka taefakĩ nǎ Abel sharafiano āfe ōchi reteni. Askatari fetsafori sharafiafono ato retenifo. Chipori mǎ xini ichapa finōano nǎ Zacarías, Berequías fake, mǎto xinifǎfe retenifo. Nǎ Zacarías feronǎfake sharafiano Nios kĩfiti pexefǎ chaimashtaxō koati mĩsamǎfǎ nakirafexō retenifo. Nǎskakē Niospa atoōxō mato omiskōimaki finakōixii. ³⁶ Akka chanĩma ē mato

yoinō. Na yorafo iskaratīa niyoafo Niospa ato omiskōimaki finakōixii,” ixō Jesús ato yoini.

*Jesús Jerusalén anoafo ato shināi oiani
(Lc. 13.34-35)*

³⁷ Anā Jesús ato yoini iskafakī: “¡Ooa, Jerusalén ano ikafāfe! Māfi a Niospa meka yoimisfo mā ato retemiski. Askatari aōnoa āfe meka shara yoi-tanōfo Niospa mato ano nīchiafori mā ato tokorinī tsakakī retemis. Oa takaranā āfe fakefo āfe pei nāmā onetiro keskafakī ē mato kexepaifiaito mā ea nikakaspamis. Māfi ekeki omismakī ē mato īkipanā. ³⁸ Akka ōikapo, iskaratīa anā tsōa mato kexeima nā mā imis anoa. ³⁹ Ē mato yoinō, iskaratīakai mā ea anā ōima. Nā ē oaitīa mā ea ōixii. Nā ē nai mēranoax ē oaitīa mā yoikī iskafaxii: ‘Nafi Niospa nokoki nīchia. Fāsi sharafinakōia Epa Niospa na shara fapanaka,’ ixō mā eōnoa yoixii,” ixō Jesús ato yoini.

24

*Jesús ato yoini: “Na Nios kīfiti pexefā pāoixii,” ixō
(Mr. 13.1-2; Lc. 21.5-6)*

¹ Nāskata Jesús Nios kīfiti pexefā mēranoax tsekekainaino, aōxō tāpimisfo akiki fēkaxō yoinifo iskafakakī: “Ifo, ōipo. Nōko Nios kīfiti pexefā sharakōi,” fanifo. ² Askafaifono Jesús ato yoini: “Na mā ōiai, akka ē mato pāraima anākai tokirifo petsanāmēxima, keyokōi pāoixii. Na tokirifori maoui fetsexii,” ato fani.

*Afaa afeskaximākai mā chaima nōko mai
keyoaino Jesús ato yoini
(Mr. 13.3-23; Lc. 21.7-24; 17.22-24)*

³ Askata fonifo mächifã Olivos ano. Nãno Jesús tsaoni. Nãskakẽ aõxõ tãpimisfo akiki fonifo yõkaxikakĩ iskafakakĩ: “Nõ tãpipai mĩ noko yoinõ afetĩa iximẽ a mĩ yoiai keskai. Afeskaxõ nõ tãpitiromẽ a mĩ anã oxiai mã mai keyoaino noko yoife,” fanifo.

⁴ Askafaifono Jesús ato kemani: “Kex-
emesharakani mã ato nikaino mato afara
chakafamatirofoki. ⁵ Yora ichapa fêkaxõ, ‘È
Cristora,’ ixõ mato paraxikani. ⁶ Nãskaxori mã
nikaxii yorafo retenãifãfe chai inoax. Nãskatari
nonoaxri askaxikani retenãkani. Askara õi,
rateyamakãfe. Nã ã mato yoimis keskakõi kiki.
Nãskafiax nõko mai fena keyoxima kiki, chipo ixii.
⁷ Akka yorafo mai fetsa anoax mēenãpaiyaifono
yora fetsafori mai fetsa anoax retenãxikani.
Askatari fonãiki finakõixikani afaa pikanima.
Nãskatari nã mai fetsa anoax mai naya naya ixii.
Askatari pae finakõia fetsa fetsatapafo nokoxii
kiki. ⁸ Akka taei nã omiskõiaifo, askai fetsexii.

⁹ “Nãskata mato achikaxõ fetsafo mato inãxikani
mato omiskõimanõfo. Nãskaxõ mato retenõfo.
Nãskaxõ keyokõi nã mai tio anoxõ eõxõ mato
noikaspaxikani. ¹⁰ Nãskatari yora ichapafãfekai
ea anã chanĩmara fakanima. Nãskakanax ãa ranã
noikaspa faatanãxikani. Nãskakaxõ yora fetsa
yõsixikani ato achinõfo. ¹¹ Nãskatari yora ichapafo
ãa chanĩxikani iskakani: ‘Ea Niospa shinãmani kiki
ẽ Niospa meka mato yoinõ,’ iki ãa chanĩxikani.
Nãskaxõ yora ichapafo ato pãraxikani. ¹² Nãskaxõ
ato chakakõi faxikani. Ato noimisfo keskafakĩ
atirififãfe anã ato noisharaxikanima. ¹³ Akka nã
ea shinãmakixoma ea shinãkõiai nãfi ãfe Epa Nios
fe ipaxatiroki. ¹⁴ Nãskakẽ na meka shara Jesúsnoa

nikaxakani Jesús noko nāxonikē Epa Nios xanīfo anoax nō afe ĩpaxanō. Na maifo tiĭ ano ato yoiai-fono, chipo nōko mai keyoxii.

¹⁵ “Nā Niospa meka yoimisto Daniel a inōpokoai yoikī keneni iskafakī: ‘Nios kīfiti pexefā mēra afara chakakōi faxikani,’ ixō kirika keneni. Nāskakē na kirika kenea anexō tāpikāfe. ¹⁶ Nā chakafinakōia ōikanax, nā Judea anoafō machi keya ano ichorisatakāfe. ¹⁷ Askatari āfe pexe māmākīa tsoxō ato fichiax koshikōi fotopakekafā āfe afaa fiamax ichotiro. ¹⁸ Askatari a āfe tare ano yonoaito anā oxō āfe rapati fitiroma. ¹⁹ Askatari a kēro fake naneafō fe a fake yome pishta chocho amaifo omiskōixikani māmāi yorafo omiskōifinakōiaifono. ²⁰ Akka Epa Nios kīfikāfe iskafakī: ‘Epa Niosi, noko omiskōimayamafe nōko pena tenetitīa askayamai yōtaino matis meexikakīma,’ ixō yoikāfe. ²¹ Askatari a omiskōiaifo nokoxii, taeyoi askakatsaxakīma. Nā Niospa yora onifakī taefanitīa tsōa askara ōiyomisma. Askatari anā tsoa chipo omiskōinakama. ²² Akka a omiskōiaifo nōko Ifāfe xateyamano, tsoa nikeranama nai keyokeranifo. Akka afe yorafo ato noikī omiskōinōfoma xateni atomāi katonixakī.

²³ “Akka fētsa mato yoikī iskafaino: ‘Ōikapo, nakīa Cristo,’ mato fayanā, ‘Oa onokīa, ōikapo,’ mato faito nikayamakāfe. ²⁴ Akka nā chanīmisfo fekani, ē Cristora ixikani, nāfo nō Niosxō nō mato yoirā ikani. Nāskakaxō tsōa atiroma keskara fakani Satanás yōshixō mato parapaikakī. Nā Niospa ato katoafori nāfo ato parapaikani. ²⁵ Mē mato yoikai iyoamano shināsharakāfe. ²⁶ Nāskakē mato parapaikani: ‘Cristo mā tsōa istoma ano

oa,' ikaxõ. Nāskakē ari foyamakāfe. Askatari mato iskafakani: 'Ōikapo, na Cristo na pexe mēra,' mato faifāfe ato nikayamakāfe. ²⁷ Akka nā kana peikī fafetanaito nō ōitiro keskara, nāskarifiāi ē oxii xafakīakōi ea ōixikani ē oaito. ²⁸ Akka nā naafo ano ishpifo ichanātiro. Nāskari fakī keyokōichi ea tāpixikani ē oaito," ato fani.

“Niospa Fake fotoaino afe keskara iximākai,” ixõ Jesús ato yoini

(Mr. 13.24-37; Lc. 17.26-30, 34-36; 21.25-33)

²⁹ Anā Jesús ato yoini iskafakī: “Akka nā penatari, nā omiskōiaifo mā keyoano, xini fakishkōi ixii, ōxeri anā chaxaxima. Fishifori nai mēranoax pakei fetsexii, askatari nā nai mēranoafo naya naya iki fetsexii. ³⁰ Nāskatari ōixikani nai mēranoax afara afeskaraito mā tāpinō ē fotoaitā. Nāskatari keyokōi nā maitio anoax ratei fetseyanā oiaxikani. Nāskatari ea ōixikani ē nai mēranoax nai kōinī fotoiyoaito. Ē sharafinakōia ēfe sharaōnoax ē fotoaito ea ōixikani. ³¹ Nāskatari ēfe ājirifori ē yoixii āto maneti fāsikōi manekakī chāi chāisafanōfo a nikakanax efe yorafo a ē ato katoa ichanānōfo. Chai inoax fisti rasi efe yorafo fexikani nāno fistiax ichanāxikakī.

³² “Akka shinākapo ē mato yoinō. Mā yōkkafiaino mā tāpitiro āfe pei sirikiaito. Nāskakē āfe peifo keyopakeaito ōikī mā tāpitiro māmāi chaima xiniaito. ³³ Nāskarifiakī afarafo afeskaraito ōikī mā tāpitiro mē chaima oaino askai fetsexii. ³⁴ Ē mato pāraima ē mato yoikōi, na ē mato yoiai keskara nono mai anoxō yorafāfe nayokaxoma ōiyokani. ³⁵ Akka nai

fe mai keyoi. Akka ěfe meka fisti keyonakama, nã ě mato yoiai keskakõi.

³⁶ “Afetĩara nai mēranoax ě oxii tsõakai tãpiama. Nã ãjirifãfe nai mēra ifiakaxõ tãpiafoma. Ĕrikai tãpiama. Ĕfe Epa Nios fistichi tãpia. ³⁷ Akka nã Noé niyoano ini keskai, nãskarifaxii ě anã oaino. ³⁸ Nãskata fakafãnē ato maiyoamano, Noé kanõanãfã mēra ikini, yorafo pikãta, ayakãta fĩanãkãta ikaifono. ³⁹ Akka tsõa shinãyamaino mã faka faipafxõ keyokõi ato ãsakĩ mitokõini. Nãskarifaxii ě oaino ea shinãtama afara chakafai-fono. ⁴⁰ Nãskatari feronãfake rafeta ãto tare ano yonokani. Fetsa ea ari kai yamarisatatiro. Akka fetsa nētetiro nã omiskõipakenakafo mēra kaxiki. ⁴¹ Nãskarifiai kēro rafeta xiki renekani. Fetsa ea ari kai yamarisatanaino akka fetsa nētetiro nã omiskõipakenakafo mēra kaxiki.

⁴² “Nãskakē itipinĩsharakãfe oa mã moinãkafanai keskakãfe. Akka mã tãpiamaki afetĩara ě anã oxikai. ⁴³ Nãskakē mãri nã keskara tãpisharakãfe. Akka pexe ifãfe mã tãpixõ afetĩa yometso nokoimãkai ixõ ãfe pexe itipinĩshara fatiro mã moixõ, a mēra ikiax yometsoyamanõ. ⁴⁴ Nãskarifiai mãri itipinĩsharakãfe. Akka oimara ixõ mã ea manayamaino ě matoki nokorisatani,” ixõ Jesús ato yoini.

*Ina shara yafi ina chakaõnoa Jesús yoini
(Lc. 12.41-48)*

⁴⁵ Anã Jesús ato yoini iskafakĩ: “Ĕ mato yoinõ afe keskaramãkĩ a yonoxomis shara mã tãpinõ. Xanĩfãfe mai fetsa ari kakĩ, a yonoxomis ãfe pexe ano nĩchifaini nãnoxõ a yonoxomis fetsafo a pi-aifo pena tii ato inãfafainõ. ⁴⁶ Mã mai fetsa ari

katani oxõ õitoshini a yonoxomisto mã yonoxosharakõiano. Nãskakẽ akiki inimakõini a yonoxomisri inimakõini mãmãi yonoxosharakõiax. ⁴⁷ Ë mato paraima. Nãskaxõ ãfe xanĩfãfe mã xanĩfo imaxõ ãfe afama mĩshtifo kexexonõ inãtiro. ⁴⁸ Akka nã yonoxomis chakapa shinãtiro: ‘Ëfe xanĩfo fena oimara,’ ixõ. ⁴⁹ Nãskaxõ a yonoxomis fetsafori ato seteketsani. Askatari nã pãemisfo fe rafexõ ato feta piyanã askatari ato feta ayayanã. ⁵⁰ Iskaratĩa ãfe xanĩfo oimara ixõ manasharayamaino nã penata ãfe xanĩfo nokorisatani. ⁵¹ Mã oxõ nã yonoxomis omiskõimaxii. Nã yora keparanãmisfo fomisfo mẽra potaxii. Nãskakẽ anoax oiaiyanã omiskõipakenaka,” ixõ Jesús ato yoini.

25

Meka fetsafaxõ Jesús ato yoini diez xotofake xomayaõnoa

¹ Anã Jesús ato yoini iskafakĩ: “Ë mato yoinõ meka fetsafaxõ mã tãpinõ ã anã oxii a Nios Ifofaafoõnoax afe keskara ixikanimãkai. Akka nã diez xotofake xomayafãfe ãto rãpari fifaikani fonifo. Feronãfãke rama ãfiyaino afe fista mẽra foxikakĩ manai fokani fonifo. ² Akka nã cinco xomayafãfe shinãsharanifoma, itipinĩnifoma. Akka nã cincofãferi shinãsharanifo. ³ Akka nã shinãsharaifãfema ãto rãpari foiyakakĩ ãto kirosĩ fonifoma anã fospixikakima. ⁴ Akka nã shinãsharakõiaifãfe ãto manishomoki kirosĩ fonifo. Askatari ãto rãpari fonifo. ⁵ Akka feronãfake fena nokoyamaino, mã fakishaino, oxakatsa ikani. Nã kẽro xomayafo oxanifo. ⁶ Nãskakẽ yame nakekafanaino nikanifo kenaifãfe iskaifono: ‘Mã nã feronãfake

oi kiki! ;Moinĩfofãkãfe, ifixikaki!’ ato faifono. ⁷ Nãskakẽ nã kẽro xomayafo moinĩfofãkata itipinĩ fakĩ fetsanifo ãto rãparifo õtaketsakakĩ. ⁸ Nãskata nã cinco xotofake shinãsharaifãfema nã cinco xotofake shinãsharaifo ãto kirosĩ pishta yõkanifo: ‘Noko kirosĩ pishta inãkãfe. Nõko rãpari otasharaima kiki,’ ato fanifo.

⁹ “Ato askafaifono nã xotofake shinãsharaifãfe ato kemanifo ato iskafakakĩ: ‘Maa. Nõ mato inãtiroma, nõri afaa otatiroma. Akka mã kaxõ fitiro a kirosĩ miniaifo anoa fitakãfe mãtonã faxikakĩ,’ ato fanifo. ¹⁰ Akka nã cinco xotofakefãfe kirosĩ fiifofãfono nã manaifo feronãfake nokoni. Nãskakẽ nã cinco xotofakefo shara shinãmisfo nã feronãfake mã nokoaino afe pexe mẽra ikinifo afeta fista ayanã pixikãki. Nãskakaxõ pexe fe-poti feponifo. ¹¹ Nãskano nã xotofakefo kirosĩ fitakani anã fenifo. Mã fẽkaxõ iskafakĩ yoitoshinifo: ‘Xanĩfo, noko fe-poti fẽpexõfe nõ ikikanõ,’ faifãfe, ¹² ato kemani: ‘Maa. Êkai mato õimisma, ã mato ikimatiroma,’ ato fani.

¹³ “Nãskarifiakĩ mãri isharakõixõ ea manasharakõikãfe. Afetĩara ã anã matoki oxikai tsõa tãpiamaki,” Jesús ato fani.

*Meka fetsafaxõ koriõnoa Jesús ato yoini
(Lc. 19.11-27)*

¹⁴ Anã Jesús ato yoini iskafakĩ: “Ë anã mato yoinõ Nios xanĩfo iskaraki. Feronãfake mã mai fetsa ari kakĩ a yonoxomis kenaxõ yoini ãfe kori kexexonõ. ¹⁵ Akka a yonoxomis fetsa inãni cinco mil. A yonoxomis fetsari inãni dos mil, fetsari inãni mil. Akka nã kori kexekĩ tãpia ichapa inãni. Akka a kori kexekĩ tãpisharafomari ichapa ato inãnima. Nãskax kani mai fetsa ari. ¹⁶ Akka

ãfe ina fetsa nã cinco mil fiato nã kōri afama mīshti fini. Nāskaxō anã cinco mil fini ãfe afama mīshtiōxō. ¹⁷ Nāskafakīri nã dos mil kori fiato nãatori nāskarifani afianã dos mil kori fikī. ¹⁸ Akka nã mil kori fiato nãato kori oneni ãfe xanīfo mekexokī. Mai kini mēra maifani.

¹⁹ “Akka mā samarakax anã oni ãto xanīfo. Mā oxō a yonoxomisfo nã tres ato yōkani afe tii kori fixofafomākī. ²⁰ Nāskakē nã cinco mil kori fini akiki oi taeni. Nāskaxō ãfe xanīfo kori ināni iskafakī yoiyanã: ‘Xanīfo, mī ea cinco mil kori ināti. Akka ē finōmainīfofã anã cinco mil faxō ē fia. Ōipo. Nakīa mī kori,’ fani.

²¹ “Askafaito ãfe xanīfãfe yoini: ‘Aicho, mī ea yonoxomis sharakōi. Nã pishta ē mia inãoxō mī yonosharakōia. Nāskakē ēfe afama mīshtifo ichapakōi ē mia anã ināi mī ea kexexonō. Nāskakē nã ē inimai keskariai mīri inimafe,’ ixō yoini.

²² “Nāskatari a yonoxomis fetsari chipo oni, nã dos mil kori fini. Oxō yoini iskafakī: ‘Xanīfo, mī ea dos mil kori ināni. Akka ē finōmainīfofã anã dos mil faxō ē fia. Nakīa mī kori,’ fani. ²³ Nãatori askafaito ãfe xanīfãfe yoini: ‘Aicho, mī ea yonoxomis sharakōi. Nã ē mia inãoxō mī yonosharakōia. Nāskakē ēfe afama mīshtifo ē mia anã kexemani. Nāskax mīri nã ē inimai keskariai mīri inimafe,’ fani.

²⁴ “Nāskata a yonoxomis fetsari oni nã mil kori fini. Mā oxō ãfe xanīfo yoini: ‘Xanīfo, ē tāpia mī feronãfake mitsisipakōi. A mī fanama anoa mī fimis. Askatari a mī saakama anoafori mī fimis. ²⁵ Nāskakī ē mesekī ē mia kori maifaxōa. Nakīa mī kori,’ faito ãfe xanīfãfe kemani: ²⁶ ‘Mī ea yonoxomis chakakōi. Askatari mī xanikōi. Akka, ħmī shināmē a ē fanama anoafō fita, a ē

saakama anoafori ẽ fimis? ²⁷ Nãskakĩ nãnori mĩ shinãkĩ mĩ kori banco ano ea fãxõama anã oxõ ẽ kori ichapa fikerana mã ẽfe kori ichapano ẽ anã fikerana,' fani. ²⁸ Nãskaxõ nã anoafo ato yoini: 'Nã feronãfake nã mil kori fiakãfe fetsa inãxikakĩ nã kori diez milya,' ato fani. ²⁹ Akka nã afara ichapaya ichapayakõi itiro. Nãskaxori ãfe afara ranãri anã meketiro. Akka nã afaa ichapayama ãfe afara fiatiro anã afaa ichapaya iyamanõ. ³⁰ Nãskata a yonoxomis chaka mã potaxõ fakishifã mẽra nĩchini nã fakishi mẽranoax oiayanã omiskõipakexanõ," ixõ Jesús ato yoini.

Mã mai keyoaino nã omiskõipakenakafoõnoa Jesús ato yoini

³¹ Anã Jesús ato yoini iskafakĩ: "Ë mato anã yoinõ, ea nikakapo. Ë nai mẽranoax oni. Ë Niosfiã feronãfakekõi ẽ oni. Ë anã nai mẽranoax fo-toyoi, ẽ xanĩfokõi oxii ẽfe ãjirifo fe keyokõi ẽ oxii, ea kemataima mapoi fetsexikani. Askatari efe xanĩfãfe tsaoti ano tsaoxikani. Keyokõi shara-finakõia õixikani. ³² Nãskatari yorafo keyokõi nã maitio anoafo ẽfe ferotai fi ichanãxikani. Nãskakẽ ẽ ato paxkanã faxii nã oveja kexemisto ãfe ovejafoya ãfe cabrafo paxkanã fatiro keskafakĩ. ³³ Nã ãfe inafõ kexemisto ãfe inafõ paxkanã fakĩ ãfe ovejafos ãfe põya kayakai aõri nĩchixii. Askatari ãfe cabrafori ãfe põya mishkiori nĩchixii. Nãskarifiakĩ ẽ yorafo keyokõi ẽ paxkanã faxii. Nã ea Ifofaafos ẽfe põya kayakai aõri ẽ ato nĩchixii, akka a ea Ifofaafo-mafori ẽfe põya mishkiori ẽ ato nĩchixii. ³⁴ Nãskaxõ mẽ xanĩfoxõ ẽ ato yoixii nã ẽfe põya kayakai aõrinoafo ekeki fekãfe, ẽfe Epa Niospa mato in-imamamiski. Nãskakẽ ẽfe Epa Xanĩfo anoa mã

afara fikai nã mai onifaitĩa mato yoiyoni keskara. ³⁵ Akka ã fonãikaito mã ea pimamis; ã nõamãikaitori mã ea ayamamis; ã pexemaisax kafãsaitori, ‘Nono ãfe pexe ano ofe nono oxaxiki,’ mã ea famis. ³⁶ Askatari ã rapatimaiskẽ mã ea inãmis; ã isinĩ ikaitori mã ea kexesharamis; ã karaxa mãra ikikẽri kaxõ mã ea õimis.

³⁷ “Ë ato askafaito ea yõkaxikani iskafakãkĩ: ‘Ifo, çafetĩa nõ mia õimismẽ mã fonãikaito, akka mã fonãikaito nõ mia pimamis? Askatari, çafetĩa nõ mia õimismẽ mã nõamãikaito, akka mã nõimãikaito nõ mia ayamamis? ³⁸ Askatari, çafetĩa nõ mia õimismẽ pexemaisax mã kafasaito, akka nõ mia pexe inãmis ano mã oxanõ, askatari mã rapatimaiskẽ akka nõ mia rapati inãmis? ³⁹ Askatari, çafetĩa mã isinĩ ikaito nõ mia õimismẽ? Askatari, çafetĩa karaxa mãranoa nõ mia õikamismẽ?’ ixõ ea yõkaxikani.

⁴⁰ “Ea askafaifono ã ato kemaxii: ‘Ë mato paraima, nã fetsafo omiskõiaino mã tanaima isharaxõ eõxõ mã axomis.’

⁴¹ “Askatari na ãfe põya mishkiorinoa ã ato yoikĩ iskafaxii: ‘Na ãfe põya mishkiorinoa emakinoax fotakãfe mã chakakõikĩ. Chii xoisai mãra fotakãfe anoax omiskõixikaki. Nã ã chii xoisai itipinĩ fani mãranoax Satanãs chaka fe ãfe yõshi chakafori anoax afe omiskõinakafa. ⁴² Akka ã fonãikaito mã ea pimamisma. Askatari ã nõamãikaito mã ea ayamamisma. ⁴³ Askatari ã pexemaisax kafãsaito, “Nono nõko pexe mãra ife,” mã ea famisma. Askatari mã ea rapati inãmisma. Askatari karaxa mãranoa mã ea õikamisma. Askatari ã isinĩ ikaito mã ea õikamisma,’ ixõ ã ato yoixii.

44 “Ato askafaito yorafetsafāfe yōkaxikani iskafakakī: ‘Ifo, ¿afetīa nō mia ōimismē mī fonāikaito, askatari a mī nōiamāikaito, askatari mī pexemaiskē, askatari mī rapatimaiskē, askatari a mī isinī ikaito, askatari a mī karaxa mēra ikikē nō mia tanamisma nō mia ōikaspamis?’

45 “Ea askafaifono ē Xanīfokōixō ē ato kemaxii iskafakī: ‘Ē mato paraima. Nā omiskōiaifo mā ato tanamisma nafokai afaafoma ixō askatari eari mā tanamisma,’ ixō ē ato yoixii. 46 Nāskakē nāfo nā omiskōipakenakafo mēra foxikani. Akka nā ea Ifoafafo efe nīpanakafo,” ixō Jesús ato yoini.

26

*“¿Afeskaxō nō Jesús retetiromē?” ixō shinānifo
(Mr. 14.1-2; Lc. 22.1-2; Jn. 11.45-53)*

1 Nāskata mā ato yoikī keyota Jesús aōxō tāpimisfo yoini: 2 “Mā mā tāpiakī oxa rafeta Pascua fista ikiki. Nāskatari Pascua fistatīa ea achikani fetsafāfe ea mastanōfo,” ixō Jesús ato yoini.

3 Nāskakē a Niospa meka yoimis xanīfofo fe a judeo anifofo ichanānifo Caifás pexe anoax. Nā Caifás ato Nios kīfixomisfāfe āto xanīfo ini.

4 Nāno ichanākanax yoinānifo: “¿Afeskaxō nō Jesús achitiromē paraxō retexiki?” ikanax yoinānifo.

5 Nāskakanax yoinānifo: “Fistatīakai nō achitiroma yorafā rasi mekai fetsekani nokoki ōitifishkitirofo,” ikanax yoinānifo.

*Kēromā Jesús shinākī āfe mapoki pirofomā na-
chini*

(Mr. 14.3-9; Jn. 12.1-8)

6 Nāskata Jesús Betania ano ini Simón pexe ano. Nā Simón “Rashkishiai” fapaonifo. 7 Jesús

nānoxō piaino kēro fisti akiki kani pirofomā manishomo sharakōikī foikai nā manishomo āfe ane alabastro. Akka nā pirofomā kopikōi ini. Jesús mīsa ano tsoxō piaino, nā kēromā āfe mapoki pirofomā nachini. ⁸ Askafaito ōikani Jesúsxō tāpimisfo ōitifishkiyanā iskanifo: “¿Afeskakī nā pirofomā shara mī nachimē? ⁹ Mī ato minixō mī kori ichapa fixō a afaamaisfo mī ato inākerana,” fanifo.

¹⁰ Askafaifāfe nikakī Jesús ato yoini: “¿Afeskakī na kēro mā fekaxtefaimē? Na ea iskafai sharaki,” ato fani. ¹¹ “Akka nā afaamaisfori mato fe ipanakafo. Akka eakai mēxotaima mā ea anā ōima. ¹² Akka na kēromā ea iskafakī ēfe yoraki pirofomā nachia ea itipinīsharafakī ea iskafa ea maifasharaxinōfo. ¹³ Ē mato pāraima, fanīxōra na meka shara eōnoa yoikakī nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafo, shināmakiyamaxikakī,” ixō Jesús ato yoini.

*Judaspa aōxō tāpifikatsaxakī Jesús ato achimani
(Mr. 14.10-11; Lc. 22.3-6)*

¹⁴ Nānori Jesús ato yoiaino a aōxō tāpimis fetsa, āfe ane Judas Iscariote, nā kani nā ato Nios kīfixomis xanīfofo ano. ¹⁵ Mā kaxō ato yoini: “¿Afe tii mā ea kori inātiromē ē mato Jesús achimanō?” ato faito yoinifo: “Treinta nō mia inātiro,” fanifo. ¹⁶ Nāskaxō Judaspa shinākī taefani: “¿Afeskaxomāi ē Jesús ato achimanō?” ixō shināni.

*Mā chaima reteaifono Jesús aōxō tāpimisfo feta
yātapake pini
(Mr. 14.12-25; Lc. 22.7-23; Jn. 13.21-30; 1 Co. 11.23-26)*

17 Akka nã Pascua fistatĩa pãa faraxatimais pi-paonifo. Nãskata mã fista pakeano aõxõ tãpimisfo akiki fokaxõ yõkanifo: “¿Fanĩ mĩ fichipaimẽ ano kaxõ nõ itipinĩ fanõ, anoxõ Pascuatĩa yãtapake pixiki?” fanifo.

18 Askafaifono Jesús ato kemani iskafakĩ: “Oa pexe rasi ano fotakãfe. Nãnoa feronãfake fetsa fichixõ yoitakãfe iskafakĩ: ‘Nõko Ifãfe noko yoia nõ mia yoiyonõ iskafaki: Mẽ chaima naikai. Nõko fistatĩa mĩ pexe anoxõ eõxõ tãpimisfo feta ã pii kaikai,’ ixõ yoitakãfe,” ato faano, 19 nãskafakĩ yoinifo nã ãto Ifãfe ato yoia keskafakĩ. Nãnoxõ itipinĩ fanifo Pascua fistatĩa pixikakĩ.

20 Jesús mã fakishaino pexe ano nokoax mãsa ano tsaoni a aõxõ tãpimiskõifo fe. 21 Nãnoxõ piyanã ato yoini: “Ë mato pãraima, fatora mã fẽtsa ea mã ato achimafainaka,” ato fani.

22 Ato askafaifo nikai shinãmitsakõinifo. Nãskaxõ yõkaketsanifo: “¿Ëraka, Ifo?” fakĩ fetsanifo.

23 Askafaifono Jesús ato kemani: “Nã efeta sapakinoa pãa momoxõ piaito nãato ea ato achimaxii. 24 Ë Niospa Fakekõifiax ã yorakõi. Nã eõnoa yoikĩ kirika kenenifo keskakõi fakĩ ã asharakõitiro. Akka nã feronãfake ea ato achimafiax akairi omiskõikõixii. Akka nã feronãfake shara ikerana fakeyamanixakĩ,” ixõ Jesús ato yoini.

25 Nãskakẽ Judaspa nã ato achimanaito yõkani: “Maestro, ¿ëraka?” faito, “Ëje, nã mĩ yoiai keskarakĩa,” Jesús fani.

26 Nãskakaxõ piaifono Jesús pãa tsomainĩfõã Apa Nios kĩfini. Mã Apa kĩfita pãa kaxkeketsaxõ aõxõ tãpimisfo inãni ato iskafayanã: “Na ãfe nami keskara pikãfe,” ato fani.

²⁷ Ato askafata kechokinoa fimi ene tso mainĩfofãxõ Apa Nios kĩfini. Nãskaxõ aõxõ tâpimisfo ato ayamani ato iskafayanã: “Na fimi ene ayakãfe,” ato fani. ²⁸ Nãskaxõ ato yoini: “Nafi êfe imi keskaraki. Akka nã ã mato yoiyoni keskai mē nai. Nãskakaxõ êfe imi õikaxõ tâpitirofo Epa Niospa yoiyoni keskafakĩ yora ichapafo ã ato chaka soaxonõ. ²⁹ Akka anã ã mato yoinõ ã anã mato feta fena na fimi ene ayaima. Mã mã nai mēra kano ã mato feta anã fimi ene ayaxii êfe Epa xanĩfo anoxõ,” ixõ Jesús ato yoini.

*“Ë Jesús õimisma,” Pedro ixiano Jesús ato yoini
(Mr. 14.26-31; Lc. 22.31-34; Jn. 13.36-38)*

³⁰ Nãskakata mã fanãiki xatekata machi Olivos ano fonifo. ³¹ Nãnoxõ Jesús ato yoini: “A na fakishi keyokõi mã ea shinãmaki fetsei. Nãnori kirika kenenifo iskafakakĩ: ‘Ãfe ifo reteaifono, ãfe ovejafo ichoi fetsetirofo,’ ixõ kirika kenenifo,” ato fani. ³² “Akka ea retefiafono ã otoax ã Galilea ano rekē kai mã kayoamano,” ato faino, ³³ Pedro kemani: “Keyokõi shinãmakifiaifono, akka êkai mia shinãmakima,” fani.

³⁴ Askafaito nikakĩ Jesús yoini: “Ë mia pãraima na fakishi takara fene keofamano, ‘Ë Jesús õimismara,’ mĩ ea fai tres fakĩ,” fani.

³⁵ Askafaito nikakĩ anã Pedro kemani: “Maa. Mia retefiaifono ã mefe nai. Ë õimismara ã mia faima,” fani. Pedro askafaito nikakakĩ keyokõichi aõxõ tâpimisfãfe askafakĩ fetsanifo.

*Getsemaní anoxõ Jesús Apa Nios kĩfini
(Mr. 14.32-42; Lc. 22.39-46)*

³⁶ Nāskata Jesús kani aōxō tāpimisfo fe Getsemaní ano. Nānoxō ato yoini: “Nono tsaokāfe onī chaimashta kaxō ē Epa Nios kīfiyotanō,” ato fani.

³⁷ Akka Pedro iyonī, Zebedeo fake rafe yafi. Nāskaxō āfe yora meeni shināmitsakōīyanā fekaxteaito. ³⁸ Anoxō ato yoini: “Ēfe yōshi shināmitsai napaiyaito ē meikai. Nono nētekāfe oxakakima māri efeta ōisharaxikakī,” ato fani.

³⁹ Ato askafata Jesús ares fisti ori chaimashta kani. Nānoax maikiri fepepakekafata āfe fishpi mai tiisani. Nāskaxō Apa kīfini iskafakī: “Epa, na ē omiskōiai ekeki nokoyamafe. Akka nā ē apaiyai keskafakima. Nā mī ea amapaiyai keskafafe,” fani.

⁴⁰ Nāskata anā anoris oni aōxō tāpimisfo ano. Oxō ato ōia oxafō inifo. Nāskaxō Pedro yoini: “¿Mā efeta pishta oxa tenetiromamē?” ato fani.

⁴¹ Nāskafata anā yoini: “Moikaxō Epa Nios kīfikāfe Satanás chakata mato chakafamapaiyai keskara axikakima. Chanīma, nā Epa Niospa mato amapaiyai keskara mātō shinā mēraxō mā apaifikī mā atiroma. Akka mātō yora pachikōikī,” ato fani.

⁴² Ato askafata anā kani Apa Nios kīfikai iskafakī: “Epa, ea mīa omiskōīmayamakī ea mīa omiskōīmatiroma. Akka nā mī ea amapaiyai keskafafe,” fani.

⁴³ Nāskata anā oxō ato fichitoshini aōxō tāpimisfo oxafono, oxa paemei fetsoafono. ⁴⁴ Nānoa ato ōifaini kaxō anā Apa Nios kīfini, afia yoitana keskafakī. ⁴⁵ Nāskata Jesús anā oni aōxō tāpimisfo ano. Mā oxō ato yoini: “¿Aimā oxamē tenekōīyanā? Akka iskaratīa a ea ato achimaniyoai mā chaima oi kiki. Yora chakafāfe ea achifenōfo ato efei kiki.

46 Fininĩfofãkãfe nõ kanõ. Mã chaima oi kiki a ea ato achimaniyoai,” Jesús ato fani.

Jesús achinifo

(Mr. 14.43-50; Lc. 22.47-53; Jn. 18.2-11)

47 Jesús ato yoiaino Judas nokoni, nã Judaspa Jesúsxõ tâpifikatsaxakĩ, yorafã rasifo fe oni. Nã yorafo kenofoya ifi xatefoya fenifo, a ato Nios kĩfixomisfãfe ãto xanĩfofo feta judeofãfe ãto xanĩfofofãfe ato nĩchiafono. 48 Judaspa nã ato efeaito ato yoiyoni iskafakĩ: “A ã kokoki tsoo akaito õikĩ achirisafaxikãki,” ato fani.

49 Mã Jesús ano nokoxõ Judaspa iskafakĩ yoini: “Maestro, ¿mĩmẽ?” fatishoni. Nãskaxõ kokoto-shini.

50 Askafaito õikĩ Jesús kemani: “Efe yora, nã mĩ apaiyai keska farisafafe,” fani.

Askafaito õikakĩ nã Judas fe foafãfe Jesús achinifo. 51 Akka Jesús achiaifãfe õikĩ a aõxõ tâpimis fẽtsa ãfe keno chainipa tsekainĩfofã a ato Nios kĩfixomisfãfe ãto xanĩfãfe ina paxteni.

52 Askaito õikĩ Jesús yoini: “Mĩ keno fafe. Akka nõ kenopa retenãino kenopari noko retetirofo.

53 ¿Mĩ tâpiamamẽ Epa Nios ã yoiaito iskaratĩa ãfe ãjirifo ichapakõi ea nĩchixotiro ea kexei fenõfo?” fani. 54 “Ë iskaratĩa ãjiri kenano ea kexeaifono ã naima. Akka nã Niospa meka yoikĩ kirika kenekĩ yoinifo keskai ã naikai,” Jesús ato fani.

55 Askaifono õikĩ Jesús yorafo yõkani: “¿Afeskai kenofoya ifixatefoya mã oamẽ ea achiyoi oa ã yometso keskarakẽ? Pena tii ã mato fe itiani Nios kĩfiti pexefã mẽraxõ ã mato tâpimani, akka mãkai

ea achipaimisma. ⁵⁶ Akka nã eõnoa yoikĩ kenenifo keskafakĩ mã ea achi,” ixõ Jesús ato yoini.

Ato askafaino aõxõ täpimisfo Jesús õifaikani. Ichoi fetseenifo a makinoax.

Xanĩfo finakõiafo ano Jesús iyonifo

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Mã Jesús achikaxõ a ato Nios kĩfixomisfãfe ãto xanĩfo Caifás ãfe pexe ano iyonifo. A xanĩfofo fe a Moisés yoikĩ kirika keneni keskara ato täpimamisfo fe a judeo anifofo fe nã tsoafo ano Jesús iyonifo. ⁵⁸ Pedro chai ixõ õini faki Jesús iyoi fokanimãkai. Nãskaxõ ato chĩfafoni. Nãskata nã ato Nios kĩfixomisfãfe ãto xanĩfãfe pexe emãiti ano Pedro nokoni. Mã nokoax nãno tsaoni nã pexefã kexemisfo fe anoxõ Jesús afeska fakanimãkai õixiki.

⁵⁹ Nã Nios kĩfixomis xanĩfofo feta a ato fe rafeafãfe Jesús noikaspakakĩ, “¿Afaa nõ fatiromẽ Jesús afaa chakakõi faamakĩ nõ retexiki?” ixõ shinãnifo. ⁶⁰ Akka Jesús afaa chakafayamafiano, yora ichapafãfe ãa chakafakakĩ mekafanifo parakĩ. Akka aõnoa afaa chaka nikanifoma. Nãskakẽ feronãfake raferi mekafai fekani fenifo. ⁶¹ Nã rafeta yoinifo: “Mã nõ nikaita Jesús iskaito: ‘Ë na Nios kĩfiti pexefã ã pão fatiro. Nãskata tres nia oxata ã anã pexefã fatiro,’ ikaito nõ nikaita,” fanifo nã rafeta ãa parakakĩ.

⁶² Askafafono a ato Nios kĩfixomis xanĩfo fininĩkafãta Jesús yõkani: “¿Mĩ kemamitsaimamẽ afamẽ na mĩõnoa meka chaka yoiaifo?” ixõ yoini.

⁶³ Akka Jesús tooxinima. Nã Nios ato kĩfixomis xanĩfãfe yoini iskafakĩ: “Nã Nios nipanakato mia

õi kiki mĩ yoikai chanĩmakõi, noko yoife mĩmākĩ Cristo Niospa Fake,” fani.

⁶⁴ Askafaito nikakĩ Jesús kemani: “Nã mĩ ea yoiyai keskarakĩa, ěkĩa Niospa Fake. Ě mato yoinõ. Akka mã ea õixii ěfe Epa ketaxamei ěfe põya kayakai aõri ě tsãokẽ xanĩfo finakõia ěfe Epa fe. Askatari mã ea õixii nai kõi mẽranoax ě anã foto-faito,” Jesús ato fani.

⁶⁵ Ato askafaito nikakakĩ a Nios ato kĩfixomisfãfe ãto xanĩfãfe ěfe rapati faxteni yorafãfe tãpinõfo Jesús yoiaito nikakaspakĩ. Askafata yoini: “Na feronãfãke ěfe meka chakakõi Nios chakafakĩ mekafai. Mã nõakõi nõ nikakĩ noko anã tsõa yoitromaki nõ tãpinõ,” ato fani. ⁶⁶ “¿Afe keskara mã shinãimẽ?” ato faito keyokõichi kemanifo: “¡Nanõki!” fanifo.

⁶⁷ Mã fenexkaxõ ěfe femãnãki kemo mechoket-sayanã koshaketsanifo. Atirito fepasketsanifo.

⁶⁸ Iskafakĩ yoiyanã: “Mĩkai Cristomākĩ, noko yoife tsõa mia koshaketsamakĩ,” fanifo.

“Ě Jesús õimisma,” Pedro ini

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedro nãno ato fe pexefã emãiti tsaono, nãno kẽro xomaya a xanĩfo yonoxomis akiki kaxõ yoini: “Mĩri Jesús fe kafãsamis Galilea anoax,” faito, ⁷⁰ Pedro kemani, yorafãfe õiaifono iskafakĩ: “Ěkai Jesús õimisma. Ěkai afaa tãpiama tsoaraõnoa mĩ yoi,” fani.

⁷¹ Nãskafata pexe fepoti ano kani. Nãnoa kẽro xomaya fẽtsari fichixõ fetsafo yoini: “A nari Jesús fe Nazarete anoax kafãsamis,” fani.

⁷² Askafaino anã Pedro kemani: “Maa, nã mĩ yoiyai keskara Niospa tãpia ã na feronãfake õimisma,” fani.

⁷³ Nãskafaino nã anoafãfe Pedro ano fõkaxõ yoinifo: “Chanĩma, mĩri Jesús fe rafemis mã nõ mia nikai mĩ mekaito, nã keskara,” fanifo.

⁷⁴ Nãskafaifono Pedro ato yoikĩ taefani iskafakĩ: “Ë mato paraima, Niospa ea õi ã chanĩkẽ Niospa ea omiskõimatiro. Niospa tãpia ã mato yoikõi nã feronãfake ã õimisma,” ixõ ato yoini.

Pedro askaino takara keoinãkafani. ⁷⁵ Nãskaino Pedro shinãni nã Jesús yoita keskara. “Takara keoyoamano mĩ ato yoikĩ tres faxii: ‘Ë Jesús õimismara,’ mĩ ixii,” ixõ Jesús yoita keskara Pedro shinãtani. Nãskata Caifás pexefã mẽranoax kãikainax oiai finakõini.

27

Pilato ano Jesús iyonifo

(Mr. 15.1; Lc. 23.1-2; Jn. 18.28-32)

¹ Nãskata mã penaino keyokõi a ato Nios kĩfixomis xanĩfofo fe judeo anifofo yoinãnifo: “¿Afeskaxõ nõ Jesús retetiromẽ?” ikanax yoinãnifo. ² Nãskakaxõ metexkere akaxõ Jesús iyonifo Pilato ano. Nã Pilato ãto xanĩfo yora fetsa Roma anoa ini.

Judas nani

³ Judaspa Jesús ato achimaxõ reteifãfe õikĩ shinãmitsayanã ato treinta kori exe inãni, a ato Nios kĩfixomis xanĩfofoya judeo anifofo. ⁴ Ato iskafayanã: “Ë chakafaa, Jesús afaa chakafayamafiãmiskẽ. Paraxõ ã ato achimana retenõfo,” ato

faito kemanifo: “Nōkai aōnoa afaa shināchakaima. Mīa mī shināchakakōi,” fanifo.

⁵ Askafaifāfe nikai nā Nios kīfiti pexefā mēraxō ato nāmā kori exe saafaini kaax āari tenexemeax Judas nani.

⁶ A ato Nios kīfixomis xanīfofōfāfe anā kori finifo iskayanā: “Na kori exe imi foano mā chakanaki. Nāskakē a kori fati mēra nō nanetiromaki,” ikax yoinānifo.

⁷ Nāskakanax yoinānifo: “A na kōri nō mai finō ano yora fetsafo maifaxiki. Nā neo kesho fakakī neo fimisfo anoa nā mai nō finō,” ikanax yoinānifo.

⁸ Nāskakē nā mai anakī fetsafanifo. “Imi Mai,” fanifo. Akka iskaratīari, “Imi Mai,” famisfo. ⁹ Nāskakē nā Niospa meka yoimisto Jeremías a inōpokoai yoikī kirika keneni keskakōini. Iskafakī yoikī keneni:

Kori exe treinta fixikani nā israelifāfe yoinifo keskafakī. ¹⁰ Nāskakē nā kōri kesho faxii mai fimisfo anoa nā mai finifo nā Niospa ea yoiyoni keskafakī, ixō Jeremías keneni.

Pilato xanīfāfe Jesús yōkani

(Mr. 15.2-5; Lc. 23.3-5; Jn. 18.33-38)

¹¹ Jesús iyonifo Pilato xanīfo ano. Mā iyofono nānoxō yōkani iskafakī: “¿Mīmē judeofāfe xanīfo?” faito Jesús kemani: “Ēje, nā mī ea yoiai keskarakīa,” fani.

¹² Akka nā ato Nios kīfixomis xanīfofo feta judeo anifofōfāfe, “Mī chakakōi famis,” pārakī fanifo. Askafaifono Jesús ato kermanima. ¹³ Nāskakē Pilato yōkani: “¿Mī nikaimamē mia chakafakī mekaifaifāfe?” fani.

14 Askafaito nikakĩ, Jesúskai pishta kemanima. Nãskakẽ xanĩfo Pilato, “Kee, ¿afeskai ea kemaimamẽ?” ixõ shinãni.

Pilato ato yoini Jesús retenõfo

(Mr. 15.6-20; Lc. 23.13-25; Jn. 18.38-19.16)

15 Akka Pascua fistatĩa xanĩfo Pilato yora fisti karaxa mēranoa kãimapaoeni. Nã yorafãfe kãimapaiyaifo ato kãimaxopaoni. 16 Akka nã karaxa mēra ika feronãfake chakakõi ini, ãfe ane Barrabás ini. 17 Nãskakẽ yorafo ichanãfono Pilato ato yõkani: “¿Fato mã fichipaimẽ ã mato kãimaxonõ? ¿Barrabás iyamai Jesús nã Cristo nã Niospa nĩchini ã kãimatiromẽ?” ato fani.

18 Akka mã Pilato tãpia ini judeo xanĩfãfe shinãchakaito nõ anã xanĩfo itiromara ixõ, a ano Jesús iyoaifono.

19 Nã xanĩfãfe tsaoti kamaki tsoxõ Pilato shinãino, ãfe ãfinĩ ãfe ina nĩchini Pilato yoitanõ: “Mĩ ãfinĩ ea yoia ã mia yoinõ iskafakĩ: ‘Na feronãfake afaa chakafamismakĩ afeska fayamafe. Ëfe namapa aõxõ chakakõi ã namakĩ,’ mia faa,” ãfe inapa fani.

20 Akka nã ato Nios kĩfixomisfãfe ãto xanĩfofo feta judeo anifofofãfe ãfe yorafo ato yoinifo iskafakakĩ: “Jesús kãiyamanõ. Akka Barrabás kãinõ. Jesús ato retemanõ Pilato yoikãfe,” ato fanifo. 21 Askaifãfe xanĩfo Pilato anã ato yõkani: “Fato mã fichipaimẽ ã mato kãimaxonõ ea yoikãfe,” ato faito, “Barrabás kãimafe,” fanifo.

22 Anã Pilato ato yõkani: “Akka, ¿ã Jesús nã Cristo famisfo ã afeska faimẽ?” ato faito, keyokõichi kemanifo: “¡ifi cruz ikaki mastamafe!” fanifo.

²³ Askafaiŕāfe nikakī Pilato ato yoini: “Akka, ĵnaato afaa chakafamē?” ato fani.

Ato askafaito nikakakī fāsikōi yoinifo: “¡Mastafe!” fanifo.

²⁴ Akka Pilato ōia tsōa nikakanima inifo. Yorafā rasi fāsikōi mekanifo. Nāskakē āfe ina faka fixotanō nīchini. Askata mechokomeni yorafāfe ferotaifi ōinōfo ato iskafakī yoiyanā: “Ēkai afaa-maki na feronāfake ē retepanā. Mā mā apaikai akāfe. Eōnoax naima kiki. Matoōnoax nai kiki,” ato fani.

²⁵ Ato askafaito yorafāfe kemanifo: “Akka nō akikai retekī nō tenetiroma nokoōnoax nai. Nōko fakefoōnoaxri nai,” fanifo.

²⁶ Nāskakē Pilato Barrabās ato kāimaxoni. Nāskata mā Jesús ato koshamata ifi cruz ikaki mastatanōfo ato yoini.

²⁷ Askata sorarofāfe Jesús iyonifo xanīfāfe pexefā ano. Nānoax sorarofō ichanākanax Jesús kemataima niakenifo. ²⁸ Nāskakaxō āfe rapati pēkakaxō, rapati ōshi nana safemanifo, xanīfāfe tari keskara. ²⁹ Nāskatari moxa chainipafo maiti fākaxō maimanifo. Āfe mēke kaiyakai aōriri ifi chati tsomamanifo. Nāskakaxō āfe ferotaifi ratokonō mai chachipakefōfā āto xanīfo feyakanakōi keskarakaxō kaxemetsamakōi fanifo, iskafakī: “Mī sharakōi. Mīfi judeofāfe āto xanīfo,” fanifo kaxefakakī. ³⁰ Nāskakata akiki kemo mechokata, afia ifi xate tsoma fīakaxō aō mapoki koshanifo. ³¹ Mā kaxemetsama fakaxō, tari ōshi fīakata, Jesús āfe rapatikōi safemakaxō iyonifo mā mastai fokakī.

Jesús ifi cruz ikaki mastanifo
(*Mr. 15.21-32; Lc. 23.26-43; Jn. 19.17-27*)

³² Anoax fōkakī, feronāfake fisti fichinifo āfe ane Simón. Nā Simón Cirene anoa ini. Nāskaxō yoinifo: “Na Jesús ifi cruz ika foxōi afe,” fanifo.

³³ Nāskakata nokonifo machi āfe ane Gólgota ano. (Nā āfe ane fetsa Mapo Xao fanifo.) ³⁴ Nānoxō fimi ene moka osia Jesús ayamapainifo. Akka Jesús mā meexō ayakaspani.

³⁵ Nāskata mā Jesús mastakaxō āfe rapati fīanifo. Sorarofāfe makex tokoronō tsakaketsakaxō nāskakaxō sakka sakka anifo kanānōnākakī. Nā kanāto Jesús tari fōani. Nāskaxō Jesús rapati fetsa fīanifo. ³⁶ Mā Jesús mastakanax nāno tsaonifo anoxō kexexikakī. ³⁷ Nāskaxō āfe mapo mǎnāori tafaraki kenexō mastanifo. Mā retekaxō kenekī iskafanifo: “Jesúsfi judeofāfe xanīfoki,” ikaxō kenenifo.

³⁸ Jesús yafi yometso rafe mastanifo, fetsa āfe pōya kayakai aōri ata, fetsari āfe pōya mishkiori anifo. ³⁹ Nā ano finōfāifāfe ĭchayanā āto mapo rafe rafeanifo. ⁴⁰ Iskafakī yoinifo: “Mī yoimis ē Nios kīfiti pexefā pāofaxō ē tres nia oxata ē anā axii pexefā fakī mī imiski, akka mī ifimetiromākī mīa ifimefe. Mī Niospa Fakemākī na ifi cruz ikakinoax fotopakekafāfe,” fanifo.

⁴¹ Nāskariakani akiki kaxemetsamanifo a ato Nios kīfixomisfāfe āto xanīfofo fe a Moisés yoikī kirika keneni keskara ato tāpimamisfo a judeofāfe āto xanīfofori āa ranā yoinānākani iskanifo: ⁴² “Naato fetsafo ififitiroxakī, akka āakai ifimeima. A nafi israelifāfe ato xanīfokī, akka ifi cruz ikakinoax fotoano nō chanīmara fai. ⁴³ A naato Nios shināmis. Mēxotaima noko yoimis: ‘Epa Nios ēfe

Epakōira, noko famis. Akka chanĩmamakĩ Niospa noikĩ ifimākai nō ōinō,” ixō mekafakĩ chakafanifo.

⁴⁴ Nāskaxō nā yometso rafeya mastafono fětsa chakafakĩ mekafakĩ ĩchani.

Jesús nani

(Mr. 15.33-41; Lc. 23.44-49; Jn. 19.28-30)

⁴⁵ Nāskata xini keya nā mai tio fakishifākōi itani. Nāskax mā xini kaino anā penani. ⁴⁶ Nāskata mā penano Jesús fāsikōi āfe mekapa kenai iskani: “Elí, Elí, ¿lema sabactani?” Nōko mekapa iskafakĩ yoini: “Ĕfe Nios, Ĕfe Nios, ¿afeskakĩ mĩa ea potamě?” fani.

⁴⁷ Nāskaito nā ano niafāfe nikakakĩ iskafanifo: “Nikakapo, nā ato Niospa meka yoipaoni Elías kenai kiki,” fanifo.

⁴⁸ Nāskaito nikafaini fetsa ichoni xapo keskara fiikai. Nā xapo keskara fimi ene kachaki momoxō tafa xate kaxkexō akiki aō nētaxō ayamapaini.

⁴⁹ Askafaito ranārito yoinifo: “Enefe. Elías nai mēranoax fotoxō ifimākai nō ōinō,” fanifo.

⁵⁰ Anā Jesús fāsikōi ea ini. Nāskax nani.

⁵¹ Mā Jesús natanaino, sama nami Nios kĩfiti pexefā mēranoax naki rafekōi faxtepakekafāni fomākĩanoax. Nāskatari mai naya naya ini. Tokirinĩfāfori kaxkei fetseni. ⁵² Nāskakē a maiāfo anoax kini fepekemetani. Akka a Nios Ifofaafo nakatsaxakakĩ otoiñifofānifo. ⁵³ Nāskakata maiāfo anoax fonifo. Mā Jesús otoiñifofānifo. ⁵³ Nāskakata maiāfo anoax fonifo. Mā Jesús otoiñifofānifo. Nānoxō yora ichapafāfe ōinifo.

⁵⁴ Nāskata soraro xanĩfāfe a afeta Jesús kexeāfo feta ōinifo mai naya naya ikaito afarāfori afeskara ikaito. Nāskakē ratekōiyanā yoinānifo iskayanā: “Chanĩma, na feronāfake Niospa Fake ika,” fanifo.

⁵⁵ Kērofāferi chaimashta nikaxō òinifo. Kēro icha-pafāferi Jesús fe fopaonifo Galilea anoax ato afara axosharamisno. ⁵⁶ Nā tiixō Jesús òinifo. María Magdalena ikaino María fetsari ikaino, nā María Jacobo feta José āto afa ini. Askatari kēro fetsari ini Zebedeo āfe āfi. Āfe fake rafe Santiago fe Juan ini. Keyokōichi Jesús òinifo chaimashta nikaxō.

Jesús makex kini mēra maifanifo
(Mr. 15.42-47; Lc. 23.50-56; Jn. 19.38-42)

⁵⁷ Akka mā fakishaino feronāfake kori ichapaya fisti kani āfe ane José. Nā José Arimatea mai anoa ini. Nāatori Jesús Ifofamis ini. ⁵⁸ Nā José xanīfo Pilato ano kaxō Jesús āfe yora yōkani maifai axiki. Nāskakē Pilato ato yoini Jesús āfe yora inānōfo. ⁵⁹ Nāskata José mā Jesús yora fixō, sama oxosharakōipa rakoni. ⁶⁰ Nāskaxō makex kini a tsoa maiyomisma mēra ratani. Nā makex kini fakī José ayoni. Nāskata nā Jesús maifaa ano makex kini tokirinīfanē fepofaini kani. ⁶¹ Akka María Magdalena fe María fetsa nāno nētekanax a Jesús maia ano tsaokaxō òinifo.

Sorarofāfe Jesús maia ano kexenifo

⁶² Mā askaitano, judeofo āfe pena tenetitīa a ato Nios kīfixomisfāfe āto xanīfofo fe fariseofo fonifo Pilato òifokani. ⁶³ Mā fōkaxō yoinifo iskafakakī: “Xanīfo, mā nō shināi na feronāfake chanīmisto nayoxoma yoikī iskafamis: ‘Ē naax tres nia oxata ē otouxii,’ ixō yoimis. ⁶⁴ Nāskakē mī sorarofo nīchife a maia ano kexeyonōfo tres nia aōxō tāpimisfo fakishi fēkaxō āfe yora fiyamanōfo. Fīakaxō yorafo yoitirofo iskafakī: ‘Mā Jesús otoaki,’ ato fatirofoki.

Akka ẽ otoxira ikax a chanĩmiskĩ. Nãskakẽ mã otoara ikaxõ ato parakĩ finakõitirofoki,” fanifo.

⁶⁵ Askafaifono Pilato ato yoini: “Nakĩa sorarofu. Ato iyotakãfe. Fokaxõ mafa kini kexesharatakãfe nã mã apaiyai keskafakĩ,” ato fani. ⁶⁶ Nãskakanax fonifo. Mã fõkaxõ itipinĩ fanifo nã mafa kini. Nãskata nã aõ fepea tokirinĩfã sichopa marakka fanifo. Nãskakaxõ ano sorarofu nĩchitakani fenifo anoxõ kexesharanõfo.

28

Jesús otoni

(*Mr. 16.1-8; Lc. 24.1-12; Jn. 20.1-10*)

¹ Judeofãfe ãto pena teneti safaro mã finõano, nãskata nomĩkonõ fakishparikõi fonifo a Jesús maia ano. Mariá Magdalenanõ Mariá fetsanõ fonifo a Jesús maia ano õifokani. ² Nãskata samamakõi fãsikõi mai naya naya ini, nõko Ifo Niospa ãfe ãjiri nai mẽraxõ fomanaino. Mã fotota a Jesús maia ano kaxõ, a aõ fẽpoita tokirinĩfã fepeta a kamaki tsaoni. ³ Nã nõko Ifo Niospa ãfe ãjiri fafekõini, nã kana peeikai keskara. ãfe rapati oxofinakõi ini. ⁴ Askaito õikani sorarofu choayanã ratekõinifo. Nãskakanax oa naa keskara nãmã pake pakefofãnifo. ⁵ Akka nã nõko Ifo Niospa ãfe ãjirinĩ nã kẽro rafe yoini: “Rateyamakãfe. Mẽ tãpiakĩ mã Jesús fenaiyoaki a mastaitafo,” ato fani. ⁶ “Nonomaki, mã otoaki a mato yoimis keskai. Õifekapo, a rãtaitafo ano. ⁷ Koshikõi fõkaxõ aõxõ tãpimisfo yoirisafatakãfe iskafakĩ: ‘Mã otoaki. Galilea ano kai kiki mã kayoamano. Nãnoa mã õikaikai ato yoitakãfe. Mẽ mato yoikai shinãmakiyamakãfe,’” ato fani.

⁸ Ato askafaito nikafaikani nã kěro rafe koshikōi fonifo nã Jesús maita anoax. Ratefiyanã āto shinã měra inimakōinifo aōxō tãpimisfo chanifaifokani ichonifo. ⁹ Ichoaifono Jesús atoki nokorisatani nã kěro rafeki. Nãskaxō, “Mě oi,” ato fani. Ato askafaino nã kěro rafe Jesúski fōkaxō akiki inimakakī ratokonō mai chachipakefofã āfe fitax ano achinifo. “Mī sharakōi,” fanifo. ¹⁰ Nãskaxō ato yoini: “Rateyamakāfe. Fokaxō ěfe extofo ě yoimis keska fakī ea ato yoixotakāfe Galilea ano fotanōfo. Nãnoa ea fichifokani kiki,” ixō ato yoini.

Sorarofāfe ato yoinifo

¹¹ Mã nã kěro rafe foaifono, nã Jesús maia ano kexekanax soraro ranāri fonifo pexe rasi ano. Mã fōkaxō a ato Nios kīfixomis āto xanīfofo yoinifo nã ōiafo keskara. ¹² Nã xanīfo ano fonifo. Nã anifofo fe mekai fokani, ato fe yoināsharaxikaki. Nãskakaxō sorarofo kori ichapakōi inānifo. ¹³ Ato iskafanifo: “Ato iskafakakī yoitakāfe: ‘Nō fakishchāi oxano Jesús āfe inafō fěkaxō āfe yora yometsoanafo,’ ato fatakāfe. ¹⁴ Mã ato askafaito xanīfāfe nikaxō mato afara faito, nō yoisharanō mato afeska fanōfoma,” ato fanifo.

¹⁵ Nãskakaxō sorarofāfe mã kori fīkaxō, mã fōkaxō nã ato yoiāfo keskafakī ato yoinifo. Nãskakē nã maitio anoxō nikaketsanifo. Iskaratīari a keskara chanīmara famisfo judeofāfe.

Jesús aōxō tãpimisfo yoini aōxō keyokōi yoifofāsafatanōfo

(Mr. 16.14-18; Lc. 24.36-49; Jn. 20.19-23)

¹⁶ Nãskakanax Jesús aōxō tãpimisfo once fonifo Galilea ano, nã Jesús ato yoiyomis keskai fonifo mãchifã ari. ¹⁷ Nãskakata Jesús ōikakī, “Aicho, mī

nõko Ifo Jesús nõ mia noikõï,” fanifo. Akka Jesús otoano ranãrito chanĩmara fanifoma. ¹⁸ Nãskaifono Jesús atoki kaxõ ato yoini: “Ëfe Epa Niospa ea yoia nai mẽranoafoya nono mai anoafori ã ato yoinõ. ¹⁹ Akka nã maitio ano yorafoki fotakãfe ato yoixikakĩ ea Ifofasharanõfo. Nãskaxõ ãfe Epa aneõxõ ato maotifapatakãfe. Ëfe aneõxori ato askafatakãfe, ãfe Yõshi Sharaõxori ato askafatakãfe. ²⁰ Nãskaxõ ato yoisharakãfe nikasharakõinõfo nã ã mato yoia keskara. Akka ã mato fe mẽxotaima ipanakaki,” Jesús ato fani.

Niospa meka fena Jesucristo^{noa}
New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 22 Feb 2024 from source files
dated 29 Jan 2022

6c7b7ce2-9d87-5405-91e6-71ce1387adcc